

**NATIONAL ASSEMBLY OF  
SEYCHELLES**

*Tuesday 30<sup>th</sup> July 2024*

*The Assembly met at 9am*

*National Anthem*

*Moment of Reflection*

*Mr Speaker in the Chair*

**MR SPEAKER**

Bonzour tou Manm Onorab. Bonzour nou bann zofisyé Lasanble, nou piblik ki pe swiv nou fidelman. Mersi pour zot lentere touzour.

E byenveni osi nou bann envite ki dan Lasanble ozordi ki en group etidyan lekol Mont Fleuri. E Onorab Michel Roucou in demann mwan laparol, pour li kapab dir en bonzour son bann envite. Onorab, ou kapab fer sa.

**HON MICHEL ROUCOU**

Mersi Mr Speaker. Bonzour Manm koleg Onorab. Bonzour tou dimoun ki pe ekout nou. E bonzour spesyal zabitan Mont Fleuri.

Mr Speaker, mersi pou port mwan laparol. Mon le dir *welcome* tou bann etidyan

Lekol Mont Fleuri Segonder ki ozordi pe *attend* nou sesyon ki dan Galeri avek nou. Mon swete ki zot pas en bon lazournen avek nou la e ki zot ava kapab aprann bokou bann keksoz ki pase li menm li dan bann sesyon Lasanble.

Mr Speaker, parmi bann etidyan i osi annan mon fiy ki pe *attend* Lasanble. I lekol osi Mont Fleuri Segonder. E osi mon le anvoy mon meyer ve pour zenn Onorab Ashley Jean, ki pa'n kapab avek zot la aköz en problem lasante. Mersi Mr Speaker, pou donn mwan laparol.

**MR SPEAKER**

Mersi Onorab. Mon annan en lanons sorti kot nou *PR Public Relations and Projects Manager* Ms Angelique Hill. E i pe demann mwan met latansyon bann Manm lo en piblikasyon spesyal, en magazin ki komemor 31enm Laniverser Lasanble Nasyonal ki nou pe selebre an se moman.

Donk, sa piblikasyon in pran bokou zefor e bokou kontribisyon, en pe sorti parmi zot, en pe lezot landrwa. Donk, i pe envit zot pou donn li zot latansyon spesyal. E annou apresye zefor ki sa departman e son *manager* in mete ladan.

Mersi. Sa in deza konmans ganny sirkile *online* pour zot. Nou a konmans lo nou biznes ki lo *Order Paper* e nou a konmans avek *Private Notice Question*. Madanm *Hansard* raporter ou ava apel Minis.

Bonzour Minis pour Transpor Mr Antony Derjacques. E bonzour egalman Mr Patrick Andre Sekreter Prensipal pour *Land Transport*. Mr Geffy Zialor *CEO Seychelles Public Transport Corporation*. Mersi pour zot prezans pou reponn *Private Notice Question*.

Onorab *Leader* Lopozisyon, mon a envit ou pou met ou kestyon.

### **HON SEBASTIEN PILLAY**

Bonzour Mr Speaker. Bonzour tou koleg Onorab. Bonzour Minis ek ou delegasyon. E en bonzour spesyal bann etidyan sorti Lekol Mont Fleuri ki anler dan Galeri. Mon war zot byen anform ozordi pou swiv nou Sesyon Lasanble. Bonzour tou dimoun ki pe swiv Lasanble ozordi bomaten.

Mr Speaker, premyerman ler mon pe demann mon kestyon, permet mwan pour mon remerci ou avek Deputy Speaker Onorab Gervais Henrie pou *step down* konman bann

*Leaders* dan zot parti politik, parey nou ti pe demande.

E nou ava swete ki sa i kontinyen dan en lespri pou avans nou demokrasi. E nou ava war plis tolerans e si ou le, enparsyalite dan lafason ki travay Lasanble i ganny fer. E mersi pou ekout *US* ler *US* in koze Mr Speaker.

**(APPLAUSE)**

### **HON SEBASTIEN PILLAY**

Mr Speaker, mon kestyon pour Minis i lir koumsa. Mersi Minis pou vin reponn mon kestyon dan Lasanble. E mon rekonnet prezans Mr Zialor sorti kot *SPTC* e Sekreter Prensipal pour Departman Transpor. Kestyon i lir koumsa;

Konbyen travayer ki *SPTC* in fer *redundant* depi komansman lannen e eski *SPTC* in an se moman pe angaz li dan en prosedir *redundancy* pou serten travayer? Mersi Mr Speaker.

### **MR SPEAKER**

Mersi Onorab. Minis ou repons?

### **MINISTER ANTONY DERJACQUES**

Mersi Mr Speaker. Bonzour Mr Speaker, bonzour *Leader of*

*Government Business, Leader of the Opposition;* bonzour tou bann Manm e tou sa ki a lekout, bonzour bann zanfan ki pe attend nou Lasanble Nasyonal.

Mr Speaker, si *Leader* Lopozisyon ti'n fer son *homework* e i ti'n lir son prop *Standing Orders*, i ti an remarke anba Seksyon 36(1)(h) “*a question shall not reflect on the decision of a court of law and no question shall be asked on any matter which is sub judice*”.

Si i ti'n fer son *homework* i ti ava'n realize ki ler negosyasyon ti'n konmanse dan sa 26, 17 travayer ti'n ganny *redeployed* an deor *SPTC* avek en gro *package* ki enkli 3 mwan saler. E bann 9 ka ti al devan *employment* – devan *competent office* anba *Employment Act*. E ladan zis 3 ki ti ganny fer *redundant*. Dan sa 3, 2 etranze e 1 Seselwa. E sa Seselwa nou pe fer tou e nou'n *committed* pour li ganny *redeployed* dan *SPTC*.

I ti an osi remarke ki sa 5 ki reste dan sa 26, zot devan *Advisory Board*. *Employment Advisory Board*. E *SPTC* i pe negosye e konsilte pour zot ganny *reemployed* dan bann lot travay kot zot kapab prodiktiv dan *SPTC*. E nou pe sey fer sir ki tou sa ki le reste dan *SPTC* e

zot kapab prodiktiv dan *SPTC*, zot pou reste.

Mr Speaker, ler bann stratezi *SPTC* i ganny fer, nou fer li pou fer sir ki *SPTC* i reste toultan vyab. I vin en *public entity* ki transport avek bann pri afordab e vin enn ki kapab moderniz tou bann larout. Moderniz sa lantrepriz li menm.

Nou'n fer en kantite sanzman dan *SPTC*. Konman nou ti ariv o pouvwar sa Gouvernman ti aste 60 nouvo bis. E ladan 55 Mr Speaker, in fini antre dan pei. E 5 byento pou antre.

Mr Speaker, nou'n sorti lo peyman *cash* e nou'n al *cashless*. Savedir nou'n anmenn teknolozi dan *SPTC* e tou dimoun prezan i servi bann *card*.

Mr Speaker, anliny avek bann *reorganisation of SPTC*, nou osi nou'n entrodwir en Proze *Electric Vehicle*. E byento le 26 mon krwar sa mwan, *PS* avek son tim enkli avek *CEO* zot pe al Lasin, e zot pe al angaz zot dan bann faktori avek lenvitasyon Gouvernman Lasin. E zot sipoze, si tou i mars byen, siny en *Memorandum Of Understanding* pour nou resevwar 22 nouvo bis elektrik ek *hybrid*.

**(APPLAUSE)**

**MINISTER                      ANTONY  
DERJACQUES**

Mr Speaker, travayer *SPTC* i annan plis ki 450. E toultan ler i annan sanzman, nou bezwen re angaz nou lo ki mannyer nou pou fer sa bann lantrepriz vin bokou pli efikas e modern. E sa egzakteman sa larout ki'n ganny trase pour *SPTC*. E mon *congratulate management SPTC, Board SPTC* pou pran bann desizyon pour tou dimoun, pour tou bann pasaze ki pran *SPTC*.

Nou vizyon set en *SPTC* ki modern, ki afordab e ki ranpli tou bann dezir pep Seselwa, pou transport zot dan zot lwazir e pou vin travay. Mon fer zot remarke ki toulezour *SPTC* i transport plis ki 50 mil pasaze. Mersi Mr Speaker.

**MR SPEAKER**

Mersi Minis. Minis, mon ava adres en koreksyon ki mon bezwen fer dan ou *statement* - dan ou repons. *Admissibility* en kestyon dan Lasanble i desizyon Speaker. Savedir si...

*(Interruption)*

**MR SPEAKER**

...savedir si en kestyon in ariv dan *Order Paper*, se ki mon'n aprouve e i pa lafot sa dimoun ki'n demann sa kestyon aköz sa i desizyon Speaker. Donk mon pou demann ou pou pa antreprann...

*(Interruption)*

**MR SPEAKER**

Onorab Pillay, ou a gard lord silvouple. Ou a gard lord. Nou pa pou ale. Toudmenm, si en kestyon i port lo en kes ki *sub judice*, Speaker i kapab diriz okenn Manm ki pe poz sa kestyon. E i osi ou posibilite pou dir si en tel kestyon i *sub judice* e ki ou pa kapab komant lo la. Se koumsa ki Lasanble in ale ziska konmela e se koumsa ki nou a kontinyen fer.

Donk Onorab Pillay mon'n adres sa pwen ki Minis in fer e mon pa pe pran okenn *matter of privilege* lo sa. So nou a kontinyen avek kestyon.

Minis i a realize poudir ler ou'n donn ou repons, Manm i permet demann ou klarifikasyon oubyen anmenn kestyon siplemanter lo sa ki'n dan ou larepons. Sa i dan *Standing Order*.

(Atann en pti moman mon a pran en pe bann non avan nou konmanse.) Tre byen. Mon

a konmans avek Onorab Lemiel.

**HON SYLVANNE LEMIEL**

Mersi Mr Speaker. Bonzour Mr Speaker. Bonzour Minis avek ou delegasyon. Tou mon bann koleg Manm Onorab e tou nou bann envite ki dan Lasanble Nasyonal ozordi. *Bienvenue* bann etidyan Mont Fleuri.

Mr Speaker, mon kestyon i, letan nou pe vwar bann *redundancy* par egzanp ki ganny arive kot en lorganizasyon parey *SPTC*, bokou letan drayver i ganny touse.

E mwan personnelman i annan de larout dan distrik ki nou'n demande. Me mon'n ganny dir ki bis i annan, me napa drayver. Be ler ou regard *redundancy* i tous drayver, petet mon ti a kontan ganny en leksplikasyon avek *SPTC* atraver Minis, konmsi ki laranzman ki zot pe fer?

Ou pe fer *redundancy* serten drayver ki ale *or* serten drayver la ki pe ganny met lo *part time*, pe ganny nouvo laranzman? Me selman *still* nou pe ganny dir dan distrik ki nou pa kapab donn en nouvo servis lo en tel larout aköz napa drayver. Mersi.

**MR SPEAKER**

Mersi. Minis?

**MINISTER**

**ANTONY**

**DERJACQUES**

Mr Speaker, napa okenn drayver ki pe ganny fer *redundant* dan sa proze ki nou pe koz lo la. Par kont, i annan 5 nouvo drayver ki sorti dan Lenn ki pe al antre dan pei. E sa i pou ogmant kantite drayver ki *SPTC* i ava annan. Savedir i annan en *increase of drivers*. Dan sa 26 orizinal la, napa en drayver.

Mr Speaker, sa i donn mwan loportinite pou dir ankor en keksoz, *SPTC round the clock* tou le mwan i fer bann *interviews* avek bann potansyel *drivers*. Sa ki pe arive Sesel se ler nou anvoy sa bann *drivers* Seselwa ki anvi antre dan *SPTC*, pou fer zot *medical test*, toultan i annan bebet dan disan.

Nou problem se *substance abuse*. Nou pa kapab les en drayver ki dan son disan i montre i annan *substance abuse* pour li pran ou zanfan, mon zanfan, ou menm ou ki vin travay e dray ou dan sa bis, aköz i tro danzere. Nou bezwen bann dimoun ki pa tous sa ditou. Alor, sa ki pe arive. Wi, nou annan en kantite drayver Seselwa. Me an menm

tan nou bezwen kontinyen *recruit*.

Sesel i annan 18 mil travayer etranze ki pe travay Sesel. I annan plis ki 4 mil *post* ki pe ganny *advertised*. E i annan apepre 400 Seselwa ki'n ganny *officially registered* ki pe rod lanplwa. E zot pe rod bann lanplwa ase spesifik, avek bann ki zenn ki'n fini lekol osi dan sa tim. I annan en kantite travay.

E mon enplor bann Seselwa, bann travayer ki ler ou pe rod en *post*, ler ou pe rod en serten travay dan en landrwa sansib, fer sir ki ler ou fer sa bann *interviews*, sa bann *medical test*, napa okenn sibstans ilegal dan ou disan. Ou pou *fail*. E se sa ki pe arive toultan avek *SPTC*.

E nou, nou pe rod nouvo bis. Nou ganny nouvo bis. La nou pe al rod ankor 22 *electric ek hybrid buses*. Of course nou bezwen drayver. Nou pou bezwen plis ki 22 aköz zot pou bezwen *drive* sa 22 bis. Bezwen annan bann *hours of work* ki sa bann bis i lo semen. Nou pou bezwen drayver.

Be kote nou pou ganny drayver si zot pa kapab pas e ariv lo sa standar? Toultan tan ki nou, nou pa pran bann *top jobs*, bann *management jobs*, bann *jobs* bann *drivers*. Toultan

pou annan etranze ki pou antre ki pou pran sa bann *posts*. Alor mon demann – mon sezi sa loportinite pour sak Manm osi, annou *sensitize* nou bann travayer Seselwa.

Mr Speaker, zot in osi refer lo sa 6 drayver, *for medical reasons* zot in ganny *light duties*. Zot in ganny *light duties* aköz wi, nou anvi gard zot dan *SPTC*. Zot pa kapab fer sa travay – tou sa bann *hours of work* ki zot ti pe fer oparavan. Alor, nou pe donn zot *light duties*.

Zot pa pe sorti dan *SPTC* aköz nou bezwen zot e nou bezwen drayver. E nou rekonnèt ki en travayer ki pa ankor ariv son *retirement age* i devret osi reste dan travay.

Si zot ti anvi al en lot landrwa an deor, mon'n dir zot i anna plis ki 4mil *post* pe *advertise* toulezour. Zot anvi reste dan *SPTC*. Zot ava ganny zot *light duties*. Alor Mr Speaker, napa okenn drayver Seselwa ki pe ganny pouse, ouswa ki pe ganny fer *redundant* dan *SPTC*. Mersi.

### **MR SPEAKER**

Mersi Minis. Onorab Cosgrow, ou kestyon?

### **HON WALLACE COSGROW**

Mersi Mr Speaker. Bonzour Mr Speaker. Bonzour tou dimoun Lasanble Nasyonal. En bonzour spesyal pour nou bann zenn envite anler dan Galeri.

Mr Speaker, eski Minis i kapab dir nou, ler ki zot ti pe pran desizyon pou fer sa 26 *staff SPTC redundant*, eski zot in vwar bann diferan posibilite dan lorganizasyon? Par egzantp la Minis in dir nou poudir zot pe fer vini 6 – 5 drayver Endyen pou vin pran serten pozisyon dan SPTC.

E si zot in pran konsiderasyon bann lezot depans ki petet ki pe fer SPTC ozordi vin en lorganizasyon ki pa neserman efikas. Bann depans par egzantp avek *management*.

Ozordi nou konnen poudir *management* zot saler i sitan o. E si zot in *explore* tou sa bann aveni avan ki zot fer sa 26 Seselwa travayer dan SPTC ki pe ganny zot saler, zot dipen pou sonny zot fanmir, met zot deor? So eski Minis in pran lezot konsiderasyon? Mersi.

### **MR SPEAKER**

Mersi Onorab. Minis?

### **MINISTER DERJACQUES**

### **ANTONY**

Mersi Mr Speaker. Mr Speaker, sa reorganizasyon dan *human resources manpower SPTC*. Annefe nou ti ganny led avek *Public Service Bureau*. Nou ti *outsource* e nou ti rod bann pli bon *expert* dan pei. E alor nou ti al kot *the Bureau*. *Bureau* ti pase e in fer son rapor, in fer son bann rekomandasyon.

Sa i pa'n zis ganny fer akoz *management ek Board* ti anvi *reorganise*, ti anvi pouse, ti anvi fer *redundant*. Nou ti anvi *reorganise* akoz nou ti pe *modernise*. Nou ti konnen i annan *cashless*.

E *cashless* par egzantp ler ou aret anmas larzan, ou bezwen al *digital*. Ou bezwen kree en tim oubyen reorganiz SPTC. SPTC 3 an, 4 an pase ti annan plis ki 590 travayer. La i annan apepre 450 akoz nou'n bezwen fer *reorganisation ek streamlining*, anvi ki nou pe moderniz SPTC.

SPTC nou'n regard son Bidze. Ler nou ti vin Gouvernman, son *subsidy* ti 90 milyon par lannen. Be\_nou ti fini 2023 avek 5.8 milyon *cash* dan nou kont. E nou *subsidy* pour 2023 ti 26 milyon. Savedir nou'n fer en gran *improvement* kot nou'n fer bann *savings*. Kot nou'n elimin bann travay ki pa ti prodiktiv. Kot nou'n

*streamlined*. Kot nou'n fer *rationalisation*. Kot nou'n *reorganised* e nou'n sov plis ki 60 milyon, ki prezan i antre dan aste nouvo bis.

Se pour sa rezon ki Minister\_Finans atraver sa *fund* kot nou'n aste 60 bis, i kapab repeye aköz i pa bezwen *subsidise* SPTC 90 milyon. Nou'n fer li desann pou vin 28 milyon ek en lot *savings* 5.8 milyon dan nou kont lafen lannen 2023.

Alor kwa ki pe arive? Nou pe sey transform SPTC pour bann dimoun ki annan veikil. Konmans mazine ki pour ou al anvil pour ou al travay, pour ou al partou la. Ou kapab *park* ou loto kot ou e ou kapab pran en *public bus system*. Nou pa ankor ariv sa staz aköz Seselwa i ankor pli kontan konfor son loto.

Solman, mon pe zis *alert* zot parey mon fer sak fwa mon vin dan sa Lasanble. Nou *GDP* i vreman o. Nou standar i vreman o. Nou *disposable income* i vreman o. Nou enport en kantite loto. E napa plas pou fer bokou plis semen. Malgre tou nou zefor, napa plas. Nou pe *import* plis ki 1500 nouvo loto sak lannen. Alor nou bezwen transform SPTC. Nou bezwen fer li ariv en staz kot

dimoun i servi zot loto kekfwa dan wikenn pour lwazir, si pou al travay, zot anbank lo en bis. Be pour zot fer sa, fodre nou moderniz SPTC. Se sa nou vizyon Mr Speaker. Mersi.

**(APPLAUSE)**

**MR SPEAKER**

Mersi Minis. Onorab John Hoareau, ou kestyon?

**HON JOHN HOAREAU**

Mersi Mr Speaker. Bonzour Mr Speaker. Bonzour Minis ek ou lekip. Mr Speaker, mon ti a kontan si Minis i konformen si in annan okenn legzersis atraver *HR SPTC*, pou fer sir ki bann *team leaders* par egzantp ki ti pe travay, zot kapab ganny *internal transfer* pour zot kapab dizon, si zot enterese dan mekanik pour zot kapab pran en lot pozisyon dan SPTC li menm? Mersi.

**MR SPEAKER**

Mersi Onorab. Minis?

**MINISTER** **ANTONY**  
**DERJACQUES**

Yes, Mr Speaker. Onorab Hoareau li menm li osi ti ekrir mwan. Aköz enn sa bann *team leaders* i tonm dan son distrik. I enn son *constituents*. I annan



5 zot sa bann *team leaders* e zot tou zot pe ganny *redeployed* dan *SPTC*.

Personn Mr Speaker, parey mon'n dir pa pe ganny pouse. Bann ki anvi aksepte sa *redeployment*, *reemployment within SPTC*, zot *welcome*. E zot in ganny aksepte. Bann ki anvi pran sa *package* ki nou donn zot ki anvi al an deor *SPTC*, zot ganny en vremen bon *package*.

E mon anvi dir en keksoz pour *Ministry of Employment*. Sak fwa i annan sa bann ka, i annan en *fail-safe* pozisyon. I annan sa bann *checks and balance*. Nou bezwen annan konfyans e konfidans dan zot abilite sa bann *competent officers* sa Minister. Zot pa zis regard sa ki *management* i anvi avek *Board* i anvi, e pous en travayer. Non! Zot negosye.

E si i ariv en desizyon ki sa *post* nepli egziste, ouswa napa prodiktivite dan sa *particular post* akoz in ariv *cashless* nou'n modernize - nepli bezwen 15 *supervisor*, nou bezwen 5 – zot ganny plase dan bann lot *post* anndan dan sa lorganizasyon parey *SPTC*. Ouswa an deor.

Nou'n ariv en staz Mr Speaker kot Minister Lanplwa pe vremen travay byen e napa Seselwa ki pou mank en saler si

zot anvi en travay Sesel. Mersi Mr Speaker.

### **MR SPEAKER**

Mersi Minis. Onorab Loze, ou kestyon?

### **HON JOHAN LOZE**

Mersi Mr Speaker. Mr Speaker, mon note ki letan Minis in koz lo bann *achievement* son Gouvernman ler ti fek antre, in omit poudir zot ti ogmant tarif bis pour Seselwa peye.

Mr Speaker, i byen ki Minis pe felisit Lanplwa. Akoz i annan en let date le 12 Zilyet 2024 sorti kot Lanplwa ki'n adrese a *CEO SPTC*. Dan lekel in enform li dan 9 kes ki ti'n ariv devan Lanplwa, zot in ganny *approval* pou fer 3 *redundancy*. E 6 ladan pa'n ganny aprouve.

Alors, kestyon ki demande, se ki travay preparasyon zot in fer egzakteman avan zot in fer sa bann *redundancies* ki Minister Lanplwa in diskalifye mazorite?

E Mr Speaker an dizan sa, nou konpran akoz ki en gran nonm dimoun i aksepte *package*. Parske *redundancy* ki Minister Lanplwa in otorize se zis 1 mwan saler ki ou al\_avek. Tandis ki zot, zot ti pe ofer 3 mwan saler.

Mr Speaker, mon dezyenm kestyon ki mon annan. Sa bann sityasyon ki zot pe fer dan *SPTC* ozordi, eski zot pe senpleman kree kondisyon pour zot anploy plis etranze dan plas sa Seselwa ki zot in fer vin *cashless*? Mersi Mr Speaker.

**MR SPEAKER**

Mersi. Lo dezyenm – lo ou dezyenm pwen, mon krwar Minis in adrese. So, si i pa reponn mon pa pou ensiste. I a kapab fer komanter ki i le. Minis, ou larepons?

**MINISTER ANTONY DERJACQUES**

Mr Speaker, ankor mon ensiste lo Onorab i devret lir Lalwa. Lalwa i dir “*a question shall not reflect on a decision of a court*”. *A court* in fer en desizyon. Dan sa bann 26 ka, ti reste zis 9. Dan sa 9, zis 1 Seselwa in ganny fer *redundant*. E nou'n fer desizyon nou pou *redeploy* li deswit dan *SPTC*.

Alor, mwan mon pa pare pour mwan al regard desizyon Tribinal. Mon respe tou bann Seselwa ki annan bann pouvwar adilikater lazistis. E mon respe zot pozisyon.

Mr Speaker, ankor enn fwa mon dir ki napa lentansyon pour travayer perdi travay. I

annan lentansyon pou moderniz *SPTC* e pou donn en pli bon servis.

Tou bann travayer i ganny plase dan en lot travay ler premye travay nepli egziste.

Par egzanp aköz *cashless*, aköz modernite, napa sa *job* pour ou fer. E sa travayer mon le dir; ler i vin travay, i anvi travay li. I pa anvi zis asize dan son biro napa naryen pou fer. I anvi osi prodwir. E en kantite dimoun i dir, mon en travayer avek laprid. Zot anvi donn pour zot pei. Zot pa kontan ki bann politisyen i zis pran zot ka spesifik e i vin fer politik avek dan Lasanble. Mersi Mr Speaker.

**(APPLAUSE)**

*(Interruption)*

**MR SPEAKER**

Onorab, aret kriye silvouple! Aret kriye! Ou'n lev ou lanmen, ou'n dir *point of order*. Mon'n tann ou. Onorab Loze, ou kestyon in ganny reponn. Eski ou annan en lot pwen pou fer?

**HON JOHAN LOZE**

Mersi Mr Speaker. Mr Speaker, *I will submit to the Chair* ki mon kestyon pa'n ganny reponn. Mr Speaker, mon ti napa kestyon lo

adilikater mwan. Mon kestyon sete ki preparasyon ki zot *SPTC* zot ti'n fer? *Because the minute* zot desizyon in ganny *challenged* par 9...

**MR SPEAKER**

Ok, ou'n fer ou pwen. Ou'n fer ou pwen. Minis in reponn ou kestyon e ou bezwen aksepte son repons. Onorab Pillay, ki ou *point of order*?

**HON SEBASTIEN PILLAY**

Mersi Mr Speaker. Mr Speaker, mon pe met lo rikord Lasanble ki Minis pe *mislead* Lasanble. Mwan mon annan sa let sorti kot Departman Lanplwa ki konsern *approval* pou fer en *redundancy*. Napa okenn *competent court*.

So mon ti ava demann ou pou fer demann - dir ek Minis reponn kestyon ki ganny demande devan Lasanble e aret zwe kouk avek reponn kestyon Mr Speaker.

E mon le met lo rikord Lasanble Mr Speaker, ki sa bann let mon'n ganny kote sa? Mon'n ganny avek bann dimoun imaziner oubyen avek bann travayer?

*(Interruption)*

**MR SPEAKER**

Mersi.

**HON SEBASTIEN PILLAY**

Egzakteman Mr Speaker, vwala problem ki nou annan dan sa pei. En Gouvernman ki pa le koz laverite.

**MR SPEAKER**

Minis in reponn sa kestyon. Mon pa pou demann li re fraz son kestyon. Onorab Georges, ki ou annan silvouple? *Point of order* oubyen kwa?

**HON BERNARD GEORGES**

Mon annan en *point of order* Mr Speaker, anba *Order 36(1)* o.

Lonorab, *Leader* Lopozisyon fek admet la ki i annan sa dokiman devan li e ki mannyer eski i kapab vin demann en kestyon, ler i napa drwa anba (o) akoz i annan lenformasyon *which is available and accessible documents* i fek montre sa dokiman li menm?

**MR SPEAKER**

Mersi.

***(APPLAUSE)***

**MR SPEAKER**

Onorab Vidot, ou kestyon.

**HON AUDREY VIDOT**

Mersi Mr Speaker, bonzour Mr Speaker; bonzour Minis, tou Manm Onorab, nou bann etidyan Mont Fleuri ki dan galeri e tou dimoun ki a lekout.

Mr Speaker, mon'n ekout Minis, dan son bann repons letan in zistifye bann *savings* e bann demann pou aste nouvo bis. Mon ti le demann li an term kestyon orizinal lo restriktirasyon ki *SPTC* pe fer. Ki priyorite ki zot in konsidere dan lentere zot bann travayer pour zot redir bann depans?

Par egzanp annan nouvo telefonn *S23 Ultra*, *laptop* pour tou bann *management*, bann ekstravagans ki petet nou ti kapab regarde ki mannyer nou kapab retenir bann travayer kot *SPTC*, pour ki zot kapab kontinyelman donn zot servis?

E dezyenm kestyon ki mon annan, i annan 2 *memo* ki ti ganny sirkile, enn le 13 Me 2024 kot in dir pou enform lo restriktirasyon tou bann travayer.

Aprè i annan enn le 23 Me kot *SPTC* in sit apepre pres en dizenn pozisyon travay.

Eski Minis, i kapab klarifye avek nou, si sa bann dimoun ki zot ti annan lentansyon fer arete, zot abilite pour zot kapab *apply* pour sa bann pos e zot saler pa ganny

dezavantaze ler zot *apply* sa bann pos pou garanti zot pou gannyen?

Eski annan zot vreman annan bon lentansyon pou gard sa bann travayer anpes zot perdi en lanplwa? Mersi.

### **MR SPEAKER**

Mersi. Minis, ou repons.

### **MINISTER ANTONY DERJACQUES**

Mersi Mr Speaker. Annefe mon'n reponn solman zis pran sa sans pour mwan *reiterate* sa.

Larepons se senp, wi, ou'n byen dir ki ler sa legzersis ti komanse nou ti'n donn lenformasyon lo bann nouvo *post*, alor nou'n sirkile bann nouvo *post*.

E bann nouvo *post* i al par egzanp dan *Finance i annan accounts assistant x 1, store clerk 1, operations center breakdown, bus drivers, HR development Manager, security officers 3, assistant supervisor 5, mechanic, breakdown mechanic, panel beater, senior network security administrator*.

Mr Speaker, sa bann pozisyon in toultan ganny met a atansyon sa bann travayer. Konsiltasyon in kontinyen menm an ekrir parey ou'n *acknowledge*.

E Lanplwa osi in ganny sa bann lenformasyon e sa i konkretiz sa ki nou deside depi oparavan e mon'n dir dan mon larepons nou anvi *re-employ*, *redeploy* tou sa bann travayer dan *SPTC* Alors bann travayer i annan ki'n pran sa gro *package* in ale.

Akoz deswit zot in ganny *absorb* dan en lot landrwa akoz *Ministry of Employment* i fer *pairing*. Ler i annan en ka zot regard lo zot bann *computer* tou sa bann *post* ki *available* zot *pair* ou, alor ou ale avek ou gro *package* ki ou'n gannyen avek *SPTC* dan ou nouvo lanplwa.

Ou pa ni bezwen mank en zour travay i *seamless* e sa ankor en fwa mon *congratulate Ministry of Employment*.

Mr Speaker, alors son larepons. *CEO* i anvi azoute lo bann benefis entern ki *available* osi anvi ki bann re organization ki *SPTC* in fer. Mersi.

### **MR SPEAKER**

Mersi. *CEO*, wi.

### **CEO GEFFY ZIALOR**

Mersi Mr Speaker, *SPTC* parey Minis, in dir nou touzour travay pour asir lefikasite. Asir lefikasite e an menm tan regard nou bann kou, sirtou bann kou ki pa *efficient*, *ok*

I annan bann benefis pour *staff*; bann drayver i annan zot benefis, *management* i annan zot benefis, son *executive* i annan son benefis parey partou i annan.

E nou, nou touzour travay pour nou asire ki nou *maintain* sa bon lantant pour nou asire ki nou annan sa *efficiency* touzour dan lakonpanyen. Mersi.

### **MR SPEAKER**

Mersi. Onorab Georges, ou kestyon.

### **HON BERNARD GEORGES**

Mersi Mr Speaker. Mr Speaker, mon kestyon pour Minis, se sa enn.

Minis, bomaten *Leader* Lopozisyon in remersye Speaker, pour ekout *US* ler zot koze. Mon kestyon pou ou, dan tou sa bann lamelyorasyon ki ou'n dekrir bomaten, dan tou sa bann bon keksoz ki ou dir *SPTC* pe al fer - *cashless*, bis elektrik, re moderniz lefikasite, rediksyon, sibvansyon sorti 80 milyon pour ariv 20 milyon avek en profi 5 milyon ekek.

Dan tousala eski ou Minis, ou Minister ek ladministrasyon *LDS* in ekout *US*, oubyen in ekout lespri e travay sa ladministrasyon *LDS* avek bon

*management SPTC* ki'n fer tousala arive?

**(APPLAUSE)**

**MR SPEAKER**

Mersi. Minis.

**MINISTER** **ANTONY**  
**DERJACQUES**

Mr Speaker, ler par egzantp Dimans ou menm Mr Speaker, Sekreter Zeneral nou nouvo Komite Egzekitiv in ganny elekte.

E mon'n vwar sa plizyer mil Seselwa desann pou atann...

**(APPLAUSE)**

*(laughter)*

**MINISTER** **ANTONY**  
**DERJACQUES**

Sa konvansyon...

**(APPLAUSE)**

**MINISTER** **ANTONY**  
**DERJACQUES**

I fer mon realize ki *LDS* ler i ekrir son *manifesto*, ler i prezant son lekor pour eleksyon i ekout pep Seselwa...

**(APPLAUSE)**

**MINISTER** **ANTONY**  
**DERJACQUES**

E tou sa bann lide ki sorti atraver e tou sa bann lide i pour pep Seselwa. Mersi Mr Speaker.

**(APPLAUSE)**

**MR SPEAKER**

Mersi. Onorab Aglae, ou kestyon. Mon pour... mon annan 2 Manm ki ti'n lev lanmen, mon pour pran sa 2 e mon pa pe pran lezot kestyon amwen ki nou annan letan. Onorab Aglae ou kestyon.

**HON EGBERT AGLAE**

Mersi Mr Speaker. Mon a dir bonzour Minis, Mr Zialor, Mr Andre e bann etidyan lekol Mont Fleuri e tou Manm Onorab.

Minis, dan tou *redundancy* ki ganny fer, se premyerman bann viktim se bann travayer ordiner, bann malere zanmen bann *management* i ganny touse.

E nou war ozordi plizyer bann lapwentman pe ganny fer dan pei, me selman nou anvi restriktire.

Mon kestyon Minis, an Septanm 2021 ou ti annos logmantasyon dan pri bis ki ti R7 pour mont R10 a R12, avek bi ki ou ti dir poudir nou

bezwen koup bann sibvansyon ki Gouvènmàn pe donn *SPTC*.

Minis, mon ti a kontan petet demann ou dan sa anlaliz li menm e kalkilasyon, anvi ki nou dir *SPTC* i anmenn li anviron 50 mil dimoun par zour.

E sa *subsidy* ki ti pe ganny donnen avan ki ti 90 milyon ki ler ou *deduct minus* i R18 san par latet sa 50 mil, par dimoun, par lannen.

Eski ou pe dir mon la avek sa bann *restructuring* ki ou pe fer, sa desizyon pou koup *subsidy* pa pe neserman benefisye *SPTC* ozordi ; ki ou bezwen fer plis *restructuring*? Mersi.

**MR SPEAKER**

Mersi. Minis, ou repons.

**MINISTER** **ANTONY**  
**DERJACQUES**

Mr Speaker, sanzman i kontinyel avek *LDS* akòz nou annan en vizyon, en vizyon ki pe ganny met an plas.

E i pour kontinyen ganny met an plas pandan sa prosen 5 an ki pe vini.

Mr Speaker, i annan en kantite plan ankor pou *SPTC*. Par egzanp kot depo la Ile Du Port *SPTC* in anmenn devan nou, devan Minister, son plan

pour en nouvo *SPTC building*. Zot in osi anmenn bann plan devan lo ki manner zot pou *renovate e commercialise* en parti sa vye batiman kot nouvo lasose.

Zot osi pe re egzamin ki kot *bus terminal* anvil ki manner zot pou ogmant son bann standar. Kot Praslin nou'n fini ganny alokasyon en nouvo teren e nou pe regarde ki manner *SPTC* travay avek Minister Finans i kapab finans en nouvo *bus depot* pour Praslin.

E La Digue nou bezwen regarde si nou bezwen antre ankor enn fwa parey lontan e ofer en pli bon servis piblik ki pour le moman Sekter Prive pe fer La Digue.

I annan en kantite travay ki *SPTC* pe fer e i bezwen fer pour li ariv sa standar, kot tou Seselwa pour dir wi *SPTC* pe akonplir sa ki nou, nou dezir pour *SPTC*.

Mr Speaker, sak fwa nou fer amelyorasyon, sak fwa nou koup sa bann gro *subsidy* ki ti la oparavan e ti annan en kantite gaspiyaz, nou pran tou sa ki nou annan nou larzan, nou later nou met dan bann nouvo striktir e dan bann nouvo servis dan bann nouvo

bis, pour nou donn a lafen pep Seselwa en pli bon servis.

Alor Mr Speaker, tou bann sakrifis ki nou fer, se avek en bi pour moderniz *SPTC* e donn en pli bon servis. Mersi Mr Speaker.

**MR SPEAKER**

Mersi. Ki ou klarifikasyon Onorab?

**HON EGBERT AGLAE**

Mr Speaker, mon le demann sa klarifikasyon aköz la Minis, in etal en plan re devlopman *SPTC* dan en plan ekspansyon.

Be kote ou pour ganny travayer pour travay ladan ki ou pe restriktir e la ou pe fer *redundancy* tou?

**MR SPEAKER**

Onorab, mersi.

**HON EGBERT AGLAE**

Mon pa pe ganny en konpran mwan.

**MR SPEAKER**

Onorab Uranie, ou kestyon.

**HON ROCKY URANIE**

Mersi Mr Speaker. Bonzour Minis, ek ou delegasyon, bonzour tou bann etidyan Mont Fleuri Segonder e ansennyan prezan, tou koleg Onorab,

byensir tou bann zabitan zil pros ki a le kout.

Minis, *SPTC* an zeneral vedir Mahe, Praslin eski sa *redundancy* la i pe tous zis bann dimoun ki pe aktyelman reste lo Mahe? Oubyen i pou osi bann ki lo Praslin aköz osi laba in al *cashless*.

Aprè nou pe koz Minis, pe nonm gaspiyaz ki ti fer atraver bann *subsidies* petet Minis, i bezwen gete avan.

Tou sa *travel* ki Prezidan i fer, tou gro be...

**MR SPEAKER**

Minis. Onorab, laliny ki ou pe al ladan napa okenn relevans.

Minis, mon krwar dan son premye kestyon Onorab in demande, si *redundancy* i aplik pour dimoun Praslin ek La Digue ou kapab reponn sa enn.

**MINISTER**

**ANTONY**

**DERJACQUES**

Mr Speaker, pour La Digue napa travayer *SPTC* La Digue...

*(Interruption) (laughter)*

**MINISTER**

**ANTONY**

**DERJACQUES**

Mr Speaker, Praslin dan sa orizinal 26 napa okenn Pralinwa napa okenn zabitan



Pralinwa e napa personn ki ti lo lalis. Mersi Mr Speaker.

**MR SPEAKER**

Mersi. Nou a pran bann siplemanter Onorab Pillay, lo ter kestyon.

**HON SEBASTIEN PILLAY**

Mersi Mr Speaker. Avan mon demann mon kestyon mon ti a kontan demande si nou vin fer fars dan Lasanble, oubyen nou vin serye pour vin demann kestyon lo *behalf* piblik Mr Speaker?

Mr Speaker, mon'n ekout bann larepons Minis, e mon pe regard bann dokiman ki annan devan mwan. E bann mesaz e tou bann lenformasyon ki mon'n gannyen avek bann travayer ki'n ganny fer *redundant* e bann plizyer konsern ki zot in eksprimen Mr Speaker.

Premye kestyon ki mon ti a kontan demann Minis, e fer kler met lo rikord Mr Speaker, swa sa bann dimoun ki'n anvoy sa bann dokiman kot nou pe koz lalang, swa Gouvernman ki pe koz lalang.

Mr Speaker, ler Minis, i dir ek nou ki sa bann dimoun in ganny zot gro *package*, gro *package* sa bann dimoun in gannyen. Mon pa konnen lekel

sa bann dimoun ki'n ganny sa bann gro *package* ki Minis, pe koz lo la, ki sa gro *package* ki i pe koz lo la parey sa ta dimoun ki ti *NSC Hall* Dimans Mr Speaker...

**(APPLAUSE)**

*(Interruption)*

**HON SEBASTIEN PILLAY**

Mon pa konnen lekel sa gro *package* i pe koz lo la...

**(APPLAUSE)**

*(Interruption)*

**HON SEBASTIEN PILLAY**

Me Mr Speaker, i kler poudir...

**MR SPEAKER**

Onorab, ou kestyon lo *SPTC* silvouple.

**HON SEBASTIEN PILLAY**

Mersi Mr Speaker. Mon kestyon pour Minis, i sa ou dir poudir sa bann dimoun ti ganny ofer posibilite pour retourn dan bann lanplwa dan *SPTC*.

Eski sa bann dimoun ler ti ganny ofer posibilite pour retourn dan sa bann lanplwa, zot ti ganny dir poudir zot pour bezwen pran en rediksyon dan zot saler e dan zot *package* ki

zot ti pe gannyen? Sa mon premye kestyon.

Akoz sa i vedir ki sa bann dimoun ki annan zot fanmir, ki annan zot depans, ki annan zot zanfan ki al lekòl pour war e *take home* mwens. E alors bezwen pran *redundancy* pour ganny zot larzan dan plas al ganny en lapey pli ba.

Dezyenm kestyon Mr Speaker, Minis, in dir ek nou koumsa poudir zot kout bann lekstravagans pour zot koup bann *subsidy* zot in deside al dan sa direksyon.

E alors retir bann *subsidy* e *SPTC* prezan i bezwen fer *redundant* met travayer deor, fer monte pri bis.

Mr Speaker, mon ti a kontan konpran en pe lozik Minis, lo en kote Gouvernman i depans plis dan lekstravagans pour Legzekitiv.

Me lo lot kote se Seselwa ki vin *cashless*. Sa mon problemm Mr Speaker, travayer i *cashless* me Gouvernman ek Legzekitiv i vin pos plen.

Sa ki mon ti a kontan ganny en konpran Mr Speaker, atraver ou demann Minis, pour li kapab eksplik nou. E an terminan...

### **MR SPEAKER**

Mersi. Ou dezyenm-ou dezyenm kestyon pa relevan, i pa lo *SPTC*. Nou pa pe rod ki lekstravagans Gouvernman i fer.

Minis, i annan en premye kestyon ou kapab reponn silvouple.

### **MINISTER ANTONY DERJACQUES**

Mersi Mr Speaker. Mr Speaker, an Me 17 travayer zot in ganny en bon *package*.

Sa bon *package* zot in aksepte e zot in ganny perd, savedir zot in ganny ofer e zot in aksepte bann lot travay an deor *SPTC*.

Dan sa *package* enkli tou zot bann *statutory dues*; par egzanp konpasyon, tann servis, okenn keksoz ki ti ganny drwa ki pa ti ankor ganny peye ti enkli 3 mwan saler.

Zot in aksepte e zot in bouze. Mr Speaker, mon a fer zot rapel ki menm parey bann lot lorganizasyon parey *Air Seychelles* ler nou ti bezwen *rescue Air Seychelles*, bann gro *package* parey ti ganny ofer pour nou kapab fer en *rescue plan* pou *Air Seychelles*.

E tou sa bann travayer in ganny plase dan sekter prive, zot pe ganny bann saler ki kapab parey ouswa i kapab

bokou plis, ouswa i kapab mwens, selman zot in aksepté en *package* zot in ale, zot dan travay, i menm parey pour *SPTC*.

Mon anvi zis termin lo en not pour mwan sey eksplike, nou dan en tranzisyon, dan sa tranzisyon lekonomi pe ofer en kantite bann pos, bann *job*.

I annan plis ki 4 mil parey mon'n dir. Bann *agencies*, bann *SOE's* parey *SPTC* e tou bann lot lorganizasyon ki pour kontinyen vin devan *Ministry of Employment*, zot, zot bezwen ranpli en manda pour zot kapab fer ki zot osi zot reste soutenab, ki zot reste vyab.

Alor toultan zot pour reget zot *management policy* zot *management plan*, zot pour get bann *post* ki nepli relevan aköz modernite.

Yer lo mon ti fer *press conference* yer e ti lo *SBC* ek li radyo bomaten, mon ti pe eksplike lo nou *management information system* ki nou'n mete dan por.

Nou'n dir ek tou sa bann *clearing agents*, ki i annan 141 zot ou nepli bezwen ranpli bann form mannyel.

Ou nepli bezwen al kot *Customs*, al vot *VAT*, al kot *SCR*, al kot *Mahe Shipping* al *Kot*

*Land Marine* apre vin kot por avek 7 form ki ou'n ranpli.

Ou pa bezwen anvoy en drayver ouswa ou travayer 7 landrwa *Victorya* - zis ranpli ou bann form *online*.

Alor ki mon pe dir, avek modernite e avek teknolozi ki pe *involve* toultan i annan bann travay ki ganny fer *redundant* e i annan bann nouvo travay ki ganny kree e sa landrwa i vin bokou pli efikas. Sa toultan pour arive. E dan nou sistenm *Gouvernman* i annan bann *checks and balances*.

*SPTC management* pa fer desizyon li menm, i anmenn devan *Board*. *Board* i kapab konsilte son *parent ministry*.

*Parent ministry* si i tonm dakor e tou keksoz i bezwen bouz devan, i al devan *Minister Lanplwa*. E nou bezwen *trust* i annan konfyans ek konfidans dan tou sa bann zofisye.

Nou bezwen aret anmenn politik dan tou sa bann desizyon silvouple. I annan en prosis e sa pe ganny respekte e se koumsa ki nou pou bouz devan. Mersi Mr Speaker.

**(APPLAUSE)**

**MR SPEAKER**

Mersi. Onorab Pillay, ou bann kestyon i pa en demann pour lenformasyon, i zis en

loportinite pour fer alegasyon e pour dir Minis, ki sa ki i pe mal fer.

Donk, mon pour dir ou si ou annan en klarifikasyon ki en demann pour lenformasyon, mon permet ou fer li si non, nou pe termin sa sesyon kestyon. Lekel ou kestyon Onorab?

**HON SEBASTIEN PILLAY**

Mersi Mr Speaker. Swivan ou konsey mon le soumet avek ou 2 dokiman, premye se en *memo* ki ti ganny anvoye le 21 Me kot bann *staff* ki dir zot poudir zot pou ganny 3 mwan saler, zot *annual leave*, konpansasyon for *length of service* menm si zot pa'n fer 5 an, prorata *gratuity*, prorata 13 enm mwan. Apre mon annan en let sorti kot Lanplwa ki konsern *redundancy* travayer.

Kestyon ki mon annan pour Minis, Mr Speaker baze lo sa ki in dir nou, eski zot in anbet sa bann travayer pour pran sa *redundancy*, akoz bann travayer ki'n *challenge* sa *redundancy* in ganny zot *case* kot Lanplwa.

So alors eski Minis, li menm ki i dir li ki'n aprouve, eski li in aprouve pour sa ek sa bann travayer ki zot ti anvi fer ale, i ale o pli vit posibil, san ki sa bann dimoun i al ver sa bann

*competent* landrwa konpetan pour zot *challenge* sa desizyon ki *SPTC* ti pe fer anver zot? Mersi Mr Speaker.

**MR SPEAKER**

Mersi. Minis, en repons?

**MINISTER ANTONY DERJACQUES**

Mersi Mr Speaker. Mwan, mon annan respe pour pep Seselwa ek bann travayer.

Mon krwar e mon konnen ki ler zot fer desizyon pour zot aksepte en *package*, ouswa aksepte *redeployment* e reangazman dan *SPTC*, zot in fer sa avek zot lentelizans.

Mon pa *look down* lo okenn travayer e mon pa pran zot pour bann dimoun ki pa konpran, pa konn lir, pa konpran dan en diskisyon, pa konnen ki zot pe ganny konsilte lo la.

E pa kapab konpran ki avek sa *package* e avek *pairing* zot pe ganny en bon *deal*.

Mwan, mon rekonnet zot lentelizans. Mwan, mon annan sa konfor ki mon *trust* zot e mon toultan pour *trust* travayer ek pep Seselwa. Mersi.

**(APPLAUSE)**

**MR SPEAKER**

Mersi. Bon nou'n ariv a lafen sa sesyon kestyon mon remersye Minis, e son bann zofisye pour zot partisipasyon e mon swet zot bonn kontinyasyon e bon depar. Mersi.

An menm tan mon a demann madanm *Hansard* raporter pour apel lot Minis, pour kestyon.

Bonzour Minis pour Ledikasyon Dokter Valentin e egalman son bann zofisye Mr Bernard Arnephy Direkter Zeneral Pour *Support Services*, Mrs Gina Domingue Direkter Zeneral pour *Human Resources* e administrasyon e Mrs Marie Antoine Bethew, Psikolog.

Mersi pour vin dan Lasanble, pour partisip sesyon kestyon bann Manm. Nou a konmans avek kestyon 171 Onorab Anne Bistoquet.

### **HON ANNE BISTOQUET**

Mersi Mr Speaker. Bonzour tou dimoun a lekout bonzour tou Manm Onorab, bonzour viziter dan galeri e bonzour *panel*.

Minis, mon kestyon i lir koumsa,

Eski Minis i kapab donn Lasanble statistik zanfan avek *special needs* dan lekol piblik e osi enform Lasanble si son Minister i annan okenn plan entrodwir bann laklas spesyal

pour sa group zanfan dan zot lekol respektiv? Mersi.

### **MR SPEAKER**

Mersi Onorab. Minis, ou repons.

### **MINISTER JUSTIN VALENTIN**

Mersi Mr Speaker. Bonzour Mr Speaker, bonzour *Leader* zafer Gouvernman dan Lasanble, bonzour *Leader* Lopozisyon e bonzour tou bann Manm Onorab.

Mr Speaker, mon aprann osi ki annan bann etidyan dan galeri anler; bonzour bann etidyan e byensir bonzour tou bann dimoun ki pe ekout nou dan diferan fason.

Mr Speaker, sa tenm *special needs* dan ledikasyon, i vreman larz pour nou kapab anmenn en serten klarite dan bann diskisyon.

Nou'n diviz li an diferan kategori e mon ti a kontan prezant bann *statistics*. Bann terminoloji ki nou servi an Angle alor mon pour reste lo son bann tenm lo bann terminoloji an Angle-parey nou servi, dan ledikasyon pour le moman.

*Attention deficit activity disorder* i annan 6 ka,

*Speech and language difficulties* - 740,

*Specific learning difficulties* i annan 1095,

*Autism spectrum disorder* i annan 113.

*Development delays* i annan 55,

*Hearing impairment* i annan 16,

*Visual impairment* i annan 20,

*Cognitive learning disability* i annan 129,

*Physical disability* i annan 65.

*Social and emotional behavior* i annan 215 e apre nou'n idantifye en etidyan konman en *high-flyer*. An tou i donn nou en total 2555 ka ki nou pe tret ki konman bann *special needs* dan ledikasyon an se moman.

An se ki konsern laklas spesyal dan bann lekòl, pour le moman nou pe travay avek en filozofi kot nou pa pou fer laklas spesyal. Me nou tret sak bann zanfan dan en konteks en sistenm enkliziv, a leksepsyon si son ka i vin ekstrenm, la i annan bann posibilite ki ganny konsidere pour li zwenn Lekòl Eksepsyonnel, kot byento ou anvi re sanz son non pour nou apel *Adaptive Learning Centre*. Mersi Mr Speaker.

### **MR SPEAKER**

Mersi Minis. Onorab Bistoquet, ou siplemanter?

### **HON ANNE BISTOQUET**

Mersi Minis, pour ou larepons e sif i vremen gro. Minis, anvi ki nou konnen sa i en size vremen sansib ki nou pa tro tann koz lo la e mon krwar in pli ki ler pour nou konmans adres sa, anvi ki sif ki ou'n donner, eski sa bann zanfan Minister zot war poudir sa bann zanfan i pe konpran kwa ki zot pe pas ladan?

Akoz i annan dan laklas i annan *teachers* ki mon koz avek, sa bann zanfan pa pe vremen kapab konpran e zot vin azite, zot pa *focus* byen. Eski ou Minister pe konsider mazin dan laliny pour kekfwa fer en *extracurricular* laklas, pour ki kapab donn zot sa sipor, pour zot konpran kwa ki zot pe pas ladan, poudir zot zanfan parey tou lezot zanfan?

Mon dezyenm kestyon, ki pwennvi ou Minister lo sa size bann zanfan ki vin dan laklas avek zot paran oubyen zot *carer* ki la avek zot toulezour. Mersi.

### **MR SPEAKER**

Mersi. Minis, ou repons *please*?

### **MINISTER JUSTIN VALENTIN**

Mersi Mr Speaker, an se ki konsern bann sipor ki bann

etidyan i gannyen, i annan bokou keksoz ki pe fer dan sistenm ledikasyon, pour fer ki nou kapab *deal* byen avek bann etidyan ki annan bann diferan kondisyon. E nou pour bezwen a sa pwen dir osi dir ki Minister Ledikasyon pa tousel dan sa prosesis.

I annan bann lezot lorganizasyon. Enn nou bann lorganizasyon prensipal se Minister Lasante, osi byen ki Departman Sosyal.

Nou travay etrwatman, pour fer sir ki bann zanfan kot ledikasyon nou pa kapab fer sa bann etidyan i ganny refer avek bann Spesyalis konsernen.

E la a sa pwen - i vre a sa pwen osi remersi bann diferan lorganizasyon ki asiste nou e menm osi bann lasosyasyon ki ganny formen, pour zot osi kapab zwe en rol pour apir Minister Ledikasyon dan sa demars.

Me selman an se ki konsern laklas spesyalize - konnen akoz letan ou get dizon par en nivo dan en lekòl i kapab dizon annan 1 etidyan, 2 etidyan dan en nivo.

Donk, pour ou fer en laklas spesyal dan en lekòl pour sa etidyan i ganny drwa pa byen pa efektiv. Donk, nou lefe ki lasosyete i enkliziv, sa bann

zanfan pli tar pou al viv dan en sosyete enkliziv. Donk, nou filozofi i dir avek nou annou tret sa zanfan, annou fer ki sa zanfan i aprann dan sa konteks enkliziv.

Dezyenm pwen an se ki konsern bann paran ki vin avek zot zanfan, nou osi mon ti a kontan koz en kou lo sa *statistics* osi akoz i enportan pour nou konsidere.

A ler aktyel dan *mainstream* dizon, i annan 106 etidyan ki *attend* lekòl avek en paran e sa i varye dan bann diferan lekòl.

I annan lekòl ki annan 1, i annan lekòl ki annan 3 - i varye e apre kot Lekòl Eksepsyonnel i annan 23 etidyan ki *attend* lekòl avek en paran.

Ideal nou ti a voudre kapab form bann ansenyan ouswa bann ankadrer spesyal, pour zot kapab zwe sa rol dan plas ki nou war paran i vin avek sa zanfan toulezour.

E letid osi ki pe diriz nou pour nou kapab al dan sa laliny fer formasyon, se akoz nou osi krwar ki en paran si toulezour, tou lazournen, se li ki ek sa zanfan i kontribye osi petet pour sa zanfan, dan en fason pa vin endepandan.

Donk sa ideal, me selman pour le moman nou napa ase sa

bann ankadrer donk mwayen ki nou pe servi e nou toler e nou esper bann paran ki vin avek son zanfan.

I annan ki vin avek en zournen antye i annan osi ki vin petet pour detrwa erdtan. Donk vwala ki nou kapab fer pour le moman.

Mr Speaker, mon pa ti a konnen si nou psikolog ki dan sa domenn, ki ava anvi dir en keksoz lo sa laliny.

**MR SPEAKER**

Byensir. Madanm, ou kapab azoute.

**PSYCHOLOGIST                      MARIE-ANTOINE BETHEW**

Ok. Bonzour Mr Speaker, e bonzour *a tous* dan sa laliny parey *Minister* in dir *carer* i pa sa sistenm ideal ki nou anvi i egziste dan nou lekol.

Nou ti ava voudre ki i annan bann *learner support assistant* me selman pour le moman nou napa sa kapasite, pour nou kapab anploy, oubyen ki bann dimoun ki'n ganny formen i la prezan dan nou lasosyete.

So nou pe travay etrwatman avek *SITE* pour nou kapab annan en program ki pour kapab ankadre sa bann dimoun, ki kekfwa ki *already* pe

fer *carer right now*, me selman zot pe fer sa louvraz byen, me selman zot bezwen sa formasyon ek sa *training*.

E osi nou annan tou le lannen bann *capacity building* ki nou fer pour sa bann *carers* ki dan nou lekol, so pour zot kapab fer zot louvraz oubyen fer sa sipor ki zot pe donn sa zanfan pli byen.

Pour bann zanfan zot menm ki annan bann diferan difikilte, i annan bann *SENCOs* bann *special needs educators* ki travay avek zot.

Swa pour fer zot konpran ki zot difikilte i ete swa pour fer laklas an zeneral konnen kwa ki difikilte sa zanfan i ete, e ki mannyer zot, zot kapab vin sa bon zanmi ouswa sipor pour sa zanfan.

Menm pour bann *teachers* depi zot formasyon kot *SITE*, zot gannyen sa bout kot ou kapab fer *differentiated learning*, so sa i pour bezwen ganny aplike dan laklas. E nou, nou pe ranforsi sa anmezir nou pe ale. Mersi.

**MR SPEAKER**

Mersi. Mersi Mrs Bethew. Kestyon Onorab Roucou.

**HON MICHEL ROUCOU**

Mersi Mr Speaker. Minis, si ou kapab dir nou, eski *Minister* in



fer en legzersis pour war poudir bann zanfan avek sa ki anba sa bann programm spesyal, si zot pe kapab *catch up* avek bann size ki annan dan laklas li menm li?

E osi si ou kapab dir nou eski tou lekol lo Mahe, Praslin ek La Digue ki annan bann zanfan ki annan sa *special need*. Mersi.

**MR SPEAKER**

Mersi. Minis?

**MINISTER JUSTIN VALENTIN**

Mersi Mr Speaker. Mr Speaker, wi, anefe Minister Ledikasyon e tim ki siport bann etidyan - sa *learners support team* ki siport bann etidyan avek bann *special needs*, zot fer en travay manifik.

En travay sepandan en pe konplike, akoz zot konnen letan en etidyan i annan bann diferan kondisyon, i pa fasil pour nou kapab siport li parey nou ti ava voudre.

Byensir i annan mankman kapasite, me sa ki nou kapab dir a sa pwen, se ki padan sa dernyen 2 an, nou'n fer en kantite progre.

Nou'n depans environ R4 milyon pour zisteman anmenn lekipman pour apir *special needs education* dan ledikasyon dan Sesel.

Wi, bann etidyan pa neserman tou ki pe aprann parey, byensir pa tou ki pou aprann parey.

Me nou, nou lobzektif se pa kit zot deryer. Pa tou ki pour kapab fini sivre sa programm letid ki nou annan bann diferan nivo.

Me kantmenm nou donn zot sa *basic* - sa ki neser, pour zot kapab evantelman zot osi progrese e viv dan en konteks normal.

Wi, dan nou lekol i annan etidyan avek *special needs*. Mersi Mr Speaker.

**MR SPEAKER**

Mersi Minis. Onorab Sandy Arissol ou kestyon.

**HON SANDY ARRISOL**

Mersi Mr Speaker. Bonzour Minis, avek ou lekip, bonzour bann zanfan ki dan galeri e tou bann ansenyan etidyan ki pe ekout nou.

Mr Speaker, mon anvi demann Minis, 2 pti kestyon an relasyon nou tou nou konnen poudir parey ou'n dir Minis, dan bann laklas nou annan sa bann zanfan e nou annan osi bann ansenyan ki travay avek zot.

Mon ti a kontan demann nou, parske mon anvi ki ou

reasir bann paran deor ki pe ekout nou, poudir letan son zanfan i lekol avek enn ki en pe mwen kapab parey li, ki li i pa pe perdi dan laklas parske Mis pe donn plis latansyon sa enn ki pli mwen kapab - pour mwan kapab eksplik mon kestyon.

Alor ki mon ti a kontan demann ou Minis, eski letan bann *teachers* i ganny anvoy zot *training SITE*, par egzanp, eski ou pe dir ek nou poudir tou *teachers* i ganny sa bout *training lo special needs*? Mon premye kestyon;- pour li kapab donn sipor sa zanfan dan sa laklas parmi tou lezot zanfan ki pa bezwen sa *special need*. Sa mon premye kestyon.

Mon dezyenm kestyon ki mon ti a kontan demann ou, mon'n tann ou taler ki letan zot pe swiv sa zanfan dan bann lekol normal par egzanp, i pour ariv sa pwen kot zot kapab osi diskite ki i ganny transfer dan Lekol Eksepsyonnel?

Be mon ti a kontan demann ou, si i ariv en ka kot sa paran li i ensiste, ki non, mon pa anvil mon zanfan i pran sa lot letap, be mon ti a kontan mon zanfan i kontinyen la kot mwan, mon kontan li ete, ki arive? Mersi Mr Speaker.

### **MR SPEAKER**

Mersi Onorab. Minis, wi?

### **MINISTER JUSTIN VALENTIN**

Mersi Mr Speaker. Mr Speaker, mon ti a kontan ki nou psikolog i eksplik sa prosedir pour fer li byen kler. Mersi Mr Speaker.

### **MR SPEAKER**

Mersi. Mrs Bethew, ou annan laparol.

### **PSYCHOLOGIST                      MARIE-ANTOINE BETHEW**

Mersi. Letan en zanfan i ganny idantifye avek en bezwen spesyal dan lekol par son *teacher*, premyerman ki avek li, i pour annan en tim ki pour bezwen travay avek li ki nou apel li bann *special needs support team*.

Si sa zanfan son bezwen nou vwar ki i pa pe kapab *cope* dan en laklas, pe asize, kekfwal i pe *disturb* laklas oubyen lezot keksoz, definitivman letan zot ganny anvoye kot nou *Learner Support Services* pour nou kapab fer bann diferan *assessment* pour sa bann zanfan.

E vwala kot nou, nou pour donn diferan rekomandasyon ki kapab enkli ki en dimoun i vin akonpanyi li, oubyen i bezwen en *apparatus*, oubyen en provizyon spesifik pour sa

zanfan, pour li kapab adapte dan sa lekol.

Oubyen son program letid i bezwen ganny sanze, swa kekfwa i pour bezwen vin mwens zour lekol oubyen lanmwatye zour lekol, diferan dapre bezwen sa zanfan.

So pour nou fer sir ki lanvironnman lekol i kontinyelman - laklas son lanvironnman i kontinyelman bouze e tou zanfan i aprann, e zot aprann byen. Menm en lot keksoz ki *Minister* in dir se ki depi lannen pase ek sa lannen, i annan bokou resours ki'n antre, bann resours *special needs*.

Ki nou pe fer se ki zis parey dan bann lekol i annan en *home economics room*, i annan en *IT room* la nou annan bann *specialist room*.

Si sa zanfan pe santi *overwhelmed* dan sa laklas kot i ete, i kapab ganny retire pour 30 minit, 1 erdtan, ganny sa sans pour li kapab *refresh*, oubyen pour li kapab repoze. E apre ler in santi li pli byen, i kapab retourn dan son lekol.

So i annan diferan sistenm, oubyen fason ki nou fer li, pour zot kapab adapte dan nou bann lekol.

Si mon pran pour kestyon ki si sa paran i pe refize apre ki

*assessment* - toultan i annan en sistenm *assessment* avan ler en zanfan i al Lekol Eksepsyonnèl. I pa en keksoz direk ki zis ou dir mon anvi al Lekol Eksepsyonnèl, non. I annan en *assessment* ki ganny fer avek nou *psychologist*. So la determinasyon avek tou lenformasyon ki nou anmase avek nou *partners from* lasante, Dokter, lekol, e ansanm avek sa paran nou pran en desizyon.

Si sa paran pa ankor pare, ankor provizyon i ganny fer kot son lekol kot i ete, pour li kapab adapte. E kekfwa pli tar, i kapab nide i sanze me selman i en *process* ki ou bezwen travay avek sa paran. I pa en keksoz ki nou forse, me osi i pa en keksoz ki nou pe ankouraze *right away*.

Pour al Lekol Eksepsyonnèl, si non nou anvi ki nou konmans *mainstream*, me si pa pe kapab aprezan rod lot provizyon pour zot. Mersi.

### **MR SPEAKER**

Mersi. Mersi Madanm. Onorab Pillay, ou kestyon... Minis, i le azout keksoz wi, Minis?

### **MINISTER JUSTIN VALENTIN**

Mersi Mr Speaker. Akoz premye kestyon pa'n reponn; kestyon sa enn pour mwan.

Kestyon ki pe demande si tou ansenyan i annan en konponan *special needs* dan zot *training*? Wi, i annan sa, be selman i annan.

I pa neserman spesyalize. Parey i annan serten keksoz spesyalize pa aparet dan sa bann *training*. Par egzanzp dizon pour neserman travay ek bann etidyan ki pa kapab, ki pa lir ki pa tandé, ki sourd dizon. I napa sa dan son program.

Me ki annan plito, i annan bann *learning difficulties* - bann etidyan ki annan bann *learning difficulties* sa konponan i for.

E dan bann sak bann lekol osi, i annan sa ki nou apel bann *SENCOs*.

*SENCOs* se bann *special needs coordinator* zot, zot en group dimoun ki pas dan bann diferan laklas e zot idantifye bann etidyan ki bezwen en pti pe plis latansyon.

E a sa pwen zot retir li dan laklas, zot kapab retir li dan laklas fer bann pti travay spesifik avek zot e apre li tar zot re ganny entegre dan laklas normal. Donk, i annan sa mouvman koumsa dan sa bann lekol. Mersi.

### **MR SPEAKER**

Mersi Minis. Wi, Onorab Pillay, ou kestyon.

### **HON SEBASTIEN PILLAY**

Mersi Mr Speaker. Mr Speaker, baze lo bann statistik i annan apepre - dernyen fwa mon statistik ki mon ti annan ki annan apepre 16 mil etidyan dan bann lekol ki *enroll* dan lekol.

E savedir nou pe koz 2555 ladan i annan problem *special needs* e ladan zis enn ki en *high-flyer* petet Minis, i konnen kot mon pe ale.

Eski nou statistik an sa ki konsern nou'n koz lo bann etidyan ki annan serten problem, ki laprantisaz i bezwen ganny adapte pour zot. Me osi i annan sa enn ki kapab al bokou pli lwen, ki laprantisaz i bezwen ganny adapte pour li.

Si nou idantifye zis enn, eski i annan problem avek nou kapasite pour idantifye bann etidyan dan bann diferan lekol ki bann *high-flyers*?

E lo ki nivo ou bann statistik ki ou'n mansyonn avek nou, sa 2500 i sorti. Par egzanzp si nou pran segonder nou konnen poudir segonder *across* sak *level* i annan apepre 1500 so nou pe koz apepre 7500.

Akoz i annan apepre 5 *level across* bann diferan lekol.

Eski sa bann statistik i predominaman sorti dan lekol primer? Oubyen i en *mix* of tou lede?

E sa *high-flyer* kote nou idantifye li, si nou idantifye li dan primer oubyen dan segonder? Mersi Mr Speaker.

**MR SPEAKER**

Mersi. Minis.

**MINISTER JUSTIN VALENTIN**

Mersi Mr Speaker. Mon konnen psikolog pour le azoute apre sa. Me sa statistik ki nou'n prezante i en statistik an zeneral. Byensir nou kapab fer li ant primer a segonder diferan pour donn detay.

Mr Speaker, wi mon osi ler mon'n ganny prezante sa bann *statistics* mon'n osi konsernen pour war ki dan en sistenm ledikasyon, ou pe war zis en etidyan ki pe ganny pour le moman, ganny idantifye konman *high-flyer*.

E mon'n poz sa keston. Larepons ki mon'n gannyen laplipar di tan latansyon i mete lo bann difikilte, lo plis difikilte ki lo sa group ki kapab bann *high-flyers*.

Alors enn, nou pa neserman - pa zis mwan, nou pa neserman krwar ki annan zis enn, me nou krwar i for

latansyon pe ganny mete bokou plis anba e sa i enportan - bokou plis anba.

Me apre osi ki tant nou osi pour nou krwar petet sa enn la, i pa neserman pa vre, akoz letan ou pour get rezilta final dan legzanmen final.

Par egzanp ler mon dir final mon, mon pour get *IGCSE*, mon pour get *A Level*, ou tant pou war 1 ou 2 sa bann etidyan ki pour ganny sa bann *straight A's*.

Donk, sa ki nou pe war anba pour le moman i pli zou mwen i reflekte larealite. Mersi Mr Speaker.

**MR SPEAKER**

Mersi. Ou ti pe envit psikolog pour azoute oubyen nou'n terminen? bon nou a kontinyen.

Onorab Zialor, ou keston?

**HON NADDY ZIALOR**

Mersi Mr Speaker. Bonzour Minis, avek ou lekip. *Minister* en pe letan pase ou ti fer re sorti ki Minister i annan nide pour fer bann *inclusive centre* atraver bann diferan lekol, pour *pilot* en proze.

Eski a ler aktyel la ou kapab donn nou en kon tradwir lo ki zistans sa in arive?

Dezyenmman, ou'n koz bokou lo bann *carers* ki dan lekòl avek zot zanfan, eski Minister dan son plan pour promot *inclusivite* baze lo statistik ki ou'n donnen, i annan en plan lonterm pour travay avek *Home Care Agency* pour ki sa bann *carers* zot ganny transformen konman sa *learning support material* ki zot bezwen dan lekòl, pour asiste bann *teachers* an sa ki konsern sa group etidyan? Mersi.

**MR SPEAKER**

Mersi Onorab. Minis?

**MINISTER JUSTIN VALENTIN**

Mersi Mr Speaker. Mr Speaker, mon pour entrodwir sa larepons apre Madanm Bethew pour pous en pe pli devan.

Nou reste krwar dan *inclusive education*, akòz parey mon pe dir letan ou get li o nivo laklas, o nivo laklas, ouswa o nivo *level* dizon dan en lekòl dan P6 i pa pour fezab pour re fer en laklas spesyal dizon, akòz ou kapab war ou pe *deal* avek 3 ou 4 etidyan ka spesyal.

Me o plito kit sa etidyan dan son laklas aktyel e ou donn li son bann lentervansyon ki nesese dan sa laklas.

E sanmenm sa ki enportan ki nou bann

ansenyant letan zot pe fer bann formasyon, zot kapab konpran ki mannyer pour kapab a en moman dan zot leson, donn en pe latansyon spesifik bann etidyan ki bezwen led.

An sa ki konsern *carers* ou konnen sa konversasyon *inclusive education* fer bann laklas bann leson vin enkliziv i en prosesis.

Nou'n konmans avek en letap. Nou'n fer ki dan de lekòl enn primer, enn segonder, Plaisance Segonder avek Au Cap vin sa lekòl enkliziv zisteman akòz 1) i problemm resours e 2) i problemm lafors travay imen.

Donk, nou ti anvi sa i ti nou lentere dezir si dizon bann paran ki annan bann zanfan dizon avek bann kondisyon - nou met zot dan Lekòl Segonder Plaisance kot tou bann etidyan dizon i kapab ansanm pe ganny sa latansyon.

Me nou war i pa realite, akòz? Akòz i annan paran ki ler son zanfan dizon i konmans lekòl en serten lekòl i pe le bouz son zanfan, i le son zanfan reste lanmenm la.

Donk, sa i fer en pe konplikasyon, me selman nou, nou war sa i en prosesis akòz i menm, i menm en keksoz ki lo nivo lekòl.

Nou pe osi fer bann *teachers* konpran ki nou ti sey fer e fer zot aksepté. Akoz menm o nivo lekòl annou pa kasyet.

Menm o nivo lekòl pa tou ansenyan ki krwar dan sa prosedir. I annan ki krwar non, non, non i pa devret dan mon laklas met li apar, met li apar a tou pri.

Be nou, nou bezwen pe ed bann dimoun konpran ki nou pe sey fer e fer zot konpran, akoz nou filozofi se ki lemond an deor i en lemond enkliziv.

Akoz ki la kot lekòl ou bezwen separe? Sa i sa premye keston. E nou bezwen fer zot konpran poudir laprantisaz i par letap, i par letap.

I annan ki pour ganny sa ozordi, i annan ki pour ganny li pli tar, i pa vèdir ki i pa pour ganny ditou.

Plito ou les li apar nan natirel ki fors li fer bann keksoz petet ki i pour pli destriktif.

Donk, i annan plizyer largiman me selman byensir nou bezwen annan en desizyon e bouz dan en direksyon. Sa i sa direksyon ki nou pe bouz dan en direksyon, sa ki sa direksyon ki nou pe bouz avek pour le moman.

E ki bann dimoun ki pe fer sa proze zot pe osi analize,

reflesir e adapte aziste anmezir ki nou bouze dan sa prosesis.

Dernyen keston mon krwar ti lo paran, non?

### **MR SPEAKER**

Mon krwar lo, plito ti lo *home care - carer* mon krwar si mon pa tronpe.

Si zot pour kapab vin sa bann ed spesyalize.

### **MINISTER JUSTIN VALENTIN**

Wi. Mr Speaker, nou *Human Resource Director* i anvi koz lo *recruitment of carer*.

### **MR SPEAKER**

Mersi.

### **DG HUMAN RESOURCE AND ADMINISTRATION      GINA DOMINGUE**

Mersi Mr Speaker. Bonzour tou dimoun. Mon krwar keston Onorab, i fors mwan pour mon fer en pwen.

Akoz ki pe arive an se moman, rekritman sa bann *carer* pe ganny fer by *Home Care Agency* avek sa paran e pour nou sa i poz serten defi.

Akoz i koz serten defi? Akoz bokou sa bann *carer* mon salye zot pour zot louvraz, me selman, zot bann *carers* konmsi konpran mwan.

Zot pe *care for the child* ; *care* an term son fason fizik, me nou, nou anvi pour sa bann zanfan la, nou anvi travay ek *home care* dan *recruitment* sa bann *carer* nou osi. Nou anvi zwenn avek zot pour ki nou *recruit* bann *carer* ki annan en pti pe bagaz ledikasyon.

Ki li sa *carer* dan sa laklas la i kapab ed sa ansenyan, pour ed sa zanfan pour devlope dan son ledikasyon, olye zis pe dir li  
 “asize”,  
 “pa leve”,  
 “pa ale” *whatever* - bann pti keksoz koumsa.

So mon krwar la i en pwen ki nou bezwen nou al eksplore ansanm avek Minister konsernen, pour nou kapab ganny bann *carer* ki konpetan si ou le. Mersi.

### **MR SPEAKER**

Mersi. Mersi Madanm Domingue. Kestyon Onorab Naidu.

### **HON SATHYA NAIDU**

Mersi Mr Speaker. Bonzour Minis, ek ou delegasyon.

2550 ka i montre ki i annan en travay ki departman ledikasyon pe fer pour detekte bann marmay ki annan bann abilite ki diferan an konparezon ek en marmay ki normal.

E dan en lenstans ki ler bann ka in ganny detekte, ki kalite konversasyon eski zot pe tenir avek bann paran?

Akoz lekol i paret baze lo zefor ki Departman Ledikasyon pe mete, mon bezwen felisit zot *because I fully believe in inclusivity*. I montre ki 8 erdtan en marmay i pas dan en laklas ouswa dan en lekol, apre ou annan 16 erdtan an deor lekol pandan en zournen.

So alors ki kalite travay, ki kalite konversasyon eski zot pe tenir avek paran? Byensir sak lekol i pour varye dan bann lenteraksyon dan bann *Parents Teachers Meeting*.←

Kot zot pe osi sansibiliz bann paran, ki annan en posibilite ki zot zanfan pa pe tonm dan sa 2550, me posib ki son zanfan i kapab annan en kondisyon ki fer li spesyal e ki bezwen latansyon spesyal, pour li kapab nobou *attend* son lobzektif dan konteks laprantisaz? Mersi.

### **MR SPEAKER**

Mersi Onorab. Minis?

### **MINISTER JUSTIN VALENTIN**

Mr Speaker, mon pour les psikolog reponn sa kestyon, apre mon ava azoute an ka.



**MR SPEAKER**

Madanm?

**PSYCHOLOGIST MARIE-ANTOINE BETHEW**

Mersi. Bann paran zot osi, zot pe ganny *empowered* par nou bann *SENCOs from school*.

Me selman avan menm zot ariv lekòl bann zanfan zot ganny idantifye par Minister Lasante. E kot Minister Lasante nou annan diferan *partners* tel ki kot bann seksyon *pediatrician*, reabilitasyon, *be it occupational therapist, speech therapist*.

So i annan en kantite dimoun pe travay avek zot *already*, bann paran sirtou, ki zot ganny sa *one-to-one* - bokou konsey, bokou lentervansyon.

Menm si bokou paran pour dir ou i bezwen esper en bon pe letan pour zot kapab ganny sa servis, me selman letan sa servis i la pour donnen, i annan bann diferan travay i annan pour fer avek zot.

So menm avan ler zot ariv dan nou sistenm lekòl, i pour annan travay ki'n ganny fer avek zot.

I annan enn de zanfan zot gannyan manke akòz zot pa'n *attend* zot lapwentman, oubyen zot pa'n swiv bann devlopman avek Lasante.

Me selman *once* ki zot pou'n ariv kot lekòl, i pour annan swa zot *teachers*, swa *SENCO*, swa *deputies*. i pour annan diferan dimoun ki pour enterakte avek sa bann zanfan, ek sa bann paran pour kapab donn zot sa bagaz pour zot kapab *cope* avek zot zanfan. E pour kapab ed zot zanfan osi tou.

**MR SPEAKER**

Mersi. Minis?

**MINISTER JUSTIN VALENTIN**

Mersi Mr Speaker. Mr Speaker, apre sa ki mon anvi azoute lo sa pwèn e la mon osi donn sa lespwar bann paran, ki mon'n pas dan tou lekòl e dan bann laklas, kot i annan bann etidyan avek bann difikilte laprantisaz, mon'n zwenn zot tou. Bann ansennyan i sey tou zot mye, tou zot mye pour fer ki bann menm sa etidyan ki dizon i dan plis difikilte, i ganny en pe keksoz.

Donk, sa osi mon krwar i en zefor ki nou bezwen salye bann ansennyan. Laprantisaz -konteks laprantisaz i difisil, difisil, me mon war ki bann ansennyan pe fer bokou avek sa ki zot annan dan zot lanmen. Mersi Mr Speaker.

**MR SPEAKER**

Mersi. Onorab Uraine, ou kestyon?

**HON ROCKY URANIE**

Mersi Mr Speaker. Anvi ki kestyon i lo statistik, eski Minis, ou annan statistik pour lakres li menm, kantite zanfan *special needs* i annan primer *P1* ziska *P6* e apre segonder *S1* ziska *S5*?

E apre mon dezyenm kestyon, kantite zanfan dan lekol segonder ki ganny asiste avek en *carer* ki annan *special needs*, ki ganny asiste avek en *carer*? Mersi.

**MR SPEAKER**

Mersi. Minis?

**MINISTER JUSTIN VALENTIN**

Mersi Mr Speaker. Premye kestyon, nou napa pour lakres spesifik - sa ki nou'n konte i ant primer *P1* a *S5* sa *statistics* ki nou'n donner.

E apre dezyenm, kestyon bann etidyan ki vin lekol avek en *carer* - - sa kestyon

**HON ROCKY URANIE**

Dan segonder kantite ki ganny asiste avek en *carer* dan segonder?

**MINISTER JUSTIN VALENTIN**

I annan 12 dan segonder, i annan 86 dan primer. Mersi Mr Speaker.

**MR SPEAKER**

Mersi Minis. Onorab Hoareau, ou kestyon?

**HON JOHN HOAREAU**

Mersi Mr Speaker. Bonzour Minis, ek ou lekip. Minis, dan ou larepons ou'n fer resorti ki zot pe fer demars pour ganny lekipman, zisteman pour ranplas bann *carers* zisteman ki i en gro defi pour zot.

Mon ti a kontan si ou ti kapab konfirman pour Lasosyasyon *SABVI* sirtou bann ki annan bann *visual impairments*, si zot pe fer demars an se moman, pour kapab met en pe plis lekipman pour sa group dimoun ki annan sa bann kalite dezabilite e problemm laprantisaz osi? Mersi.

**MR SPEAKER**

Mersi Onorab. Minis?

**MINISTER JUSTIN VALENTIN**

Mersi Mr Speaker. Onorab, parey mon'n dir dan en bout mon lentervansyon boner sa dernyen 2 an nou'n depans omwen R4 milyon pour resours.

E sa resours i zisteman i premye fwa ki Ledikasyon in fer sa depans signifikan pour *special needs education*. E bann zanfan ki pa war kler zot osi zot in benefisyé. I annan bann lekipman ki annan pour zot. I menm annan zot *photocopy* ki zot kapab fer zot *braille* ki zot kapab servi.

E nou osi nou pe mazin bann lezot teknolozi ki nou kapab anmennen dan ledikasyon - pour benefis pa zis pour bann etidyan ki aveg, me osi pour bann etidyan dan bann lezot diferan konteks.

E parey mon dir, bann lasosyasyon zot travay vreman byen avek Minister Ledikasyon. Par egzanp Lasosyasyon Otizm i travay vreman byen, Lasosyasyon SABVI.

I annan lekol obor nou, i annan Lekol Sourd osi ki nou travay ansanm pour fer ki nou pa kit okenn etidyan deryer.

Mwan personnelman mon annan sa filozofi e mon ti a kontan en zour nou vwar sa dan Sesel en dizon en etidyan ki'n en avek en dezabilite, dizon en etidyan ki pa war kler, i kapab pas dan sistenm ledikasyon e kapab reisir avek en degre. E sa i annan partou.

Nou'n war Moris kot pe arive e nou ti a kontan sa osi i

arive Sesel e sanmenm sa pour nou ki nou pe dir en bann paran, fodre pa nou krwar letan en zanfan i ne ek en dezabilite, son laprantisaz i fini. Non, fodre pa nou krwar sa.

Akoz i annan bann lentelizans e lezot parti son lekor, ki kapab ganny manifeste pour li fer bann mervéy.

Mon krwar sa, i sa lespwar ki ozordi atraver sa kestyon nou anvi fer pase. Nou anvi fer pase ki bann etidyan malgre zot annan bann dezabilite, zot annan bann konpetans otremán ; bann konpetans otremán zot kapab ganny travay avek, pour zot i pa neserman pran menm kantite letan.

Me i a pran osi en serten kantite letan, pour zot kapab fer mervéy dan zot lavi. Mersi Mr Speaker.

### **MR SPEAKER**

Mersi. Mon a termin ek kestyon Onorab Loizeau.

### **HON NORBERT LOIZEAU**

Mersi Mr Speaker. Bonzour Minis, bonzour tou bann zanfan lekol Mont Fleuri. Mr Speaker, mon rekonnét mon fiy anler dan galeri ki'n vini ozordi.

Mr Speaker, mon anvi demann Minis, Minis, vi ki sa

bann zanfan ki nou pe koz lo la, la zot, zot *slow* zot en, zot pe en pe letan pour asimil leson.

Me nou trouve ler zot fer leson parfwa si en peryod *maths* i anviron 40 minit petet - konmsi apepre.

Me zot, zot pa ganny letan pour zot kapab asimil sa ki sa *teacher* pe fer e sirtou dan legzanmen sirtou.

Kot si legzanmen par egzant *maths* i 2 erdtan e zot pandan sa 2 erdtan zot pa'n fini, i pa vedir ki zot bet me zot *slow* pour zot sa, eski Minister pe travay dan en fason pour ki sirtou pandan legzanmen in kwi sot letan malgre bann marmay normal zot, zot in fini avan.

Me zot *increase* zot letan pour zot kapab fini zot legzanmen akoz sa in arive Praslin kot - mon pe lir en *text* - kot i annan en garson ki otreman kapab ki'n ganny 3 A's dan *maths*, *physics* avek angle, akoz? Son ser ti akonpany li en pti pe plis letan pour li kapab fini son leson.

### **MR SPEAKER**

Mersi Onorab. Minis?

### **MINISTER JUSTIN VALENTIN**

Mersi Mr Speaker. Mr Speaker, sa kekyon Onorab, i zisteman sa largiman ki nou pe servi

pour nou *re brand* Lekol Eksepsyonnèl anba sa terminoloji *Adaptive Learning Centre*.

Akoz nou anvi konman fer bann dimoun realize prezan la ledikasyon parfwa nou bezwen adapte li, nou bezwen adapte li pour nou ganny sa *outcome* ki nou anvi, nou bezwen adapte.

Adapte prosedir, adapte son fason ansennyen, adapte son fason evalye e sa pe ganny fer.

Par egzant dizon ki pa, ki son vizyon pa neserman byen zot *font* pour legzanmen, nou'n konmans konsidere pour nou fer li pli bel.

I annan osi petet bann etidyan ki sourd, i annan zot fason ganny egzaminen. I nepli tou etidyan i ganny egzaminen parey. Sa adapte i sa filozofi ki nou'n adopte e i a pe marse dan bokou sironstans.

### **MR SPEAKER**

Madanm Bethew.

### **PSYCHOLOGIST                      MARIE-ANTOINE BETHEW**

Zis pour azoute Minister Ledikasyon i annan en Polisi ki apel *Exam Access Arrangement*. Sa Polisi i permet tou zanfan ki kapab annan okenn difikilte pour zot kapab fer zot

legzanmen dan en fason adapte.

Swa zot pour ganny *extra time* si zot bezwen, swa zot pour ganny en dimoun pour lir avek zot si i nesese, swa en dimoun pou ekri zot larepons ki zot, zot pe donner.

Swa parey Minis, in dir *increase* zot font si i nesese, oubyen pour nou sanz sa bann papye pour fer li vin an *braille* si bann ki pa pe vwar kler.

So i pour annan en *assessment* ki ganny fer avan sa legzanmen i fer swa Legzanmen Nasyonal sirtou, oubyen nou *Cambridge Exam*, pour ou kapab ganny sa laprouvasyon pour ou kapab fer ou legzanmen diferan. Me selman nou anvi donn posibilite ki tou zanfan i ganny fer, sanmenm sa nou annan sa *exam access arrangement* ki ann egzistans e lannen pase nou ti annan bokou lekol ki ti servi li osi tou. Mersi.

### **MR SPEAKER**

Mersi Madanm Bethew. Nou a termin la pour sa kestyon e nou a pran en poz nou a repran 11 er 10.

Zot a remarke ki nou'n al en pe plis ki labitid lo sa, me selman i en size enteresan e mon santi nou annan ase letan

pour lezot kestyon apre nou a pran poz 11 er 10.

### **(BREAK)**

### **MR SPEAKER**

Nou a re pran lo kestyon. Kestyon 172 in ganny retire par Onorab Esparon an ankor avek *Standing Order* 37 paragaf 7 avek *notice* an ekri pour Clerk.

So nou pe retir li lo *Order Paper* nou a pran kestyon 173 e i dan non Onorab Esparon.

Onorab, ou kestyon.

### **HON REGINA ESPARON**

Mersi Mr Speaker. Bonzour Minis, ek ou delegasyon e tou dimoun a le kout.

Mr Speaker, kestyon i al koumsa;

Eski Minis i kapab dir Lasanble konbyen lekol ki annan mankman ansenyan an se moman e ki demars son Minister pe fer pou adres sa sityasyon? Mersi.

### **MR SPEAKER**

Mersi Onorab. Minis, ou repons?

### **MINISTER JUSTIN VALENTIN**

Mersi Mr Speaker. Mersi Onorab.

Mr Speaker, sa kestyon i donn mon sans ankor koz lo

lansennyman dan Sesel e mon espere ki atraver sa kestyon osi, nou pou kapab ozordi anmenn en lot konversasyon otour mankman ansenyan dan Sesel.

Tou lekol Mr Speaker, i annan en mankman ansenyan. Dan primer i mank an mwayenn 1 ou 2 ansenyan par lekol.

Me par kont dan lekol segonder i annan en mank an mwayenn, serten lekol i annan 5, e menm serten lekol i mank 9 *teacher*, 9 ansennyman dan diferan size.

Me sa ki enportan pour Lasanble konnen, se ki menm si i annan sa mank ansennyman, bann etidyan pa zanmen perdi.

Akoz lekol e menm Minister Ledikasyon, i fer bann provizyon. Par egzanp nou kontinyen ankouraz lekol kot ansennyman i kapab pran plis lo en baz kontinyel, epi zot kapab fer en klib.

Pour adres sa sityasyon, nou pe fer bann keksoz swivan; enn ;- nou annan en *Relief Scheme*, sa i kot bann ansennyman kalifye ki'n retire e i ankor for zot kapab retournen zot vin *teach* bann diferan size ki zot kapab.

I annan osi bann *Part Time Scheme*, kot nou war bann dimoun i vini, i fer bann size

dan bann diferan peryod e apre byensir zot kapab *claim*.

Nou osi nou kontinyen avek sa prosedir *recruitment* bann ansenyan *overseas*, menm si nou pa pe tro al ladan konmela.

Tou dernyerman nou'n osi annan en laprouvasyon *Job Enrichment Policy* ki *PSB* in fer - sa Polisi kot i permet en travayer kot i annan lafors, konpetans, e i annan osi bann leta adisyonnell pour li kapab pran bann pozisyon ki *vacant* dan bann lekol.

E le nou pe ankouraz osi nou dan Minister Ledikasyon, nou pe ankouraz nou bann zofisye dan *Headquarters* pou osi al dan bann lekol pour zwe sa rol.

E lo nivo Pti Anfans kot nou pa kapab pran *expatriate* par egzanp, *SITE* li, i fer sir ki i kontinyen *train* sirtou bann *teacher assistant* ki annan *IGCSE*, omwen 3 e la zot kapab antre e vin bann *teacher assistant*.

Vwala plizoumwenn Mr Speaker, lo sa premye kestyon inisyalyal sityasyon ansenyan dan lekol. Mersi.

### **MR SPEAKER**

Mersi Minis. Siplemanter Onorab Esparon.

**HON REGINA ESPARON**

Mersi Mr Speaker. Minis, eski ou kapab dir nou anviron konbyen *teachers* ki lo sa *Part Time scheme*?

E eski bann *teachers* ou bann *teacher assistant*, ki pe kouver plis ki en laklas, i ganny konsidere pour en *extra allowance* sirtou letan zot in kouver en serten kantite erdtan par semenn, si wi lo ki *rate*? mersi.

**MR SPEAKER**

Mersi. Minis, ou repons.

**MINISTER JUSTIN VALENTIN**

Mersi Mr Speaker Mon ti a kontan demann Direkter Zeneral pour Resours Imen pou reponn sa kestyon silvouple.

**MR SPEAKER**

Mersi Direkter.

**DG HUMAN RESOURCE AND ADMINISTRATION GINA DOMINGUE**

Mersi Minis. Mersi Mr Speaker. Pour le moman nou pa'n vin avek sa statistik kantite dimoun ki lo *part time* avek *relief* en?

Me selman nou kapab fer zot gannyen pli tar. Me selman sirtou lo kote *relief* nou annan

pa mal. Akoz *relief* li i sa *scheme* kot nou pran bann ansennyan - sa ansennyan ti kapab *in the past* i ti en *head teacher*.

So nou bann ki entereze ki ankor for, nou rebran zot pour zot kapab al *teach*. E nou annan pa mal zot an se moman la ki pe ed nou.

Lo kote ou kestyon lo *teacher assistant*, petet i enportan pou mon fer kler dan lepase - la mon pe koz en bon 5 an, 6 an, 7 an pase ki ti pe arive se ki Minister zot ti pran bann *teacher assistant* e bann *teacher assistant* ti ganny promosyon.

Zot ti ganny promosyon zot ti vin *teacher*, me nou'n vwar e *teacher assistant* ki pe ekout mwan petet i a konpran en pe, pour vin en *teacher* i annan en kriter e nou pa kapab bes sa kriter akoz la nou pe koz ledikasyon zanfan la i serye. So *teacher assistant* ou pa kapab vin en *teacher* demen.

I tout annan en *training* ki ou bezwen swiv, ou ganny ou *Diploma* apre la ou vin en *teacher*.

So me selman nou osi konsyan avek ou kestyon, ki i annan lekol ki pe servi zot *teacher assistant* akoz zot pe vwar poudir sa dimoun i annan en pti pe kalib.

So sa *teacher assistant* petet i annan zour dan en semenn ki li i pe pas sa letan li tousel dan en laklas.

Dan sa ka la, ler i koumsa i pa permanan i tanporer, nou demann bann *head teachers* pour zot petet regarde si sa travayer pe fer an plis, sa travayer i kapab *claim*.

Sa travayer i kapab ranpli son *claim form* ki gannyen sinyen par son *head teacher* i ganny anvoye kot nou e i ganny peye.

Par kont nou annan bann *teacher assistant* li, li sa bann i en pti pe permanan si ou oule ; setadir li nou'n met li dan laklas zisteman aköz sa mank.

Me selman i pe ganny *mentor* par sa *ECC*; par sa *Early Childhood Coordinator*; sa *Early Childhood Coordinator* i avek li dan laklas i kit en *file* lo li.

Zot sa bann ki en pe permanan la, zot ganny en *allowance* mil roudi zot pour sa letan ki zot pe fer dan laklas. Mersi Mr Speaker.

### **MR SPEAKER**

Mersi. En klarifikasyon...

### **HON REGINA ESPARON**

Mr Speaker, en pti klarifikasyon letan ou'n dir poudir zot kapab

*claim* sa ki an plis lo ki *rate* zot *claim*?

Kwa ki, konmsi *what is the basic* ki ou dir se pa tan erdtan ver tan, tan erdtan. Sa ki de koul par lao sa i *claim*. Konmsi *what is the...?* Apre ki son *rate* ki i *claim* lo la?

### **MR SPEAKER**

Mersi Onorab. *DG* ou annan repons.

### **PSYCHOLOGIST MARIE-ANTOINE BETHEW**

Mersi Onorab, i R180 par 110 par erdtan *sorry DG* pe... aköz i pas kot *DG* apre ki i vin kot mwan.

I R110 par erdtan e pour le moman nou bann peryod lekol dan primer in sanze, i nepli 40 minit i par erdtan. So i fer li fasil pou zot kapab *claim*.

### **MR SPEAKER**

Mersi. Onorab William ou kestyon.

### **HON WAVEN WILLIAM**

Mersi Mr Speaker. Bonzour Minis, avek ou delegasyon. Minis, eski par egzanp letan ou pe koz bann mankman ansennyen dan lekol primer e segonder. Epi kot i konsern bann size ki konsekan parey matematik, lasyans, bioloji



ensidswit, ki nou santi poudir nivo i ankor ase ba, eski sa bann *Relief Scheme* ouswa ranplasan bann *teachers* ki pe vin donn sa bann transfer sa bann laprantisaz, eski ou pe dir nou ki sa bann mankman pou ganny adrese?

Akoz nou santi poudir par egzantp matematik parey mon'n dir bioloji, *physics*, se bann size ki vreman enportan.

Eski lokalman nou'n fer sa letid pou vwar poudir eski sa ki nou annan, nou pou kapab satisfere bann etidyan lekol?

Ouswa nou annan en plan ase pli konpreansiv pour adres sa mankman? Mersi.

### **MR SPEAKER**

Mersi Onorab. Minis?

### **MINISTER JUSTIN VALENTIN**

Mersi Mr Speaker. Mr Speaker, lo sa ki mon anv'i fer pase la a sa pwen ant nivo primer ek segonder, nou pa'n etablir e nou pa'n war poudir nivo lansennyman *or* nivo *attainment* i annan pour fer avek mankman *teacher*. Non.

Sa 2 keksoz i endepandan pour le moman. Wi, lo nivo *A Level* nou ti santi parey ti annan en size ki ti mank *teacher* pour en pe letan, e nou ti vwar dan rezilta final ki

manner sa ti enpakte lo rezilta final.

Donk, lo nivo *A Level* serten size e byensir si ou napa ansennyman la ou pour war poudir i pou annan en lefe lo laprantisaz.

Me selman sa ki osi nou anv'i e se pour sa ki petet sa kestyon i permet nou prezan anmenn lezot konversasyon dan sa *issue* mankman *teacher* dan Sesel.

Sa problem mankman *teachers* i pa zis en problem Sesel, i en problem iniversel, i en problem en bon pe pei partou. Menm bann pei pli devlope i mank *teachers* par egzantp.

E mon'n deza dir sa dan sa Lasanble, zisteman aköz pei dinamik i annan nouvo loportinite, dimoun i antre dan lot rol, i en lot rol.

Sesel par egzantp *teachers* kalifye i partou. Si ozordi nou dir tou *teachers* retourn dan lekol, kot zot ete retourn dan lekol, sistenm Sesel i ganny drwa kolaps aköz *teachers* i partou e zot pe fer bann mervay partou, partou. Aköz sa profesyon, sa *training* ki *teachers* i gannyen, i atrakte en bon pe profesyon, en bon pe lezot profesyon.

E osi nou'n war kot i annan en group *teachers* ki'n perform byen dan son lavi; le moman ki i annan li dizon enn son *past student* i vin en sef kelkonk, i rod li, i rod li pour li vin donn li lanmen degaz lasasen.

Donk, *teachers* i en lafors ki partou pe rode. Me nou, nou anv'i gete prezan ki mannyer sa lafors i reste dan ledikasyon pou osi fer mervay.

Me selman lefe ki nou pa kapab gard sa lafors, nou bezwen rode osi ki bann lezot alternativ.

Mr Speaker, Sanmdi ki fek pase, ti annan en aktivite enteresan, mon ti pran par dan... mon ti ganny envite avek distrik Mont Buxton.

E parmi ti annan bann profesyonnel ansennyan ek dimoun dan ledikasyon ti zwenn - Onorab Henrie, ti envit mon Mont Buxton pour mwan koz avek bann dimoun dan ledikasyon.

Pa neserman pe travay dan Minister Ledikasyon, me ki otour ledikasyon. E dan sa *meeting* rankont bann keksoz enteresan, zisteman ki nou kapab dir ozordi otour sa konversasyon.

Dabor nou bezwen rod mwayen pour ankouraz dimoun

-bann zenn pou antre dan ledikasyon e an menm tan bann ki la deza dan ledikasyon reste dan ledikasyon.

E enn bann keksoz enteresan par egzamp, bann dimoun ti dir be annou fer en rezolisyon - lefe ki ledikasyon i en priyorite, in vin en priyorite dan Sesel, sa lafoul ti....

*Well*, ti annan apepre 19 nou, 19 avek ankor 5 ki sorti dan ledikasyon, nou ti dir be si i en priyorite, akoz nou pa kapab petet anmenn serten bann linisyativ ki ava ankouraz ansennyan.

Par egzamp nou ti dir, si dizon lefe ki tou dimoun i bezwen en ansennyan dan lekol pour son zanf, alors dan bann bomaten dizon ler bann dimoun pou al kot klinik, bann ki annan kart ansennyan i pas avan.

Dan Labank olye en ansennyan pour pri dan en laliny 2 erdtan, ansennyan i kapab *jump the queue* konman en privelez.

I kapab annan osi bann *special scheme*, *Scheme Lakaz*, *Scheme Lasirans Spesyal* - sa i sa bann refleksyon ki sa group dimoun nou ti vin avek.

Petet sa i ava ankouraz;- enn bann *teachers* pou kapab reste dan sa profesyon.

Mankman *teachers* la fodre nou onnet Mr Speaker, akoz i annan bann lezot keksoz ki fer *teachers* dekouraze, i fer *teachers* fristre osi.

Letan i ganny otour li i annan koleg annandler, i annan koleg *teachers* ki pa ankourazan.

Zot menm zot pou malad plis entansyonnelman, zot pou al kot dantis tou le semenn, zot pa *care* ki zour zot al dan ki biro.

E prezan ki ou war? Ou war bann *teachers* ki'n vini pe travay i ganny dekouraze akoz i bezwen li prezan al kouver sa lot ki deside, deside i pa'n malad par natir li, in malad en malad forse ki li in rode imaziner, en malad imaziner sa i dezavantaz.

E nou osi annan bann *teachers* ki fer sa remark ki annan zot koleg, ki tou lazournen pe ganny bann konze par 5 zour, par 3 zour.

I vini ozordi semenn prosen i al konze ankor. Tousala i bann dinamiz ki fer sa mankman *teacher* vin en problenm prezan. E la ki ou war prezan, kot si to dimoun ti'n vini, wi i annan 3 *teachers* ki manke dan en lekol dizon.

Parey dan lekol primer i annan serten lekol i mank zis 1

*teacher* en term son lakantite ki i bezwen i mank zis 1. Me selman akoz sa ta labsans ki annan i fer prezan sa fenomenn vin grav - ou konpran mwan? So sa i sa bann konversasyon petet ki nou bezwen met lo latab.

Ki mannyer nou dekouraz *teachers* pran konze. Nou osi menm petet annan sa konversasyon ek serten lotorite pour fer osi ki petet *teachers* ou konnen.

Bann konze ki zot gannyen i neser, i fer sans e i pa vedir en labi, i pa reflekte en labi.

Me ledikasyon Mr Speaker, i bezwen sanze. Lekol i bezwen sanze Nou'n pri, nou'n pri dan en tradisyon 8 er 2 er edmi e mon pe depans lenerzi pou mwan tir osi Minister Ledikasyon dan sa tradisyon.

Pour nou aret fonksyon zis 8 er 2 er edmi, soley i ankor pe tape ant 2 er edmi a 5 er. E dimoun i kapab pe... ou konnen, ou kapab revwar, revwar ler travay, revwar kalite aktivite ki *teachers* i fer, ki kot lekol i fer.

Sa ta size - mon'n depans lenerzi osi pou mwan dir ek bann dimoun - sa ta size tou le semenn nou bezwen revwar sa osi. Nou bezwen revwar.

Onorab, in koz lo bann size konsekan, wi.

I annan bann size konsekan. Par egzanp resers ki in dir matematik, devlopman langaz, devlopman lasyans sa i sa *key subject*. E apre larestan i bann size konplemanter ki ou kapab fer li e pa nesese ki tou le zour, tou le semenn ou pe fer li.

Donk, sa osi i kapab redwir en pe lafors ankouraz plis bann *teachers* dan sistenm. E lot keksoz ki mon, mon krwar Sesel i en pti pei sa zafer en *teacher* en size dan lekol segonder i nepli fer sans, i nepli fer sans - en pti pei.

Donk tousala. E apre osi bann etidyan osi dan S4, S5 menm *A Level* pa fodre toulezour devan zot annan en *teacher*.

Nou bezwen kapab servi teknolozi. E sa lapros ki nou pe ale, nou servi teknolozi. E montre etidyan ki mannyer pour kapab servi teknolozi, ki mannyer pou kapab zot osi fer bann *independent study*, *independent learning* e sa i ava anmenn bokou, bokou plis rannman.

E an menm tan i ava tir presyon lo sa zafer mankman *teacher*, mankman *teacher*.

So mon pwen i senp pour annan mankman *teacher* pou en bon pe letan dan en pti pei menm dan gran pei.

Donk nou bezwen renouvle, renouvle lekol revwar mannyer nou fonksyonnen e sorti dan sa tradisyon ki nou'n pri. Mersi Mr Speaker.

### **MR SPEAKER**

Mersi Minis. Onorab Labonte, ou kestyon.

### **HON ANDY LABONTE**

Mersi Mr Speaker. Bonzour Minis, avek *panel*. Minis, mon vremen apresye. Mon war poudir ou vremen azour e ou pasyonnen about ledikasyon li menm li ki mon felisit ou Minister avek ou lekip.

So mon kestyon si ou le i vin en pe lo ler nou pe koz lo mankman *teacher* nou konnen poudir i annan bann bout spesyalize, oubyen i annan bann *teacher* ki *generalist*.

So ki kote vremen i annan plis problem, eski bann spesyalize oubyen bann *teacher* an zeneral?

Apre ler ou'n koz lo teknolozi, nou annan bann nouvo size ki par ler ki vini oubyen bann lezot keksoz ki vini parey *design and technology*, eski nou prepare

nou pare nou annan bann ansennyan pou kapab gid manm pou pou kapab fer byen dan sa bann tel size parey? Mersi.

**MR SPEAKER**

Mersi. Minis, ek *panel*, mon pour envit zot pour en pe direk e bref lo bann repons, mon ti a kontan pran ankor detrwa. E mon pe donn ankor 10 minit sa kestyon.

**DG HUMAN RESOURCE AND ADMINISTRATION GINA DOMINGUE**

Mersi Mr Speaker. Vitman kestyon Onorab, lo kote en pti pe *generalist* avek *specialist*.

Nou statistik i montre nou mankman i plis lo kote segonder kot bann dimoun i spesyalize.

E zis pour donn ou en pti lenformasyon, par egzanp size ki an se moman i mank nou plis ansenyan se Franse swivi par ~~larelizyon~~ Larelizyon. *Ok?* Li i annan plis en pti pe plis mank li apre larestan i desann en pe pli ba dan matematik e lezot.

**MR SPEAKER**

Mersi.

**MINISTER JUSTIN VALENTIN**

E pour dezyenm kestyon Mr Speaker, tou keksoz ki i annan mank an term konpetans, i annan provizyon konmela pour nou kapab ekip nou bann ansennyan pour zot ganny sa konpetans ki zot manke.

Sirtou dan bann size parey ou pe dir la, sekter *design and technology*. Mersi Mr Speaker.

**MR SPEAKER**

Mersi Minis. Onorab Monthy?

Onorab, mon annan en kantite kestyon devan mwan la. Onorab Monthy ou kestyon.

**HON PHILIP MONTHY**

Mersi Mr Speaker. Bonzour Minis, e ou delegasyon.

Mr Speaker, Minis, dan son repons detaye in in plizoumwen reponn mon kestyon, me selman kantmenm mon a sey demann ou sa.

Mon konnen sa problem *teachers* pa pou ganny *solve* dizour lanmen. Me selman lo kote *SITE* kwa ki pe ganny fer pour ki ler zot *recruit* sa lakantite etidyan ki ganny *recruit* i ogmante.

E zis an pasan, si ou kapab dir nou ki sitasyon i été, eski i stabilize la kantite ki *join SITE* ki sorti konman *graduates*?

Oubyen in desann, oubyen sityasyon pe vin pli *worse*? Mersi.

**MR SPEAKER**

Mersi. Minis?

**MINISTER FOR EDUCATION**  
**DR JUSTIN VALENTIN**

Mersi Mr Speaker. Mr Speaker, lo kote *recruitment* sa lannen, ti annan zis 5 etidyan ki ti pe kit S5 kit i decide pour swazir lansennyman konman son premye swa.

E apre ki bann etidyan in fini ganny plase partou, bann ki'n fer *appeal* nou'n kapab ganny ankor 5 a 6.

Sa pour komans bann program. Me ki nou pe fer nou pa pe les sa vin en problem *SITE*, nou pe fer sa vin en problem pour le moman, nou pe fer sa vin en problem ledikasyon.

E nou, nou pe donn osi - ou konnen i annan en kontradiksyon la an menm tan ki nou anvi *teachers* nou pe osi demann bann etidyan pou swazir zot bann karyer ki zot anvi.

Me selman tousala i en zafer resours imen pei. Nou anvi annan en *careers education* ki gid etidyan ver bezwen pei, sa ki nou anvi.

Akoz *otherwise* ki pou arive, tou dimoun pour sey rod sa metye son rev e nou per pangar ler nou rod metye ou rev, ler ou fini ou pa ganny sa travay ki ou merite.

Donk, nou anvi diriz ou ver bezwen pei e bezwen pei la i ansennyman. Alor ki nou pe fer nou e sa atraver enn keksoz ki in sorti - e sa nou pou en keksoz la mon kapab dir la boner e nou ti anvi lans sa kanpany osi ler nou fer *Teachers Day* sa lannen - mon kapab atraver la lans li osi la.

Kot nou pe demann bann *careers guidance teachers* target 5 etidyan. Dan sak lekol sa 11 lekol segonder sak enn target 5 etidyan pour vin ansennyman.

E si zot target sa 5 e la nou pour donn zot bann keksoz nou pour fer dan sa kanpany e nou espekte si sakenn i kapab vin ek 5, 5 x 11 deza nou kapab ganny en 55 ki antre, e la nou ava travay avek sa 55 pour fer zot reste.

E byensir Mr Speaker, nou bezwen met lo latib osi ki wi, lapey *teachers* i ba, i rekonnnet - konmsi nou pe sey nou mye la avek letan sityasyon pou al aranze.

Nou dan Ledikasyon, nou pour anmenn lo latib e sa

mon'n dir toultan dan Lasanble letan keksoz i vini, loportinite i prezante, nou pou argimante ;

Pour nou *teacher* nou pour argimante, pour nou *teachers* ganny en zoli sonm larzan, pour zot kapab osi reste dan sa profesyon - reste dan sa profesyon

I en profesyon nob ki tou dimoun i rekonnèt, en profesyon nob ki tou dimoun i rekonnèt alors mon pa krwar ki i pour annan bokou mangonnen, si *teachers* i ganny en pti pe plis ki lezot. Mersi Mr Speaker.

**MR SPEAKER**

Mersi Minis. Onorab Aglae, ou kestyon?

**HON EGBERT AGLAE**

Mersi Mr Speaker. Minis, mon kontan dan ou dernyen bout ou larepons ou'n tous sa size *package teachers*.

Minis, mon ti a kontan petet demann ou, eski petet zot pe mazin dan lankadreman *teaching* li menm la nou koz *teachers*, an menm tan i annan *assistant teachers*.

Petet nou ti a kontan konnen petet ki direksyon Minister pe mazin ale sirtou avek bann asistan *teachers* ki konmela, malgre ki zot pa pe

kalifye parey en *teacher*, me selman zot pe deservi pour kapab adres sa size mankman ou fir anmezir, nou ganny bann nouvo *teachers* ki pour *graduate* ki pou vini?

E osi Minis, mon ti a kontan petet demann ou baze lo balans, menm si ou re ganny bann nouvo *teachers* me ou annan *teachers* ki pe kite osi.

Ou'n nonm sa size *package* eski nou pour annan en deba nasyonal byento ki ava koz en pti gin lo size *package teachers*, akoz sa i montre bokou kad profesyonnel.

Sa ki *package* ki atrakte zot ki zot al ver sa dan bann lezot sekter sirtou, so eski nou kapab ganny en garanti pou annan en konversasyon lo la. Onorab Aglae ou kestyon?

**MR SPEAKER**

Mersi Onorab. Minis?

**MINISTER JUSTIN VALENTIN**

Mr Speaker, *DG* i le reponn premye bout, apre mon reponn dezyenm bout.

**MR SPEAKER**

Tre byen. *DG* ou annan laparol.

**DG HUMAN RESOURCE AND ADMINISTRATION      GINA DOMINGUE**

Mersi Mr Speaker. Mersi Onorab pou ou kestyon. *In fact* lo nou kote sirtou kot ki konsern program 3 ki konsern *Early Childhood*. *Early Childhood* i depi lakres ziske P2 li. Li nou pa kapab pran *expatriate* e li i enn bann landrwa kot nou annan sa dilenn bokou, akoz nou pa pe kapab war sa opsyon al rod *expat*.

So, *this is where* ki nou servi bokou nou bann *teacher assistant* pour nou *train* zot. Akoz? Akoz *entry requirement* pour en *teacher assistant*, se i bezwen annan *at least 3 IGCSE*.

So nou dir be si ou annan ou 3 *IGCSE*, petet ou ava al fer ankor 2 ek *SIDOL*, nou kapab ed ou ganny ankor 2 e nou fer zot rantre *SITE* and *this is what is happening right now*.

Se ki nou annan en gran group pe al *graduate* byento bann *teacher assistant*, ki pe al ganny zot Diplonm zot pe vin bann ansenyan kalifye.

E se sa metod ki mon krwar Minis, in nonmen pli boner dan bann stratezi. I osi enn bann stratezi ki nou pe servi ler nou ganny bann kandida pour *teacher assistant*, nou *train* zot byensir bann ki *trainable* - nou *train* zot pour zot

kapab vin bann ansenyan ki kalifye? Mersi Mr Speaker.

### **MR SPEAKER**

Mersi. Minis i kontinyen.

### **MINISTER JUSTIN VALENTIN**

Mr Speaker, pou reponn dezyennm bout kestyon Onorab, mon pour dir koumsa tro bokou letan lapey *teacher* in reste ba.

E la nou, nou *committed* pour aranz sa sityasyon ; konversasyon in konmanse. Ozordi par egzanp nou dan en milye en zoli deba ki pou konmans fer dimoun reflexir lo sa pozisyon ki nou anvi ale. Mersi Mr Speaker.

### **MR SPEAKER**

Mersi Minis. Onorab Romain?

### **HON GEORGES ROMAIN**

Mersi Mr Speaker. Mr Speaker, mon kapab dir mon kestyon in *more or less* reponn. Mersi.

### **MR SPEAKER**

Mersi. Onorab Porice?

### **HON DOYACE PORICE**

Mersi Mr Speaker. Bonzour Minis, ek ou delegasyon e tou bann koleg MNAs.

Minis, anvi ki i annan mankman *teachers*, eski ou Minister i annan en program



pou bann asistan *teachers*?  
Mersi.

**MR SPEAKER**

Minis, mon krwar sa keston in deza ganny adrese. Minis, eski ou annan okenn lot keksoz pour azoute?

**MINISTER FOR EDUCATION  
DR JUSTIN VALENTIN**

Non nou... ki mon anvi dir wi, nou annan en program enteresan pour asistan *teachers*. Mersi Mr Speaker.

**MR SPEAKER**

Mersi. Onorab Georges?

**HON BERNARD GEORGES**

Mersi Mr Speaker. Mr Speaker, mon keston pou Minis, se i senp.

Minis, eski ou angaz ou lekore ozordi devan sa Lasanble, pour sorti lo *same old, same old* e al dan en direksyon, ki pour fer ki Minister Ledikasyon bann *teachers*, bann ansennyan, bann lekol eksetera, pour kapab *achieve* sa standar ki nou pe rode?

Ou menm ou ou'n dir ki *teachers* fodre ganny valorize bokou *teachers* i pa pe *teach* ozordi.

Annefe dan sa Lasanble nou annan Speaker, nou annan

en Minis, ou e nou annan *Leader* Lopozisyon 3 dimoun ki'n *train* konman *teachers* e get kot zot in arive ozordi.

Mon keston se, eski ou pare, eski ou Minister - eski sa ladministrasyon i pare, pour met resours neser pour valoriz bann *teachers*?

Pour fer ki bann *teachers* pa pou en sekter en pti pe mal reprezante dan lasosyete, me ki zot vin bann pilye dan lasosyete, bann premye dimoun dan lasosyete ; par lao Avoka, par lao Arsitek, par lao Dokter - bann dimoun ki vreman neser pou fer pei bouze? Mersi.

**MR SPEAKER**

Mersi Onorab. Minis?

**MINISTER JUSTIN VALENTIN**

Mr Speaker, sa i mon rev. Mon konnen i osi rev mon bann koleg dan *Cabinet*, i osi rev mon bann koleg dan Minister Ledikasyon pou re donn *teachers* sa stati ki mon krwar zot devret annan.

Pour enn osi ankouraz dimoun pour zwenn sa profesyon e menm ankouraz dimoun ki'n ale pour troun dan sa profesyon.

Akoz mon krwar zanfan dan sa pei, etidyan dan sa pei, i

bezwen, i bezwen nou. Mersi Mr Speaker.

**MR SPEAKER**

Mersi. Mon bezwen termin la pour sa kestyon. Nou a pas lo prosen kestyon 174 dan non Onorab Rachel Spiro.

**HON RACHEL SPIRO**

Bonzour Mr Speaker. Bonzour Minis, avek nou delegasyon, bonzour tou koleg Onorab e osi manm piblik ki a le kout, kestyon i koumsa.

Eski Minis i kapab enform sa Lasanble si Minister Ledikasyon in revwar son Polisi lo servi fasilite dan bann lekol pou bann miting politik? mersi.

**MR SPEAKER**

Mersi Onorab. Minis?

**MINISTER JUSTIN VALENTIN**

Mersi Mr Speaker. Mr Speaker, wi Minister Ledikasyon in revwar son Polisi lo servi fasilite bann lekol pour fer bann miting politik.

Ti annan en Polisi date 2012 dan ki Minister Ledikasyon pa ti otorize pou servi lekol pour bann miting politik.

Me malgre sa nou'n war poudir an pratik sa pa'n neserman ganny met an fors

*à la lettre* e nou'n war bokou parti politik in demande pour servi bann fasilite.

Par egzantp laplenn, la salamanze kot pour bann lekol plizyer politik in fer sa demann ek Minister Ledikasyon e Minister Ledikasyon in donner.

Nou'n vwar sa ki enteresan se ki bann parti politik ki'n servi sa bann fasilite zot in fer sa byen, pa'n annan okenn bann destriksyon zot in byen servi bann byen Minister Ledikasyon.

E parey tou bann lezot lorganizasyon ki pret bann fasilite nou'n dir «be i apropiye si en parti politik i demann pret nou fasilite » alors dan sa pwennvi kot nou pare pou ede donk nou ede. Mersi Mr Speaker.

**MR SPEAKER**

Mersi Minis. Siplemanter Onorab Spiro?

**HON RACHEL SPIRO**

Mersi Minis, pour larepons. Bann demann i vini, mon ti a kontan konnen, kan eski sa revizyon in vin an fors e ki bann fason fer.

Savedir ki mannyer ou pou *go about* pour ganny akse avek sa bann fasilite? Si i annan en pri atase avek? Mersi.

**MR SPEAKER**

Mersi. Minis?

**MINISTER JUSTIN VALENTIN**

Mersi Mr Speaker. Mr Speaker, parey mon pe dir ofe anmezir bann demann i vini, bann demann i vini e sa menm avan mon ti vini.

Menm demann i vini nou prete e pour le moman napa en kou ki pe atase avek sa. Me selman annandler i annan bann parti politik bann group pa zis parti politik i annan bann group ki servi fasilite Minister Ledikasyon, zot donn sa lekol kot zot in fer en pti *deal*.

Pour zot kapab pey zot elektrik ouswa zot kouran; elektrik, delo bann fasilite ki zot in servi. Sa i annan.

**MR SPEAKER**

Mersi. *Ok* nou a kontinyen... ou annan en klarifikasyon silvouple... vitman.

**HON RACHEL SPIRO**

Pa'n reponn mon kestyon, aköz mon'n demande kan ki in revwar Polisi e si sa revizyon in ganny fer.

Konmsi nou bezwen met en pri - kapab espekte en pti kontribisyon nou bezwen kler pour tou parti politik konnen ki

striktir nou servi, pour nou kapab *access* sa bann fasilite. Mersi.

**MR SPEAKER**

Lo pri mon krwar Minis, in dir napa *cost*, me lo kan sa ti ganny revize Minis, si ou annan en repons avan nou bouze.

**MINISTER JUSTIN VALENTIN**

Mr Speaker, depi 2022 letan bann dimoun pe demann nou pour servi bann fasilite. nou pe prete. Mersi.

**MR SPEAKER**

Mersi. Onorab Henrie, ou kestyon.

**HON GERVAIS HENRIE**

Mersi Mr Speaker. Bonzour tou dimoun, *welcome panel* dan Lasanble.

Mon premye kestyon, eski Minis, i kapab konfirman ki par lefet ki tou le 5 an en kantite lekol i ganny servi pou eleksyon pei.

Sa in enn bann fakter ki in montre poudir bann fasilite i kapab ganny servi dan en fason annord e respektab, par bann lezot groupman? Mon premye kestyon.

Mon dezyenm kestyon, eski par lefet ki bokou sa bann desizyon pou aprouv lutilizasyon

ouswa non i ganny fer bann *head teacher* sa lekol, eski sa i ede avek sa kestyon lotonomi pou bann direkter lekol pran bann desizyon lo nivo lokal. Mersi.

**MR SPEAKER**

Mersi Onorab. Minis?

**MINISTER JUSTIN VALENTIN**

Mersi Mr Speaker. Mr Speaker, zisteman sa ki arive lamazorite bann lorganizasyon ki anvi servi fasilite lekol, i annan ki apros *PS* par egzantp direktman.

I annan ki apros menm Minis, direktman, i annan osi ki al kot lekol me mon tou kou nou dir aköz lekol ki konnen ki annan pandan sa peryod letan ki sa bann keksoz, sa demann pe ganny fer.

Alors bann lekol i fer zot desizyon baze byensir lo sa lotonomi ki zot pe gannyen, zot fer zot desizyon pour donner.

Me nou parey nou'n dir nou ankouraz lekol pour donn bann fasilite, bann diferan lorganizasyon pa zis bann parti politik.

Me bann diferan lorganizasyon ki anvi fer zot bann aktivite, me tout an prenan kont ki zot bezwen respekte propriyete lekol, pa

lekol Gouvernman. E zot servi li byen. E pour le moman mazorite pe servi li tre byen Mr Speaker.

**MR SPEAKER**

Mersi Minis. Onorab Vidot, ou kestyon.

**HON AUDREY VIDOT**

Mersi Mr Speaker. Mon kestyon pou Minis,

Minis, prenon kont ki ou'n dir i annan plizyer parti politik e ou'n dir i annan bann demann ki'n vini depi 2022, eski ou kapab dir nou lekol bann parti politik ki'n montre lentere pour servi fasilite lekol pour fer zot bann aktivite?

E dezyenmman Minis, eski ou kapab dir nou si dan ou repons ou'n dir ki zot ankouraz bann lekol pou angaze avek bann groupman, ki enkli bann parti politik, eski i annan en sirkiler oubyen i annan en kek dokiman ki petet pour fer li pli kler aköz zot in revwar.

Pour fer li pli kler ki nenport parti politik ki anrezistre oubyen ek lezot groupman i annan lentere pour zot servi lekol koman bann fasilite pour fer zot aktivite. Mersi.

**MR SPEAKER**

Mersi. Minis, repons?

**MINISTER JUSTIN VALENTIN**

Mersi Mr Speaker. Mr Speaker, bann – i annan sa 2 parti politik mazer dan Sesel in deza demann Minister Ledikasyon pret zot bann fasilite.

*(comments off-mic)*

**MR SPEAKER**

Minis.

**MINISTER JUSTIN VALENTIN**

Wi... i annan par egzantp, i annan laklas, la salamanze, i annan laplenn ki'n ganny servi e vwala.

E wi, nou pou... mon pa war Mr Speaker, mon pa war naryen kasyet dan sa kestyon, dan sa larepons ki mon pe donner.

Donk, nou ava fer en deklarasyon ofisyel – nou ava de fason ofisyel nou ava mete ki tou dimoun i ava konn egzaktaman bann prosedir ki zot devret fer.

E ki bor zot pour anvoy zot demann. Donk, vwala mon larepons Mr Speaker.

**MR SPEAKER**

Mersi. Klarifikasyon si ou annan Onorab Vidot?

**HON AUDREY VIDOT**

Yes Mr Speaker, Mr Speaker, mon le en leklersisman avek Minis.

Monn demann avek Minis, in dir mwan i annan plizyer mon'n demann li lekel sa bann parti politik?

I pa ankor dir nou konfirman lekel parti politik. Donk, mon kestyon i senp mwan.

**MR SPEAKER**

Minis?

**HON AUDREY VIDOT**

Si Minis napa naryen pou kasyet, dir li reponn *please*.

*(comments off-mic)*

**MR SPEAKER**

*Order, silvouple!*

**MINISTER JUSTIN VALENTIN**

Mr Speaker, mon ti krwar letan mon dir sa 2 parti politik mazer i dir tousel.

**MR SPEAKER**

Mersi Minis. Termin ou repons si ou...

**MINISTER JUSTIN VALENTIN**

Mersi Mr Speaker.

**MR SPEAKER**

Ok. Onorab Loze, ou kestyon?

**HON JOHAN LOZE**

Mersi Mr Speaker. *United Seychelles* konman enn sa 2 parti politik mazer, nou pa'n demande. Nou pa'n zanmen partisip dan okenn aktivite politik dan lekol.

**(APPLAUSE)**

**HON JOHAN LOZE**

Sa i *clear and unequivocal*. Mr Speaker, kestyon i tre senp e la mon demann lo *behalf* bann...

*(Interruption)*

**MR SPEAKER**

*Order.*

**HON JOHAN LOZE**

Pti parti politik ki pa form parti dan sa 2 mazer.

Mr Speaker, Minis, kan i pour met an plas en Polisi kler pour *define* tou bann laranzman ki bann parti politik i kapab ganny akse avek fasilite Minister Ledikasyon?

*So by when* ki sa i pou kler pou tou bann pli pti parti politik konnen? Mersi.

**MR SPEAKER**

Yes, Minis, in dir i pou fer. Minis, i pe demande kan i kapab espekte sa?

**HON WAVEL WOODCOCK**

*Point of order* Mr Speaker.

**MINISTER JUSTIN VALENTIN**

Mr Speaker, sa i kapab gannyen semenn prosenn. Nou a redrafte li byen pour tou dimoun gannyen. Mersi Mr Speaker.

**HON WAVEL WOODCOCK**

*Point of order* Mr Speaker.

**MR SPEAKER**

Espere. Mersi. Lo *point of order* silvouple, ler ou'n lev ou lanmen si mon'n sinyal ou poudir mon'n war ou, ou espere amwen ki mon aret sa dimoun ki pe koze.

Ler sa dimoun... si mon pa deside aret li, ler sa dimoun ki pe koze, ki mon donn ou, ou *point of order*. Onorab Woodcock ki ou *point of order*?

**HON WAVEL WOODCOCK**

*Point of order* Mr Speaker, aköz *US* pe *mislead* Lasanble Nasyonal atraver bann semen ki zot pe fer, sirtou Johan Loze.

Mr Speaker, mwan konbyen fwa...

*(Interruption)*

**MR SPEAKER**

*Order!*

*(Interruption)*

**MR SPEAKER**

Silvouple. *Order! Look* sa i en size politik, silvouple ekout zot koleg zot kanmarad e... *Order!*

Mon pa ankor donn ou laparol. Silvouple Onorab Woodcock fini fer ou pwen.

**HON WAVEL WOODCOCK**

Mr Speaker, levidans i la. Konbyen fwa dan lepase, dan Lekol Baie Ste Anne Praslin zot in fer bann miting politik sa bann letan *SPPF*?

An plis ki sa Mr Speaker, zot in menm servi bis *SPTC* pour naryen pour saroy dimoun dan tou distrik Mr Speaker.

***(APPLAUSE)***

**HON WAVEL WOODCOCK**

Napa ki zot pa'n fer ankor. Mersi.

***(APPLAUSE)***

**MR SPEAKER**

Bon. *Ok*, mon pa kapab verifeye sa bann fe, sa bann *statement*

ki ou'n fer, mon a les sa pou Minis.

Minis, mon krwar nou ti'n fini avek sa kestyon. Mon a pran kestyon bann Manm. Mon pe ganny enteripsyon tou lede kote.

Si zot pa kapab ekout kanmarad e demann zot kestyon annord, mon pe aret sesyon kestyon; Onorab Pillay ou kestyon.

**HON SEBASTIEN PILLAY**

Mersi Mr Speaker. Mr Speaker, dan en determinasyon Lakour lo en konplent anmennen par Prezidan Ramkalawan kont en *head teacher* Lekol *La Rosière*. Ki Prezidan Ramkalawan ti dir ki lekoul pa en landrwa pou fer politik *ok*?

Akoz ti annan sa sirkiler zisteman ki ti'n sorti an 2012 *ok*? Sa *Head Teacher* Madanm Botsoie ti ganny en pake problemm aköz sa.

I annan en Polisi dan lekoul kot okenn *paraphernalia* politik pa sipoze antre dan lakour lekoul.

Mr Speaker, alors mon le demann Minis, eski Minis, pe dir ek nou ozordi anba ladministrasyon *LDS*, eski i *ok* pour *paraphernalia* politik antre dan lakour lekoul?

Akoz eleksyon napa okenn *paraphernalia* politik ki ganny dwa antre kot en *neutral zone* ki lekol ti ganny konsidere.

E si eski sa ki Minis, pe dir nou ozordi i pa bann mansonz akoz nou'n tyonbo...

*(Interruption)*

**MR SPEAKER**

Onorab, ou pa kapab akiz en Minis, ki pe reponn kekyon la silvouple.

Mon bezwen fer diferans dan laliny ki Onorab Pillay, pe pran; fer politik dan lekol avek permet fasilite lekol ganny servi pou en miting politik i 2 diferan keksoz.

Minis?

*(comments off-mic)*

**MR SPEAKER**

*Order!* Onorab Georges ki - ou'n lev lanmen ki ou annan?

**HON BERNARD GEORGES**

Mon annan en *point of order* Mr Speaker.

**MR SPEAKER**

*Yes, ok.*

**HON BERNARD GEORGES**

Pou koriz en *misapprehension* ki Onorab *Leader* Lopoziyon, fek fer.

Mr Speaker, Madanm Beryl Botsoie ki ti *Head Teacher* Lekol La Rosière pa ti en problem ki i ti les lekol ganny servi.

Mwan, mon ti dan sa *case* alor mon konn pli byen ki Onorab *Leader* Lopoziyon.

Madanm Beryl Botsoie ti dan *case* Ankour ti ganny en konplent ki ti pe dir avek son bann *teachers* dan lekol, pa pour vot pour Mr Ramkalawan, me vot pour Msye...

**(APPLAUSE)**

**MR SPEAKER**

Mersi.

**HON BERNARD GEORGES**

Alor Mr Speaker, avan ki Onorab Pillay i vin akiz okenn dimoun mansonz e manti, get son prop lekor dan laglas mersi!

**(APPLAUSE)**

**MR SPEAKER**

Bon. Onorab, mon pa pour angaz dan en deba ki pa pou fini ant sa 2.

Mon pour...

*(comments off-mic)*



**MR SPEAKER**

*Order! Order!* Onorab Georges mon krwar ou'n fer sa pwen ki mon ti pe fer so nou a termin lo la avek. Onorab...

*(Interruption)*

**MR SPEAKER**

Onorab Loizeau, ou kestyon.

**HON NORBERT LOIZEAU**

Mersi Mr Speaker...

*(Interruption)*

**MR SPEAKER**

Onorab Loizeau, ou kestyon.

**HON NORBERT LOIZEAU**

Mersi Mr Speaker. Minis, mon anvi demande vi ki sa bann fonksyon politik i ganny fer pandan *weekend* e osi petet apre ki lekol in fini, eski sa i deranz fonksyonman lekol; enn.

Dezyenm kestyon Mr Speaker, se ki ler *US* ti donn bann bwat goute en pe ton avek en bout kokonm ki ti annan en *logo US* lo zot bwat.

Kote sa bann bwat ti ganny rantre dan lekol, ouswa an deor baro lekol? Mersi.

**MR SPEAKER**

Mersi. Minis, ou repons?

**MINISTER JUSTIN VALENTIN**

Dakor Mr Speaker. Mr Speaker, nou pou otoriz bann demann, okenn demann ki pa afekte ou deranz program lekol skoler.

Sirman i pou apre ler e dan *weekend* e osi nou pou otoriz bann demann ki nou krwar pa pou detri bann lenfrastruktir lekol.

Me donk, Minister Ledikasyon la nou vwala nou pozisyon lo sa ki konsern litalizasyon bann fasilite pour fer bann miting - bann miting e bann rankont dan bann fasilite ledikasyon.

Annefe goute ti dan enn sant prensipal Minister Ledikasyon son *Headquarters* ...

*(Interruption)*

**MR SPEAKER**

*Order!* Minis, ou'n terminen?

**MINISTER JUSTIN VALENTIN**

Mersi Mr Speaker.

**MR SPEAKER**

Mersi. Onorab Cosgrow, ou kestyon.

**HON WALLACE COSGROW**

Mersi Mr Speaker. Mr Speaker, eski Minis, i kapab konfirman ki ziske aprejan in napa okenn striktir pour kapab met sa bann zafer parti politik.

Fer miting piblik, miting or bann travay politik dan lekol me selman apre ki en kestyon in ganny donnen ki zot in vin reponn li koumsa.

So eski Minis, i kapab konfirman ki ti napa en striktir e se la ki zot pe al drafte striktir, pour ki kapab *cater* pour sa kestyon ki'n ganny demande.

E akoz ki parti *LDS* in servi sa bann fasilite boner akoz sa bann lavantaz dan Gouvernman

Dezyenm kestyon Mr Speaker, eski Minis, i kapab dir nou si bann parti politik ki'n fer bann aktivite dan bann lokasyon leko, l zot pa'n pey okenn *fee* pou ni delo, ni elektrik.

E zot pe servi *tax payers money* - parti politik pe servi *tax payers money* pou kapab fer son aktivite parti politik e se *tax payers money* ki pou pey sa bil delo avek elektrik si ou pou kapab konfirm nou? Mersi.

**MR SPEAKER**

Minis, repons?

**MINISTER JUSTIN VALENTIN**

Mr Speaker, mersi. Minister Ledikasyon i annan en Polisi parey mon'n dir i date 2012 e nou, nou'n redrafte.

Nou'n revwar sa Polisi 2022 e nou kontinyelman revwar nou Polisi pour reste azour avek larealite pei.

Dezyenm parey mon'n dir, i annan bann diferan lorganizasyon ki servi bann fasilite Minister Ledikasyon e a lafen zot donn serten kontribisyon pour delo ouswa pou elektrik, baze lo letan ki zot in servi si zot in servi li signifikan. Mersi Mr Speaker.

**MR SPEAKER**

Mersi. Wi, Onorab Pillay ki ou *point of order*?

**HON SEBASTIEN PILLAY**

Mersi Mr Speaker. Mr Speaker, lo 2 pwen - premyerman mon kestyon pa'n zanmen ganny reponn.

Dezyenmman mon le koriz en *misapprehension* fer par Onorab Georges.

Mon annan devan mon egzaktaman ki ti ganny dir dan sa *case* e i pa korek ditou sa ki in dir...

**MR SPEAKER**

Onorab, mon pa pou... arete, arete Onorab Georges ou fer en

*point of order*, Onorab Pillay pou fer enn, Onorab Georges pou rod en lot. Mon pe terminen avek sa size. Lo akoz ou kestyon pa'n reponn, i ti'n an ganny reponn si ou pa ti'n konmans par akiz Minis, 'lalang, mansonz.' Mersi. Nou'n termin la pour sa kestyon nou ava pran kestyon 175 Onorab Sylvianne Lemiel.

Sylvianne Lemiel, *sorry*.

**HON SYLVANNE LEMIEL**

Mersi Mr Speaker, Sylvianne Lemiel *thank you*. Mon kestyon Mr Speaker, i al dan sa fason.

Eski Minis i kapab konfirman ki en vizit ti ganny fer Zedi le 4 Zilyet 2024 par bann o zofisyè Lekol STA ansanm avek SIA kot sit konstriksyon nouvo Lakres Anse Royale e ki ti bi sa vizit? Mersi.

**MR SPEAKER**

Mersi. Minis?

**MINISTER JUSTIN VALENTIN**

Yes. Mersi Mr Speaker. Mr Speaker, wi mon konfirman, ki ti annan en vizit ki ti ganny fer par sa 2 group dimoun.

Anvi ki Lenstitisyon STA pe al ganny aranze, zot *management* pe rod bann diferan opsyon kot zot etidyan i

kapab ganny mete tanporerman.

E sa batiman *Anse Royale* sa lakres ki nou pe koz lo la in enn parmi ki zot dir mwan zot in konsidere pour vizite lo zot lalis. Mersi Mr Speaker.

**MR SPEAKER**

Mersi. Onorab Lemiel ou siplemanter?

**HON SYLVANNE LEMIEL**

Mersi Mr Speaker. Minis, mon ti a kontan konnen avek ou etandonnen ki in fer en kantite lannen ki Lekol Anse Royale Primer in esper son Lakres, eski ou konman Minis Ledikasyon, arive ki STA i swazir Lekol Lakres Anse Royale eski ou pe donn sa lakres STA parey ou pe dir -

*Be it* tanporer pou zot vin etidye, eski ou konman Minis, ou pou aprouve pour ou donn sa lakres STA? Mersi.

**MR SPEAKER**

Mersi Onorab. Minis?

**MINISTER JUSTIN VALENTIN**

Mersi Mr Speaker. Mr Speaker, bann propriyete Gouvernman, i propriyete Gouvernman.

E mwan, mon pou ganny gide par sityasyon e konteks. Bann desizyon koumsa i pa

neseserman depan Minis Ledikasyon.

Akoz sa lakres pour le moman i en batiman Gouvernman Sesel e byensir kot i annan bann fason pou ede, Minister Ledikasyon in toultan pare pou ede.

Akoz apre tou STA lot i pour... tousala i bann ledikasyon ki pe arive.

Donk, nou ava gete sitasyon mannyer i deroule e konteks, e letan apropiye bann desizyon i ganny pran.

Me selman parey mon pe dir mwan, mon les mon ganny gide par bann sityasyon ki arive. Mersi Mr Speaker.

### **MR SPEAKER**

Mersi. Onorab Pillay, ou ti annan en kestyon? Onorab Pillay.

### **HON SEBASTIEN PILLAY**

Mersi Mr Speaker. Mr Speaker, mon ti a kontan konpran rezondet larepons ki Minis, in donn nou.

I a fer en dezyenm lenstitisyon ki ganny konstri *for the purpose of* Minister Ledikasyon; premye ti sa *building* ozordi pe ganny servi par *Electoral Commission*, ki ti ganny konstri pour Minister Ledikasyon.

Dezyenm *building* ki ganny konstri pour *purpose* Minister Ledikasyon e Minis, pa kapab dir Lasanble si sa 2 lakres pour ganny servi *for the purpose to which* i ti pe ganny konstri.

Alors kestyon ki mon pe demann Minis, eski nou kapab krwar ou ler ou dir nou poudir Minister Ledikasyon parey ou pe dir nou taler, ou pou travay pour bann *teachers* ou vremen annan lentere Minister Ledikasyon a ker

Oubyen si en lot antite Gouvernman ki pe pran desizyon an sa ki konsern Minister Ledikasyon?

E an pase Mr Speaker, la rezilta *Court of Appeal* la ki ti *overturn* desizyon ki ti ganny pran dan *case* Madanm Beryl Botsoie ki on...

### **MR SPEAKER**

Minis, ou repons lo kestyon ki'n ganny poze. Minis. Onorab Georges silvouple permet nou fini. Minis, ou annan en repons.

### **MINISTER JUSTIN VALENTIN**

Dakor. Mersi Mr Speaker. Mr Speaker mon annan lentere pei aker. Mersi bokou.

### **MR SPEAKER**

Mersi. Mon pou termin la ek sa kestyon. Termin la ek sa kestyon. Mon remersye Minis, e son *panel* pour zot partisipasyon e mon swet zot bon depar.

Lasanble i a pran poz e nou a rebran 2 er mersi.

**(BREAK)**

**MR SPEAKER**

Bonn apre midi tou dimoun. Nou re pran travay ki lo nou *Order Paper* e nou annan *Central Bank of Seychelles (Amendment) Bill, 2024*.

Madanm *Hansard* raporter i ava apel Minis, e son delegasyon silvouple.

Bonzour Minis pou Finans, plan Nasyonal e komers Mr Naadir Hassan, bonzour Ms Caroline Abel Gouverner *Central Bank*, Ms Tanya Thyroomoody *Deputy General Counsel AG's office*, Mrs Julia Jean *Legal Draftsperson AG's office*.

A kote nou annan Ms Shannon Jolicoeur dan *Legal Unit Central Bank*, Mr Mike Tirant *Head of Division Banking Services*.

Byenveni zot tou dan Lasanble e mersi pou zot partisipasyon lo sa *Bill*.

Nou a konmans avek Mosyon pour *Second Reading*? Onorab Georges.

**HON BERNARD GEORGES**

Mersi Mr Speaker. Bonn apre midi Mr Speaker, bonn apre midi tou bann Manm Onorab, tou bann dimoun ki pe swiv nou Minis, Gouverner ek zot delegasyon.

Mr Speaker, anba *Order 69(2)* nou *Standing Orders*, mon *move* ki *The Central Bank of Seychelles (Amendment) Bill, 2024* i ganny lir en Dezyenm Fwa. Mersi.

**MR SPEAKER**

Mersi. Nou a ganny segonde. Onorab Sandy Arissol?

**HON SANDY ARISSOL**

Mersi Mr Speaker. Bonn apre midi, bonn apre midi Minis, avek ou lekip, tou dimoun ki a lekout. Mosyon i ganny segonde.

**MR SPEAKER**

Mersi. Nou apel Minis, pou fer prezantasyon sa *Bill*.

**MINISTER NAADIR HASSAN**

Mr Speaker,  
Onorab *Leader* Lopozisyon,  
Onorab *Leader* Zafer  
Gouvernman, bann Manm

Onorab, tou manm piblik ki a lekout, bonn apre midi.

Mr Speaker, sa Prozedlwa pour amann Lalwa Labank Santral 2004 ki pe ganny prezante ozordi e propoz bann sanzman sibstansyel pour ranforsi striktir entern Labank Santral.

Pour anmenn plis latransparans e reflekte nouvo fonksyon, ki sa lenstitisyon in pran pour reponn a bezwen ek nouvo devlopman dan lekonomi e dan sistenm finansyel pei.

I osi enportan ki Labank Santral i reste an konformite avek bann meyer pratik tout an prenon kont lo realite.

Me selman Mr Speaker, lobzektif prensipal Labank Santral ki pou mentenir stabilite dan pri pa pou sanze.

Mr Speaker, en pilye kle en Labank Santral dan nenport ki pe atraver lemonn se son lendepandans. En Labank Santral i devret kapab *attain* son bann lobzektif e deservi son fonksyon san lenterferans eksteryer.

Se dan sa loptik ki bann Lamannman ki pe ganny propoze i prensipalman pou ranforsi lotonomi Labank Santral e la nou pe koz lo Labank Santral konman en lenstitisyon li menm.

Ki enkli tou son anlwaye e manm son *Board*; an sa ki konsern *Board* Labank Santral Lamannman ki sa Prozedlwa pe propoze i enkli.

Sanzman dan konpozisyon *board* pou reflekte diversite, lekspertiz ki neserer pour *board* kapab deservi son rol sirveyans lo loperasyon Labank Santral, dan en fason pli efikas.

Sa sanzman i enkli ranplas Prokirer Zeneral ki ti napa drwa vote par en manm *non* egzekutiv e osi provizyon pou azout en nouvo manm *non* egzekutiv.

Lentrodiksyon en limit lo manda ki manm *Board* i servi. An se moman en manm *Board* i ganny apwente pour en term 6 an. Ki kapab ganny renouvle endefiniman. Avek sa limit lo manda en manm *Board board* pou selman kapab servi 2 term 6 an.

Letablisman en peryod *cooling off* 6 mwan pour tou manm *Board* Labank Santral letan zot manda i terminen.

Sa i vedir ki pandan sa peryod, sa bann ansyen manm *Board* pou napa dwa annan langazman avek okenn lenstitisyon ki tonm anba manda regilatwar Labank Santral, ki swa konman en

anplwaye, konsiltan ouswa en direkter lo *Board* enn sa lenstitisyon.

E osi letablisman prosedir kler lo lafason ki en manm *Board* i ganny retire dan son pos dan lenstans ki deza preskri anba Lalwa aktyel.

Mr Speaker, Labank Santral ti adopte en stratezi an 2020 pour moderniz sistenm peyman e i sa stratezi i labaz travay ki pe ganny fer.

Pour ki lekonomi i depan mwens lo larzan likid sa ki an Angle nou dir *cashlite*.

Dan sa loptik dan sa Prozedlwa i fer provizyon pour ki Labank Santral i kapab entrodwi lanmonnen an form elektronik ouswa *digital currency*.

Antretan ki travay i kontinyen, larzan likid i reste en metod peyman ki bokou dimoun i ankor servi. Pou reponn a serten defi ki'n ganny rankontre Labank Santral i war li enportan pour ranforsi Lalwa an sa ki konsern larzan likid.

E la nou pe koz lo Roupie Sesel ki enkli e larzi pou vwar Labank Santral pour prodiksyon, distribisyon e stokaz lanmonnen lokal ki an sirkilasyon.

Ensi ki son resiklaz e destriksyon ler i ganny retire dan sirkilasyon.

Lentrodiksyon en peryod kler ki larzan ki Labank Santral in deklare konman nepli annan en valer monneter i ganny tire dan sirkilasyon.

E donn pouvwar Labank Santral pour vin le sel antite ki kapab donn lotorizasyon, pou reprodwir ouswa servi zimaz biye ek kalen dan nou lanmonnen lokal.

Penalti ki aplikab pour okenn reprodiksyon san lotorizasyon pour osi ganny detaye dan Lalwa.

Mr Speaker, en fe ki nou tou nou kapab apresye, i se ki Labank Santral i bezwen resevwar lenformasyon presi dan en dele letan rezonnab sorti kot bann lenstitisyon anba son sipervizyon.

Pour li kapab formil bann Polisi apropiye pou ede soutenir nou lekonomi.

Penalti anba Lalwa aktyel ki en lanmann si en ka i ganny pourswiv Ankour, pa neserman ase for pour ankouraz bann lenstitisyon pou reste an konformite avek Lalwa.

Pour sa rezon sa Prozedlwa i fer en provizyon pour donn pouvwar Labank Santral pour enpoz sanksyon

administratif dan lenstans kot i pa resevwar lenformasyon.

Touzour lo sa size penalti, sa Prozedlwa i osi fer provizyon pour entrodwir sanksyon administrativ, anba seksyon Lalwa, ki kouber abilite Labank Santral pou verifye okenn lenformasyon i ganny fourni par bann lenstitisyon anba son sipervizyon.

Sa Prozedlwa pe osi propoze pou ogmant lanmann ki ganny enpoze dan bann ka kot konfli lentere i konfidansyalite i ganny konpromi.

Mr Speaker, en lot laspe ki sa Prozedlwa pe adrese, i lye avek rol Labank Santral pour donn davans a kour term Gouvernman.

I ganny note ki paramet ki gid davans, ki Labank Santral i donn Gouvernman i devret an akor avek meyer pratik enternasyonal e ki i ganny fer dan en fason ki prezerv lotonomi Labank Santral, e ki promouvwar disiplin fiskal.

Pou *attain* sa lobzektif bann lamannman ki pe ganny propoze i kronm swivan;

Davans a kour term Labank Santral i donn Gouvernman, pour ganny alinyen avek Polisi Monneter Labank Santral e son tou

lentere pa pou pli ba ki tou Polisi Monneter.

Pe etabli en limit lo lakantite det an term davans akour term ki Gouvernman i kapab akimile.

Retir provizyon dan Lalwa aktyel, ki permet egzansyon lo limit davans a kour term e konverti det a kour term pour vin bann Sekirite Gouvernman, parey bann *Bill e bond* Trezor.

E ranforsi propozisyon dan Lalwa aktyel ki kouber levennman fors mazer, pour met li azour e pratik enternasyonal.

Touzour an sa ki konsern davans sa Prozedlwa pe entrodwir en nouvo provizyon pou Labank Santral kapab ofer lasistans finansyel irzan a kour term labank ouswa *Credit Union*.

Kot Labank Santral i war li ki zot sityasyon i kapab poz en risk pour stabilite sistenm finansyel.

Lalwa pour donn gidans se kondisyon strik pour kouber sa bann lenstans, ki pour enkli sityasyon kot enn sa lenstitisyon finansyel napa ase likidite me ki toudmenm vyab.

Ouswa dan ka kot Labank Santral i determinen ki son lentervansyon i neser, pou



evite ki en labank ouswa *Credit Union* i fail.

Mr Speaker, pour Labank Santral kapab deservi son fonksyon kle pour delivre lo lobzektif prensipal, i enportan ki sa lenstitisyon i finansyerman solid.

Si en Labank Santral napa ase kapital debaz, performans son fonksyon e kle i diminyen e par konsekans par stabilite finansyel pei i ganny mete a risk.

Se pour sa rezon ki sa Prozedlwa i fer provizyon pour ki kapital debaz Labank Santral i ganny ogmante pour vin R550 milyon e sa sonm a ganny revwar tou le 10 an.

Provizyon pe osi fer pour ki Labank Santral i kapab retenir profi ki kapab ganny distribye, si son kapital mandatwar i mwens ki 10 pousan son lobligasyon monneter.

E zis pour note, kapital mandatwar Labank Santral i enkli son kapital debaz e sa pousantaz profi ki sa lenstitisyon i retenir.

E pour asire ki Labank Santral i deservi son fonksyon dan en fason transparan e responsab, lamannman pe ganny propoze pour moderniz e ranforsi fonksyon odit entern.

An se moman, Gouverner i annan responsabilite administratif selman e fonksyon lye direkteman, avek aktivite odit, i ganny raporte avek Komite *Board* Labank Santral, ki annan responsabilite pou odit ek zesyon risk. Sa pratik pou aprezan ganny reflekte dan Lalwa.

Mr Speaker, sa Prozedlwa ki pe ganny propoze ozordi, i enn ki esansyel pou anforse dan depandans Labank Santral asiste sa lenstitisyon dan son travay pou mentenir stabilite dan pri e dan sistenm finansyel.

E osi garanti ki i deservi son manda dan en fason transparan e responsab.

Se pour sa rezon ki mon demann Lasanble Nasyonal, pour donn zot sipor sa bann lamannman dan Lalwa ki kouver Labank Santral. Mersi.

### **MR SPEAKER**

Mersi Minis, pour ou prezantasyon. Lasal i ava ouver prezan pour deba bann Manm. Onorab John Hoareau i a demare?

### **HON JOHN HOAREAU**

Mersi Mr Speaker. Bonn apre midi Mr Speaker, bonn apre midi Minis, ek ou delegasyon.

Pour mwan lobzektif prensipal Labank Santral, se pour gard sa stabilite pri dan pei, vedir pour kontrol lenflasyon.

Alor pour li fer sa, pour li kapab *achieve* son lobzektif prensipal, i bezwen annan bann Lalwa ki for ; bann Lalwa ki performan e bann Lalwa ki asir premyerman son lendepandans lenstitisyonnèl.

Bann Lalwa ki osi pour promouvwar lotonomi finansyel pour sa labank e osi bann Lalwa ki pour anmenn bann standar e pratik enternasyonal ki pli performan.

Sirtou par lefe ki nou deza pe prete avek *IMF* alor bann *advice* ki *IMF* i donner, i bezwen pran a kont pour nou kapab annan en lenstitisyon ki performan e ki si ou le *stand the test of the day*.

Mr Speaker, pour mwan sa bann lamannman plito, ki pe ganny anmennen pour amann *Cap 26 2004* i bann lamannman vreman enportan.

Akoz ler nou pe get par egzant lendepandans lenstitisyonnèl labank, lamannman Seksyon 3, i zisteman pe promouvwar pe anmenn bann provizyon pour ki napa personn okenn lotorite 3 e okenn personn ki kapab egzers

okenn kontrol lo *Board* e lo bann desizyon ki Labank Santral i pran.

Sa i vreman, vreman enportan Mr Speaker, aköz dan sa lemonn ki nou pe viv ladan, i annan bokou lensertitid lo nivo marse mondyal.

I annan osi bann fors mazer ki pei i kapab fer fas avek. E si nou rapel pa tro lontan an 2008 ler pei ti fait, aköz ti annan en to lesanz ki ti *fixed* kot Labank Santral pa ti kapab entervenir pou fer okenn keksoz.

Pour regle balans peyman, pour regle det eksteryer ki pa ti'n vin soutenab aköz zisteman fors mazer e lensertitid lo en nivo marse mondyal par egzant pri petrol, ki ti'n monte ki ti'n ariv en nivo tre o.

Alor ti bezwen annan en sanzman, ti bezwen annan sanzman Lalwa pour fer ki labank i vin en pti pe pli endepandan.

Nou ti bezwen sanz Lalwa pour fer reform makro ekonomik avek lasistans *IMF* e dezormen roudi ti vin anba en lot rezim; sa ki nou apel en rezim flotan.

E la Roudi ti vin konvertib. Mon rapel byen Mr Speaker, a sa lepok ler Prezidan Ramkalawan ki ti Onorab, dan

sa Lasanble, ti pe koz lo bann roupi konvertib ti pe koz lo en rezim flotan e ti ganny monke par Lopozisyon ki ti dir, i ti ganny monke par parti ki ti o pouwar sa lepok, i ti dir ki li i parey en gro Roupi flotan, me selman sa boug ti pe dir keksoz ki realistik, keksoz ki vre.

Mr Speaker, nou ti bezwen vwar dan lepase legzanp kler par egzanp *Zimbabwe* kot son *Central Bank* ti ganny kontrole par Legzekitiv Prezidan Mugabe li menm.

En kont lenflasyon ti ariv ziska en milyon pousan, kot ou ti bezwen petet anmenn en bouret larzan pou ou kapab aste en dipen laboutik.

Be nou pa oule nou pei i vin koumsa, se pour se la rezon ki sa bann sekous, in montre nou klerman ki nou bezwen annan en lenstitisyon ki for, en lenstitisyon ki endepandan e en lenstitisyon ki kapab reakte vitman avek bann lafors marse enternasyonal.

Mr Speaker, si nou get anba 4A(1) sa Lalwa fonksyon Labank Santral se pour osi mentenir tolesanz, *regulate* bann labank komersyal, formil bann Polisi Monneter e annan en *oversight* lo stabilite finansyel.

Ki i pe dir par enstabilite finansyel?

Mr Speaker, nou annan nou dan pei i annan plizyer gro, gro biznes i kapab bann biznes parey, bann *body corporate* parey Fon Pansyon, parey bann sekter telekominikasyon.

E parey *SeyBrew* li menm, plizyer lezot ankor bann lezot biznes ki ase gro nou kapab dir.

E si an ka enn sa bann biznes i lo semen pou fait, i kapab annan en lefe lo lekonomi Sesel.

Alor Labank Santral i annan sa rol pour zwe en *oversight* pou gete ki risk sa bann biznes i koz lekonomi pei e sa i vremen enportan. Sa Lalwa li menm, i pe ranforsi sa bann fonksyon ki Labank Santral i kapab fer.

Mr Speaker, ler nou pe get lo lotonomi finansyel, nou'n vwar ki Labank Santral pe gradyelman pe ogmant son kapital debaz pou fer li vin 550 milyon e sa parey Minis, in dir nou se larzan ki fer profi lo son bann diferan *portfolio* biznes, e osi bann larzan ki ranmase.

Mr Speaker, pou ou kapab ganny en lenstitisyon ki *operate* endepandan, i bezwen annan lotonomi finansyel. I pa kapab pe an menm tan pran en saler dan Bidze Gouvernman.

E an menm tan pe fer desizyon lo kote Gouvernman akoz i pou konpromiz sa desizyon ki pou fer lo kote Gouvernman. I pou swa ganny enfliyanse akoz i pe retir en saler dan pos Gouvernman.

Alor i enportan ki Labank Santral i ganny zere dan en fason, kot i kapab mentenir sa kapital debaz e osi an menm tan, rann en pe larzan - donn sa bann ekstra parey pe dir sa 10 poursan; ler pou donn *dividend*.

So, i donn *dividend at least* 50 poursan son profi as *dividend* e sa i ganny baze lo sa 10 poursan an zeneral larzan ki i pe fer.

So pe pey osi en *tax* ki 15 poursan e nou konnen poudir Labank Santral i annan diferan *portfolio* biznes - i *act* parey en *banker* pour bann lezot labank.

I vann zot laysenns, vedir zot pey en laysenns avek Labank Santral e osi i sofgard zot larzan.

I annan sistenm *national payment system* ki i osi kapab anmas zener serten larzan lo sa bann servis ki ofer.

Alor Mr Speaker, i enportan ki i gard sa kapital debaz, pou permet li vin en lenstitisyon ki vreman otononm.

Mr Speaker, ler nou pe get osi bann standar ki Labank Santral pe anmennen atraver sa bann lamannman, nou vwar poudir i annan li en striktir *Board* ki pou permet latransparans.

I pou permet rann kont e i pou permet bann desizyon ganny fer dan en fason ki pli modern si ou le - ki pli performan.

Rapor sa *Board* pou ganny prodwir avek Lasanble tou le lannen e nou kapab menm si nou napa lotorite lo Labank Santral pou dir li ki pou fer, ki pa pou fer. Me nou kapab zisteman kriy Labank Santral pour demann li eksplik son rapor osi.

Mr Speaker, atraver sa *Bill* si nou pe get *clause 4B(1), (2) and (3)* nou war poudir Labank Santral pe demande ki okenn Lalwa ki relye avek son fonksyon - okenn Lalwa ki relye avek son fonksyon, okenn Lalwa ki kapab *hamper* son fonksyon i bezwen ganny diskite a lavan avek li.

E osi nou konman Lasanble nou pa kapab pas en Lalwa ki pou *hamper* son fonksyon. Alor, koman en *body* lezislatif nou the *legislative arm of the Government*, mon ti ava kontan ki Minis, dan son *sum*

*up* i eksplik nou, akoz ki zot in neserer vwar pour zot kapab vin avek sa provizyon.

Mon konnen sirman i pou annan bann bon legzanp ki i pou donn nou, akoz ki sa provizyon i relye avek fonksyonman labank, relye avek lendependans labank.

Be selman mon ti a kontan ki i eksplik Lasanble akoz ki sa pouvwar i pe retire avek nou.

Mr Speaker, avek sa, mon ava remerci ou pour sa pti mo ki mon'n kapab dir lo Labank Santral ozordi. Mersi.

**(APPLAUSE)**

**MR SPEAKER**

Mersi Onorab. Laparol pour Onorab Philip Arissol.

**HON PHILIP ARISSOL**

Mersi Mr Speaker. Bonn apre midi Mr Speaker, ek tou bann dimoun ki pe swiv nou.

Mr Speaker, mersi pou donn mwan laparol ozordi pour siport *Central Bank of Seychelles (Amendment) Bill, 2024*.

En lezislasyon enportan ki annan pou plan moderniz e loperasyon *Central Bank of Seychelles*, lobzektif prensipal sa *Bill* se pou anmenn en kad

Labank Santral anliny avek bann meyer pratik e standar enternasyonal.

Osi adres bann bezwen e sirkonstans inik nou lekonomi lokal. Enn bann laspe kle sa *Bill*, se pou definir klerman rol prensipal Labank Santral, pour mentenir stabilite pri, ansanm avek son lobzektif segonder pou promouvwar stabilite finansyel Sesel.

Par klerman definir sa bann responsabilite nou pe donn en manda kler pou Labank Santral akonplir efektifman son doub manda pour sofgard nou lekonomi.

De plis ki sa, sa *Bill* i anmenn plis latransparans e responsabilite dan Labank Santral par liste son fonksyon e son pouvwar dan en fason konpreansiv.

Par entrodwir en nouvo fonksyon ki pa ganny reflekte aktyelman dan Lalwa ki egziste, nou plan se asire ki aktivite Labank Santral i ganny fer dan en fason transparan e responsab, anliny avek lekspektasyon standar piblik e enternasyonal.

Mr Speaker, sa *Bill* i klarifye fonksyon e pouvwar konsey Direkter Labank Santral, avek bi pou etabli

klerman responsabilite management labank e *Board*.

Sa separasyon pouvwar i esansyel, pou asir governans e sipervizyon efikas dan Labank Santral; amelyor son lefikasite e prosesis pou pran desizyon.

Sa *Bill* i osi enkli bann provizyon ki pou amelyor lotonomi finansyel Labank Santral, par ranforsi son kapital stati ter e anmenn bann provizyon ki kler, ki relye avek lavans kot Gouvernman anliny avek meyer pratik enternasyonal.

Par ranforsi pozisyon finansyel Labank Santral, nou vize asire son abilité pour efektifman akonpli son manda e mentenir stabilite finansyel dan Sesel.

Mr Speaker, sa *Bill* i vize ver ranforsi lendependans enstitisyonnel Labank Santral e an plis klarifye garanti kont move lenfliyans e kontrol sorti kot nenport antite ouswa lotorite eksteryer.

Sa mezir i enportan pou protez kapasite Labank Santral, pou pran bann desizyon dan pli bon lentere lekonomi san presyon eksteryer.

An plis, sa *Bill* i entrodwir provizyon pou apwent en Tribinal pou retir en manm *Board* Direkter dan lofis.

Sa mekanizm i esansyel pou asir responsabilite ek entegrite dan striktir governans Labank Santral.

Alors mentenir en o standar profesyonnalizm e kondwit etik parmi son bann dirizan.

Sa *Bill* i propoz lamannman pour amelyor rol sipervizyon Labank Santral par entrodwir penalti administrativ *non-compliance* avek serten provizyon dan sa Lalwa.

Par en poz penalti pour vyolasyon, nou vize pou ranforsi bann mekanizm regilasyon e kontrol, pour promouvwar en sistenm finansyel solid e stab dan Sesel.

Evantyeleman, sa lamannman pe propoz sanzman ki nesese dan Lalwa, pou ranforsi lendependans e lotonomi Labank Santral.

An menm tan ankouraz plis transparans an rapor avek aktivite e loperasyon Labank Santral.

Asire ki labank i kapab akonplir son manda dan en fason efektif, san lenfliyans endezirab par ranforsi kad enstitisyonnel striktir governans Labank Santral.

Nou pe ranforsi son abilité pou pran desizyon, dan pli bon

lentere lekonomi e stabilite finansyel dan pei.

Mr Speaker, latransparans i en konponan esansyel bon gouvrenans ek responsabilite e par amelyor bann mezir latransparans, nou bi se pou batir konfyans dan Labank Santral parmi piblik, e bann *stakeholders* enternasyonal.

Sa bann sanzman i enportan pou asire ki Labank Santral i fonksyonn avek lentegrite profesyonnalizm e responsabilite.

Sa par kontribye dan stabilite e rezilyans an zeneral sistenm finansyel Sesel.

Ler nou armoniz nou kad regilasyon avek meyer pratik e standar enternasyonal, nou demontre nou langazman pou ankouraz en lanvironnman finansyel ki solid e byen reglemante ki siport krwasans e devlopman ekonomik dirab.

Pour konklir Mr Speaker, *Central Bank of Seychelles (Amendment) Bill, 2024* i anglob bann reform konpreansiv, ki vize moderniz e ranforsi loperasyon Labank Santral.

Ler nou amelyor lotonomi finansyel, lendependans enstitisyonnel e kapasite sipervizyon, nou pe pran bann mezir proaktiv pou asir

stabilite, lentegrite e efikasite dan nou sistenm finansyel.

Mon ankouraz tou Manm Onorab, pou byen egzamin e siport sa *Bill* ler nou pe fer zefor pou kre en kad regilasyon solid ki ankouraz krwasans ekonomik, stabilite e prosperite pou nou pep. Mersi Mr Speaker.

### **MR SPEAKER**

Mersi Onorab. Mon annan zis sa 2 Manm ki'n lev lanmen ziske konmela. Onorab Cosgrow, ou annan laparol.

### **HON WALLACE COSGROW**

Mersi Mr Speaker. Bonn apre midi Minis, *Governor* avek zot tim teknisyen e bonn apre midi tou Manm e tou Seselwa ki pe ekout nou apre midi ozordi.

Mr Speaker, mon pou pran laparol apre midi, pou mwan koz en pti pe lo sa *Bill* ki devan Lasanble Nasyonal; annefe en *Bill* ki mon krwar nou'n ganny prepare.

Sirtou bann *Bills Committee* en bon pe lo bann diferan provizyon ki ti pour dan sa *Bill* e ki'n vin dan sa *Bill* devan sirtou *Bills Committee* Mr Speaker.

Mr Speaker, ler nou koz lo Labank Santral e mon krwar Minis, in fer resorti dan son lentervansyon o konmansman

prezantasyon *Bill* - enn bann rol prensipal Labank Santral se pour asir stabilite pri ki dan en fason i pri mondyalman ede pour kontrol lenflasyon dan pei.

Labank Santral i osi azir konman regilater, regilater Polisi monneter en pei e sa i ed li pou li kapab Mr Speaker, fer bann Polisi monneter ki pou bon pou sa pei.

E ki pou annan en *healthy* lanvironnman sirtou *banking* e *hence* Mr Speaker, akoz i neser ki en Labank Santral i reste endepandan e *free from* okenn *Government* sa ki nou apel bann Polisi fiskal Gouvernman.

I reste an deor okenn lenfliyan ouswa konsiderasyon politik okenn Gouvernman. So i enportan sa lendepandans pour li kapab, sa lendepandans ant Polisi Monneter e Polisi fiskal, pour ki napa okenn lenfliyan Gouvernman ouswa lenfliyan politik dan loperasyon Labank Santral, pour li kapab *achieve* son *main goal of* tenir *price stability*.

Me *having said that* Mr Speaker, letan nou get sa Lalwa, i enportan ki sa Lalwa an zeneral li menm i annan bann provizyon ki ozordi pe moderniz lafason ki Labank Santral i *operate*.

Me letan nou pe koz lo lendepandans e lotonomi Labank Santral, nou annan serten petet par egzanz provizyon.

E sa ti ganny fer resorti *panel* mon krwar i ava realize ti ganny fer resorti pandan nou bann deliberasyon letan nou ti pe get sa Lalwa.

An se ki konsern *the total* lendepandans ouswa lendepandans total, lotonomi total Labank Santral, i ti annan serten pti deba letan nou pe koz lo sa lendepandans.

E sa i aparet prensipalman Mr Speaker, dan seksyon 10 sa Lalwa kot nou pe fer lamannman 7A an se ki konsern lenfliyan Prezidan dan lapwentman Tribinal ki kapab pran aksyon avek Gouverner, Depite Gouverner e bann *non-executive directors*.

So a sa lenstans nou konnen poudir Gouverner, Depite Gouverner e bann *non-executive directors* zot bann dimoun ki asiz a latet Labank Santral. E zot bann dimoun ki, ki pran bann desizyon enportan pou Labank Santral.

E si dan sa lenstans Mr Speaker, dan sa lenstans kot nou pe koz lo lendepandans enparsyalite Labank Santral *or* bann Labank Santral an



zeneral, nou ti a kontan ki napa provizyon lenterferans par Legzekitiv.

Mon konnen i bann *wishes* or bann demann ki parfwa i pa tro fasil dan Lalwa pour nou kapab aplik li. Me selman mon krwar *as much as possible* nou devret kapab limit *involvement* ouswa *risk* ki Prezidan - e Prezidan i latet parti politik - i latet en Gouvernman ki ganny elekte par atraver son parti politik.

So, mon krwar i enportan ki letan ki Minis, i fer son larepons i osi donn nou serten lesplikasyon lo la, aköz sa seksyon ki nou pe amande la i tir en ti pe sa lendepandans total Labank Santral.

E zis pou mwan petet fer Lasanble e osi manm piblik konpran en pti pe ki sa seksyon i dir. Prezidan i annan pouvwar pou apwent en Tribinal ki pou *deal* avek sityasyon kot ler Prezidan i santi *or* i petet i vwar an Angle i dir,

*“When it appears to the President that a Governor, Deputy Governor or non-executive director of the Board no longer meets the requirement of his or her office...”* so, i kontinyen, me selman mon pe zis *highlight* sa bout en pti pe pli, pli enportan.

So, i a konsiderasyon Prezidan pour letan i war si Gouverner ouswa sa bann dimoun ki mon’n nonmen, pa pe zwenn petet dapre li bann *requirements of* sa lofis, Prezidan i annan pouvwar anba sa Lalwa pou li kapab konstitye en Tribinal e sa Tribinal i ganny konstitye par Prezidan li menm.

So Prezidan i annan lenfliyans lo konstitisyon la Tribinal. E Prezidan par lefe ki li konstityan Tribinal nou ava espekte, nou ava *wish* ki sa tribinal i en tribinal ki reakte en enparsyel.

Me posibilite i reste kot ler en tribinal i ganny apwente par en Prezidan ki annan serten lenfliyans politik, *then* i riske annan lenfliyans politik antre dan sa desizyon. E lenfliyans politik antre dan lenparsyalite e laliberte Labank Santral.

So pou mwan letan nou dir letan mon’n tann Onorab, lo kote dir ki sa *Bill* i anmenn lenparsyalite *or* laliberte total pour Labank Santral, pou mwan sa seksyon 10 ki la i pe koz en pti pe *against* sa ki nou pe koz lo laliberte Labank Santral.

E sa i sen kosyon petet ki mon ti a kontan Minis i adrese e donn nou lasirans ki sa *clause* ki la pa pour afekte laliberte

Labank Santral an term ki manner i *operate*.

Akoz si demen bomaten Prezidan par egzantp i pa dakor avek ki nou Gouverner ozordi pe fer *or* pe *run* serten - pe *run* Labank Santral *or* i annan serten desizyon ki i pe pran; annou dizon petet Gouvernman i bezwen borrow serten kantite larzan ek Labank Santral.

E Gouverner i santi ki poudir Gouvernman in *over borrow* *or* i pe ariv lo en limit kot i pe met pei dan en sityasyon ekonomik difisil, e Gouverner li pour li *maintain* sa lentegrite monneter, lentegrite bann lenstitisyon finansyel e lentegrite finansyel pei, i pran en desizyon i dir non nou pa pou kapab; *then* Prezidan si li i santi i kapab kriy en tribinal e dir ki, tribinal *assess* travay sa Gouverner ouswa *Deputy Governor*.

E sa i met sa laliberte ouswa sa lotonomi sa Labank Santral en pti pe an ze.

Solman sa i zis en kosyon mon ti a kontan met devan *panel* e devan bann Manm Lasanble e manm piblik ki pe ekout nou, pour zot kapab adrese.

Me Mr Speaker, ler mon ti pe anvizaze koz lo sa Lalwa, ti annan 2 keksoz mon ti anv

prensipalman anv koz lo la. Me avan al lo la, mon pou zis - akoz Minis, in nonm en zafer taler ki mon krwar sa mon ti a kontan zot klarifye petet bann Avoka dan *Chamber* i a kapab osi donn serten klarifikasyon.

Ler Minis, ti nonm sa zafer *cooling-off period* e dan bokou landrwa dan lepase nou'n war sa bann petet dan kontra lanplwa.

Par egzantp kot en dimoun i mete i dir, si ou'n travay dan tel lorganizasyon ou pa ganny drwa pran lanplwa dan en *similar organisation* petet pou a lespas 1 an akoz nou pe fer - mon ti en regilater so nou pe fer preski menm travay. *Or* bann lenformasyon ki ou'n anmase kot mwan ou kapab al servi lo kont mwan dan sa lorganizasyon.

Bokou sa bann *clause* dan sa bann Lalwa, dan sa bann kontra, in ganny war konman bann *anti competitive clause*.

E osi bann *clause* ki kont laliberte en dimoun pour pran en lanplwa. E nou Konstitisyon ozordi Mr Speaker, i garanti tou Seselwa en lanplwa pour travay e pour kapab partisip dan devlopman son pei.

So ler mwan, mon get sa *clause* pou mwan i al kont; annefe pou mon i al kont nou

Konstitisyon e petet Minis, ouswa *Governor* i kapab klarifye apre si sa i en pratik dan bann lezot Lalwa *Central Banks*.

Si i en pratik akseptab. E si i en pratik ki nou, nou krwar nou devret pe anmenn li dan nou Lalwa ki nou pe *deal* avek ozordi.

E prezan Mr Speaker, mon pou troun lo sa 2 pwen ki mon ti a kontan koz lo la. I relye avek *Bill* dan sans kot nou pe koz lo fonksyonman Labank Santral, me i pli relye Mr Speaker, avek 2 *issues* ki ozordi mon krwar bokou nou bann sitwayen pe koz lo la.

E i afekte bokou, bokou nou bann sitwayen Mr Speaker, e mon krwar Labank Santral a en serten pwen ansanm avek Gouvernman, zot bezwen rod serten fason pou adres sa 2 *issues*.

Limero 1 Mr Speaker, i konsern sa zafer *due diligence* letan pe ouver en kont labank e osi sa bann *KYC processes* ki sitwayen i bezwen pas atraver preski tou le lannen si mon pa tronpe.

Kot bann labank i konmans demann zot kote ou reste, kan ou ti ne, eksetera, eksetera malgre mon lanmenm, mon ti ne menm dat, so tou le

lannen ou bezwen *supply* menm lenformasyon.

Konmsi mon'n ne le 7 Desanm mon lot lannen i pa pou sanze i pour le 7 Desanm menm li. Me selman - me selman labank i kontinyelman demande e ozordi Mr Speaker, sa pe kre en pake problemn pour bokou nou bann sitwayen.

Sirtou bann sitwayen ki pli aze, bann sitwayen petet avek serten dezavantaz dezabilite, ouswa en pti pe mwens abilite entelektyel konpare avek lezot.

E ozordi en fardo si mon kapab dir, pour ki tou la zournen labank e parey mon pe dir tou le lannen labank pe demann ou tou sa bann lenformasyon. E ou bezwen kontinyelman ale, al rod sa bann lenformasyon zis pou fer sir ki ou reste azour *or* ou reste *compliant* avek sa ki *requirements* ki sa labank pe demande.

E mon sipoze sa bann *requirements* i bann *requirements* ki Labank Santral i met lo sa bann labank, an relasyon avek bann Lalwa ki pei in sinyen par egzanp.

Enn bann Lalwa ki enportan ladan se Lalwa kot blansisaz larzan. E nou'n war Mr Speaker, en bon pe sa bann

lamannman dan sa bann Lalwa par egzanp blansisaz larzan, in vin apre ki par egzanp ti annan en *Private Members Bill* ki ti anmenn dan sa Lasanble, kot ti annan serten Lalwa kot bokou larzan ti sorti dan pei ti ale.

Bokou larzan ki *FIU* ti'n sezi akoz ti annan serten souspisyon lo la, larzan ti kit pei e prezan nou'n bezwen ranforsi sa bann *AML* Lalwa, pour fer sir ki sa bann keksoz pa arive.

E prezan sa ki'n ganny fer sa bann letan, ozordi pe afekte nou Seselwa senp ordiner ki li zis i anvi kit en kont labank li. I zis anvi kit son kont labank, akoz ler i napa en kont labank, kot Lazans Proteksyon Sosyal i dir li koumsa i pa pou kapab pey li ; tou son larzan fodre pas dan en kont labank.

Son anplwayer i dir ek li « mon nepli pey *cash* ». Gouvernman pe pou en Polisi *Cashless* ; Labank Santral li menm pe ankouraze Minis, in dir dan son lentervansyon kot nou pou bouz *less* larzan likid, larzan *cash* e nou pou bouz ver *digital currency*.

So dan tou sa bann zefor ki nou pe sey fer, me solman nou annan bann gro, gro montanny pour nou sitwayen ordiner kapab vin en *bank*

*customer*, i war li difisil, akoz i annan tou sa bann *hurdles* ki i bezwen sote pour li kapab vin en *bank customer*.

Me *at the same time* nou bann Polisi pe dir poudir fodre ki nou annan plis *bank... the population has to be - the percentage of* popilasyon i bezwen plis ver labank.

Nou pe dir ki bann tranzisyon i bezwen ganny fer plis atraver bann fason elektronik, *but at the same time* nou annan sa bann *process*.

So mwan, mon anvi ki zot dir mon sa Lalwa ki la ki manner i pour ede *ease* sa *process* pour Seselwa; kot nou pa bezwen ganny sa bann latet fermal tou lazournen, pe al dir nou ti ne le 7 Desanm 1978 tou le lannen.

*I mean* Konmsi i ti kapab zis azoute poudir lannen prosen konmsi i ganny 45 an, 46 an, 47 an, ou konpran? Zis konmsi sey fer li en pe otomatik ki tir sa problem lo nou sitwayen. Sa i enn Mr Speaker, e mon krwar sa i en konsern bokou, bokou, bokou nou bann sitwayen.

Dezyenm Mr Speaker, ki mon ti a kontan petet Labank Santral atraver son bann nouvo manda ki sa Lalwa pe donn li i adrese.

Sa i en problemn ankore mazer, *well* pa mazer, me solman i en problemn pou en kantite nou bann sitwayen. Pli ale pe vin less and less, akòz dimoun i aprann zot leson me *still* i en problemn. Sa problemn *guarantor* Mr Speaker.

Sa problemn *guarantor* ozordi Sesel e apepre 2 semenn pase mon'n ganny en madanm ti pe koz ek mwan lo telefonn in... konmsi in dan problemn, in perdi lespwar li menm.

E mon ti sey fer serten kontak avek *Central Bank* pour gete kwa ki sa madanm i kapab fer.

Ozordi i annan en kantite bann labank e mwan, mon ti a kontan ki *Central Bank* i ranforsi zot bann petet zot bann Polisi anver bann labank. Pour fer ki bann labank dan mon pwennvi mon pou servi en term la - i aret pares. Akòz ozordi mon dakor wi mon'n siny en dokiman konmkwa mon'n *guarantor* swa Onorab Spiro la konman en frer, ser, zanmi, mon'n *guarantor* li pour li pran en *loan* e mon konpran lobligasyon as a *guarantor*.

Me ozordi Mr Speaker, *well* pa ozordi en bon pe letan - bokou sa bann labank *or* si pa tou sa bann labank Sesel, zot fer louvraz en pti pe pares.

Sa dimoun ki pa pe pey sa *loan* i al Sesel, i fer letour i vire, i marse, i al anvil, i servi son kart dan *ATM* nou tou nou konn li, nou tou nou war li. I annan transpor, i annan son lakaz i annan tou keksoz e ozordi labank i rod sa semen pli fasil pour li rekouver son larzan.

I annan aksyon legal ki ou kapab pran ; i annan diferan avenir ki ou kapab pran pou ou kapab deal ek sa dimoun ki'n pa'n pey son *loan*.

Ankor mon dir Mr Speaker, konman en garanter ou konn ou lobligasyon. Vre ou annan ou lobligasyon, me ou espekte ki sa labank i fer tou, i egzos tou posibilite, tou posibilite anmas sa larzan avan i vin kot mwan.

Mwan konmsi mon ava vin *the last resort*. Mon pa kapab mwan, mon pe pey R100 mil en dimoun ki annan en manman lakaz lo montanny, ki pe mars dan en loto R500 mil, i pa fer sans ou konpran?

Si sa dimoun demen bomaten ti'n deklar *bankrupt*, i napa naryen, i pe mars nipyen anvil san lenz, mon konpran mon ava antre, akòz i en lobligasyon.

Me mon pa kapab mwan, mon pe mizer sa dimoun pe kontinyen akimil larzan.

Solman mon ti ava kontan Mr Speaker, sa bann nouvo responsabilite i ozordi Labank Santral i gannyen anba son Lalwa - sa bann lamannman zot met bann Polisi en pti pe pli *strict*, pli ferm ek bann labank, pour zot kapab rekouver bann larzan petet ki pa ganny peye atraver bann dimoun ki'n pran bann *loan*.

E mwan, mon krwar si nou nobou fer sa Mr Speaker, e la mon krwar en kantite Seselwa ki pe ekoute, si nou nobou fer sa nou pour annan en kantite *happy customers*; kantite dimoun.

Akoz pa bliye Mr Speaker, mon pou retourn lo la ankor, sa zafer kot mon'n *guarantor* ou, ou pa'n peye i al osi afekte ler mwan, mon pou rod en *loan* lo *CIS*.

I afekte. I annan dimoun prezan li i anvi pran en pti *loan* pour li aste en pti keksoz kot li i pa kapab pran, akoz in azir de bonn fwa, in ed en lot. E labank li i deside poudir mwan, mon pa pe al Ankour mwan, mon pa pe al isi, mon pa pe al laba, mon pa pou sezi ou loto, ni nou lakaz, mon pour vin direk lo sa dimoun ki pe ganny R10, R15 mon pou tir R5 mil lo li e li i pou pli mizer sa enn pour kontinyen marse.

So mon enplor zot ozordi e Seselwa pe ekout nou, mon enplor zot pour zot rod bann fason, rod bann mekanizm kan manner nou kapab fasilite lavi Seselwa.

Sirtou bann ki'n war zot pri dan bann sityasyon *guaranty* e ki zot napa en solisyon zot pa konnen ki manner pou sorti.

So Mr Speaker, parey mon'n dir mon konsantrasyon lo sa Lalwa se enn ki plis tous pep Seselwa lo 2 *issues*. Sa *issue guarantor* avek sa *issue* kont labank, bann *KYC* ek bann *due diligence* ki bezwen ganny fer ler en dimoun pe ouver, avek ler en dimoun in fini ouver en kont. Bann *constant KYC* ki bezwen ganny fer a longer ditan.

So avek sa Mr Speaker, mon *hope* ki zot kapab donn mon serten laklerte ozordi. Petet zot pa kapab donn en solisyon, me solman en serten laklerte, ki mon a kapab mwan e osi Lepep Seselwa i a kapab ganny serten soulazman an se konsern sa de *issue* Mr Speaker. Mersi bokou.

### **MR SPEAKER**

Mersi Onorab. Onorab Pillay ou annan laparol?

**HON SEBASTIEN PILLAY**

Mersi Mr Speaker. Mon a osi swet la byenveni *panel* ki dan Lasanble Nasyonal, Minis e Gouverner Labank Santral e bann *staff* e *panel* ki prezan. E dir bonn apre midi osi tou koleg Onorab e tou dimoun ki pe swiv nou deba.

Mr Speaker, mon'n pran letan pou mwan regard sa Prozedlwa ki devan nou e mon annan serten kestyon pertinan *as to* merit serten provizyon dan sa Prozedlwa, ki nou kapab ganny en serten leksplikasyon avek *panel* ki devan nou.

Mon oule premyerman Mr Speaker, fer referans avek en dokiman ki en *technical assessment report* ki koz lo *stress testing* dan *Central Bank balance sheet* an Novanm 2023 ki ase resan.

E dan sa dokiman Mr Speaker, i annan serten keksoz ki mon santi poudir serten keksoz ki nou pe fer la pa adres serten keksoz ki'n ganny war dan sa dokiman. Mon ti a kontan klarifye akoz sa i leka. I si oule en depar *from* sa *stress test* ki ti ganny *carry out by* mon a ganny korize si mon mal - *IMF* ki ti fer sa.

Mr Speaker, apard lezot keksoz sa tes in koz lo bann risk ki asosye avek *financial*

*reporting* ki *Central Bank* i fer lefe ki *financial strength* *Central Bank* i ganny ekspoze avek bann risk lenflasyon e nou osi annan en- i osi ganny demande ki en *efficiency review* i devret ganny fer pou idantifye bann *operational expense savings and cost recovery options*, ki mon pa vwar sa Lalwa in adrese li menm.

Annefe, ler mon pe regard sa Lalwa i pe plito enpoz lezot *operational cost* lo *Central Bank* ki pa ti la oparavan. E sa pou mwan i *raise* en konsern vizavi merit serten provizyon dan sa lamannman, ki mon ti a santi poudir i al dan lespri sa dokiman.

E si mon pa tronpe mon ti deza osi partisip dan *interview* koman Chairman *FPAC* regarding sa, kot *Central Bank*. So se pour sa rezon ki mon war keksoz i en pe en pti pe en depar *from* sa ki mon ti war.

Mr Speaker, en lot keksoz ki mon'n war ki Gouvernman i deza pe fer, i annan sa *multi budgeting planning* ki deza pe ganny fer depi avan Gouvernman avan in komanse. Me en eleman enteresan se i koz lo en *capital injection* ki neserer pou *strengthen balance sheet* Labank Santral.

E sa i pou arive a tou moman ki nou annan en serten sok ki vin lo nou lekonomi. Me mon pe regard sa Lalwa e mon pe regard serten provizyon. Par egzanp i koz lo *authorized capital of the bank*, dan plas ki sa desizyon an sa ki konsern kapital ki ganny otorize par labank, ganny decide par labank li menm, i senpleman *only* ganny propoze par labank me ganny aprouve par Gouvernman.

*Now*, mon napa problem ek sa, me aprouve par lekel dan Gouvernman? Aprove par *Cabinet*, aprouve par Minis? Me si sa i leka eski pa i devret baze lo sa *stress test*, en desizyon ki *Central Bank* li menm i pran baze lo son *risk assessment* ki li in fer a sa moman.

E se pour sa rezon ki mon dir, mon pa pe ganny en konpran serten provizyon dan sa Lalwa vizavi serten keksoz ki'n ganny dir dan sa *assessment*. Mon prezimen *IMF* in bezwen fer sa *stress test* baze lo tou lenformasyon a son dispozisyon a sa moman.

En lot eleman enportan Mr Speaker, i koz lo serten travay *Central Bank*, kot byensir nou bezwen aksepte poudir nou bann *staff* nou bann dimoun ki travay *Central*

*Bank* i parmi bann ki pli kalifye ki nou annan dan nou pei. Zot in bann dimoun ki'n avek bokou leksperyans e nou apresye sa.

Me lefe i reste ki ozordi apre midi mon bezwen demann mon lekor, eski sa i vreman desizyon *Central Bank* serten sa bann provizyon antyerman *or* serten desizyon i bann desizyon Minister Finans baze lo Polisi ki Gouvernman i oule pran ?

Mon napa problem ek Gouvernman pran son Polisi mwan Mr Speaker. Sa i desizyon en nenport ki Gouvernman pou li pran, me nou ti'n agree poudir serten eleman i bezwen reste anba kontrol bann antite ki neser pou delivre lo sa fonksyon e dan sa ka spesifik nou pe koz lo *Central Bank*.

Mr Speaker, si ou a permet mwan prezan, lefe ki mon'n servi sa dokiman pou parantez serten mon bann largiman, mon pou osi al lo serten provizyon ki egziste dan sa Lalwa, ki pou mwan i ranforsi si oule konsern ki mon annan vizavi pozisyon ki nou pe pran. E si oule dan konteks operasyonnel *Central Bank* i annan en lenpak lo merit e prensip zeneral sa Prozedlwa.



Mon ti a kontan ganny en leksplikasyon kler lo, akoz ki nou'n vwar li neseser pour ki en Tribinal endepandan i ganny etablir an sa ki konsern *Board* en antite ki nou tou nou'n agree poudir ki son fonksyonman *if it ain't broke don't fix it that's the way I see it*. In fonksyon byen, in nobou fer son travay.

Me akoz entrodwir en provizyon preziman Mr Speaker, dan seksyon 6, *sorry* dan pre seksyon 10 ki pe koz lo apwentman en Tribinal. Me sa ki pli konsern mwan Mr Speaker, se prefas sa apwentman sa Tribinal i kan Prezidan i santi.

Mon ti ava ekspekte ki nou presize dan sa *clause*, ki i annan en determinasyon ki ganny fer e sa determinasyon parey an sa ki konsern pou *remove* en *Ziz* par egzanp atraver SCAA, i annan tout en prosedir ki ganny fer.

Akoz la nou'n *set the bar very high* pou met en dimoun lo *Board Central Bank*. Apre tou nou pa met nenport ki lo *Board Central Bank*.

E nou'n dir ki bann konpetans ki bann abilite ki sa dimoun i bezwen annan pou vin lo en *Board Central Bank*. Me sa Tribinal i al pli lwen, akoz i

menm kapab retir lezot pozisyon dan *Central Bank*.

Me sa ki pli enteresan ler nou koz lo lendepandans *Central Bank*, se Prezidan ki pou determin reminerasyon sa Tribinal ki li i pou apwente me ki pou ganny peye par *Central Bank*. Sa Tribinal pou ganny peye atraver larzan sorti dan *Central Bank*.

Mon vwar sa en pe drol Mr Speaker, akoz zisteman eski Prezidan i kapab desid lo ki mannyer labank i servi son larzan pou konpoz en Komite. Mon pa pe koz lo Prezidan aktyel, mon pe koz lo nenport ki Prezidan ki pou vini. Akoz sa enn probableman i riske pe ale byento. *Sorry* Mr Speaker.

*(comments off-mic)*

### **HON SEBASTIEN PILLAY**

Mon pa pe koz lo Prezidan aktyel - mon pe koz lo nenport ki Prezidan, dan lesansyel ki sa largiman i prekonize ki nou vwar i dir poudir Prezidan pou determin larzan ki sa bann dimoun lo Tribinal pou ganny peye, me sa bann dimoun pou ganny peye atraver Labank Santral.

En lot pwen ki in fer mwan soulev serten konsern vizavi lendepandans Labank Santral

Mr Speaker, se si konsern lamannman ki'n ganny fer dan seksyon 6.

Ankor enn fwa Mr Speaker, mwan mon napa okenn dout ki san sa Tribinal e si nou kapab *within Central Bank* prekoniz en metod ki *Board* i servi pour *adjudicate* e *setup* en *body* endepandan li menm, mon pa war okenn dout ki *Central Bank* i kapab *fulfil* son fonksyon avek bann dimoun ki pe travay dan *Central Bank without* ki en Prezidan i bezwen vin enterfer dan sa ki pe ganny fer. Me selman nou problem ki nou annan, se ki Lasanble pe ganny demande pou aprouv sa Lalwa ki manner i ete.

Mr Speaker, mwan si ti napa sa *clause* mon ti pou napa okenn rezervasyon pou mon dir wi. Mon pa pe dir non me mon ti a kontan ganny en leksplikasyon lo aköz i neseler dan sa moman dan legzistans Labank Santral, pou al dan en tel direksyon.

En lot eleman ki neseler pou nou gete Mr Speaker e mon'n tous lo la se sa ki konsern *the authorized capital of the bank* ki mon'n mansyonn lekel ki aprouve. Mon ti a kontan ki Minis petet i fer li kler pou nou la, dan langaz fasil eski

ou pe kre en kondisyon ki fer li pli fasil pou Gouvernman pret larzan ek Labank Santral?

Eski sa ki direksyon ki nou pe ale? E si dan sa konteks nou pe fer li pli fasil pou Gouvernman pret larzan avek Labank Santral, eski i vedir a sa moman ki Gouvernman pe pret larzan avek Labank Santral e ki nou dan serten problem ekonomik?

Mon pe demann bann keksyon Mr Speaker, aköz i neseler pou nou edik popilasyon la deor. En lot keksoz ki enteresan Mr Speaker, i konsern sa *distributable earnings* ki ganny transfer dan *Consolidated Fund*.

So ki problem ki annan avek sityasyon aktyel, ki fer ki nou bezwen entrodwir en tel provizyon? Eski sa i an relasyon avek en tel *assessment* in ganny fer? Oubyen eski i en desizyon Polisi ki Gouvernman in diskite avek *Central Bank* e ki *Central Bank* i *then agree*?

Mon pa oule servi sa mo enpoze *because that would impute* ki bann dimoun ki travay *Central Bank* pa debout e pou defann zot teritwar, me i posib ki Gouvernman i annan serten desizyon ki i oule pran e ki pe anmenn li dan sa laliny.

Pou Lasanble Nasyonal Mr Speaker, dan en Lalwa ki sitan teknik, i difisil pou nou kapab etabli si i annan en lapo bannann ki oule fer nou glise lo la e ki apre nou war en sityasyon ki vini e i en konsern lezitim ki nou annan.

Ziska la Mr Speaker, mwan mon pozisyon in toultan ki *Central Bank* i bezwen reste en *hands off* akòz zisteman i bezwen lendepandans pou li fer son fonksyon, zis parey *The Federal Reserve* Lanmerik i fer pou li.

Si mon pa tronpe se Mr Alain Greenspan ki'n pandan bokou lannen, ki mon rapel byen ti en bann *Chairman of the Fed* e sa msye ti annan pouvwar total - *in fact* plis pouvwar ki Prezidan an sa ki konsern okenn keksoz ki annan pou fer avek Polisi Monneter Lanmerik.

E mon ti a kontan ki nou mentenir menm pozisyon, me ler mon santi- ler mon vwar poudir nou pe kre kondisyon ki en lot dimoun i kapab enterfer dan fonksyonman operasyonnel en labank, dan lesans ki retir en dimoun, i kre kondisyon pou mwan annan serten konsern.

E mon ti a kontan Mr Speaker, ki Minis ki mon

konnen in travay dan Labank Santral, i a kapab eksplik nou rezondet deryer annan en tel provizyon dan Lalwa e akòz i nesese pou nou al dan sa direksyon.

An konklizyon Mr Speaker, lo baz pou nou fer *Central Bank* vin pli fonksyonnel, vin pli for, mon napa problem ek sa mwan. Me i annan serten keksoz ki nou ti a kontan ki nou, nou bezwen fer sir ki nou klarifye e ki nou met keksoz kler pou Lepep Seselwa.

Par egzanp Mr Speaker, dan lamannman lo seksyon 12 Mr Speaker, les mon a ganny li byen, *sorry* Mr Speaker pa seksyon 12, me dan lamannman ki pe ganny propoze, i annan en *clause* ki dir ek nou koumsa poudir lapey Gouverner oubyen okenn Manm *Board* Labank Santral pa pou sanze, pa pou zanmen ganny redwir.

*Now* sa pou mwan i *ensure security of tenure* e i donn en serten garanti zot pozisyon.

Admeton nou annan en kriz ekonomik dan pei e dan sa kriz ekonomik - i annan pei in pas ladan resaman - en desizyon in ganny pran ki saler tou dimoun i bezwen ganny redwir e *Central Bank* menm ki riske pe vwar poudir ki sa

desizyon i bezwen ganny pran.  
Ok?

Now be si *Central Bank* li i annan en *clause* ki dir ki saler son bann dimoun pa kapab ganny redwir, be selman i kapab fer desizyon pou redwir saler lezot dimoun? Mon pe sey ganny en konpran ki mannyer le 2 i rezwenn ek kanmarad si en desizyon koumsa i ganny pran.

Mon konpran aköz nou bezwen annan sa bann *clauses*, pou protez sa bann pozisyon i fer sans, aköz la nou pe koz lo bann dimoun ki *highly marketable* ki fasil pou zot ganny en louvraz en lot landrwa. Zot annan bann kapasite ki zot kapab ale ou bezwen retenir zot e ou bezwen annan bann *Retention Schemes* ki ou met an plas, napa problem ek sa.

Me lefe i reste *on a basis of fairness* saler tou larestan dimoun i kapab ganny redwir e saler en dimoun ki pou Labank Santral dan sa bann pozisyon, pa pou kapab ganny redwir. So nou ti a kontan ganny en leksplikasyon *for the common men on the street* pou li konpran aköz ki sa pe ganny fer dan sa fason.

Mon termin lo sa not Mr Speaker, i osi annan en

provizyon dan sa Lalwa kot se, mon dir sa dan sa fason pour ki nou konpran aköz ki mon pe prezant sa largiman koumsa.

Mwan mon santi poudir ou annan Egzekitif, ou annan Lezislatif e ou annan Zidisyer, apre ou annan bann lenstitisyon ki debout a kote zot e ki siport zot bann fonksyon. *Central Bank* pa devret zanmen vin en antite ki tro konekte avek *either of the 3*, aköz sa i garanti son kapasite pou li fer bann desizyon.

Me ler nou met bann laliny ki komans entrodwir bann kontrol, mon santi ki Prezidan *set up a tribunal* i en kontrol. Mon santi ki Prezidan *set* saler pou Gouverner avek lezot dimoun *without mention of financial policies or policies of the bank* i en kontrol. Pou mwan mon pa war sa pe al dan en bon direksyon.

Mon ti ava prefere pou vwar ki *once* ou'n apwent en manm dan *Central Bank*, i pa vedir i en *Wild West because they would be held accountable for the economy of the country* si i *fail, obviously* e sa bann dimoun i pa dan *business fail* dan zot louvraz aköz i ganny *looked upon* dan en fason, zot annan-zot form par en *community of practice* ki *well regulated*, ki

annan dimoun ki regarde e ki nesese pou zot kapab delivre lo zot louvraz.

So mon konsernen avek sa lapros ki nou pe pran pou annan kontrol - pou annan- ki kapab depandan lo en endividi ki pe *exercise* en pozisyon *exercise* plis kontrol. So sa mon konsern ki mon annan lo merit sa Lalwa e ki mannyer sa Lalwa pou ganny enplimante pli tar.

Mr Speaker, mon termin la e mon swete ki *panel*, Minis, i ava kapab donn nou serten leksplikasyon oubyen serten garanti oubyen serten lasirans vizavi serten pozisyon kle ki pe ganny pran dan sa *Bill* e bann konsern ki nou'n souleve. Mersi Mr Speaker.

### **MR SPEAKER**

Mersi Onorab. Laparol pou Onorab Loze.

### **HON JOHAN LOZE**

Mersi Mr Speaker. Mr Speaker, nou pe viv dan en moman difisil, pa nesese man akòz nou ouswa akòz nou aksyon, me lafason ki sityasyon global i ete i fer ki keksoz i vin difisil pour tou dimoun.

E si i annan en lenstitisyon avek son dirizan ki'n prouve ki zot posed lentegrite, zot posed kapasite e

ki zot kapab debout koman en *beacon* lespwar pou Seselwa dan bann moman difisil, se Labank Santral Sesel.

E zot in monte nou sa *time and time again* depi kriz 2020. Zot in osi montre nou sa swivan reform ekonomik 2008 an montan, akòz zot in kontribye anver bon zesyon lekonomi pei.

Mr Speaker, mon koz lo sa bout akòz i relye avek bann provizyon ki osi dan Lalwa. Minis in koz lo davans ki Labank Santral i kapab donn Gouvernman e in osi koz lo lasistans finansyel irzan pou bann labank ouswa *Credit Union* ki Labank Santral i kapab donn bann labank.

E sa 2 provizyon i ankadre sa kote *lender of last resort* ki ganny reprezante par en Labank Santral, kot i annan li en fonksyon pou anpese ki son sistenm finansyel i *fail* par mank kapital, mank likidite dan lekonomi.

E 2020 an montan, i enportan note ki Labank Santral in zwe son rol byen; sitan byen ofet ki dan Lalwa la pe fer provizyon ki kapital debaz Labank Santral i bezwen ogmante pou vin R550 milyon si mon pa tronpe.

E nou annan nou en lenstitisyon, ki nou pa kapab

*fault* li, nou pa kapab kestyonn li dan lafason ki i debout a kote nou koman en pep letan nou dan difikilte.

Me kestyon pourtan i la pou ganny demande e ler in ariv ler pou poz kestyon, nou bezwen demande. Labank Santral pe fer provizyon pou li ranforsi son sistenm lodit entern.

E vwayan lakantite sonm ki Labank Santral i trafik avek, sa i en keksoz dan sa Lalwa mon kapab dir i *very recommendable*, zot devret fer e nou felisit zot pou pran sa bann tel lepa pou garanti zot bann sistenm entern e fer sir ki i osi for ki i kapab ete e i devret ete.

Mr Speaker, *however*, koman en pep nou annan konsern pli larz osi e Onorab Cosgrow in tous lo serten pwen taler. Labank Santral i annan li osi rol regilater lo sa group *cowboy* ki apel bann Labank Komersyal e i annan en santiman parmi nou pep ki de fwa Labank Santral pa fer ase.

Labank Santral i en pe *hands off* e in les keksoz arive ki avek dimoun dan en tan normal i pa en gran konsern, me dan bann moman difisil dimoun i santi douler. Mon a donn en senp legzanp.

En dimoun i fer li en transfer le mwan, pou met en larzan dan son kont, dan en dezyenm kont kot i pa pou touse pou li met en *savings*; arive ki son *paymaster* i ganny en retar dan met son saler dan son kont.

Son saler i antre an retar, zour son *Standing Orders* pou pase i napa larzan dan kont, akoz son saler in antre an retar - son labank i penaliz li R350 pinisyon akoz ti napa larzan dan son kont lo en transfer ki pou son prop *savings*. I pa en det ki i dwa labank, i pa pe fer en repeyman *loan* zis i pe tir larzan dan en kont i pe anvoy dan en lot pou li sey fer en *savings* R2 mil par mwan.

Lo R2 mil i ganny penalize li R350 akoz ti napa larzan dan son kont. Zour son larzan i antre labank i fer sa transfer e i *still* sarz li son R50 *fee* ki i ti pou sarze *anyway*. Nou trouv nou dan en sityasyon kot sa Seselwa ki sa sityasyon i arive ek li, i vwar li *powerless*. I fermal pou li akoz i pe sey fer en pti *savings* e i pa konnen kot i pou trounen li kot i pou al kriy lasasen.

E ozordi mon oule profite ki Gouverner i la devan nou, Minis i la, sey enplor zot be fodre aret en pe sa bann keksoz si kapab otan ki kapab avek sa

bann gran lenstitisyon. Zot pa kapab asize zis fer *free money* lo ledò dimoun koumsa. Nou bezwen en pti pe plis *customer protection* pou kliyan bann labank.

Mon konnen Labank Santral in anmenn serten lezislasyon deza. Zot in fer serten bon lepa, mon pa pe *fault* zot mon pe zis met a zot latansyon selman ki i annan sityasyon nwizans ki labank i kree.

Posibleman serten sa bann nwizans parey bann ki Onorab Cosgrow in leve, i osi annan pou fer avek bann lezislasyon ki nou, nou pase isi dan Lasanble Nasyonan sirtou an relasyon avek bann rekomandasyon FATF.

E de fwa sa bann zafer i arive akòz i zis lenterpretasyon labank. Mon dir lenterpretasyon labank akòz ou al dan en labank i dir ou sa, ou al dan en labank i dir ou dan en fason ki *slightly different* e enn li i *end up* pe nwir son kliyan.

Prezan kestyon ki dimoun i koze, lekel ki *regulate* bann labank an relasyon avek sa bann lezislasyon ki nou dan Lasanble nou pe pase?

Lekel ki enstrir zot, edik zot e fer sir ki zot tou zot

*conform* e zot pe delivre menm servis pou nou pep?

E osi sa bann zafer kot labank ou son kliyan, i fer ou fer sa bann KYC ou vini ou fer son KYC apre zour ou annan en tranzaksyon pou fer i komans demann ou kopi kart idantite in *triplicate*, kopi sepa kisisa in *triplicate* ranpli form, in *triplicate*.

*And God forbid* si ou pa mank en dokiman parske la ou pou soufer la, selman in fek fer ou fer KYC li, i annan ou kart idantite *updated* lo son *file*. I annan tou ou dokiman tou ou lenformasyon lo son *file*, be foutou akfer ou'n fer mon fer KYC? Apre pou ou vin nwir mwan ankor?

*There again* si ti posibil silvouple Labank Santral sey *step in on behalf* sa pep. Mon konnen mon pe met en pe bokou lour lo zot be selman *there again* zot ki regilater bann labank.

Mr Speaker, i annan en pti pwen mon ti a kontan profite koman Minis i la pou mon lev avek li.

Minis, mon'n tous lo pwen bann rekomandasyon FATF e bann Lalwa ki vin an relasyon ek FATF, nou konnen an Septanm toultan in annan irzans. Mon lo *Bills Committee*

napa okenn *Bill* devan nou apard VA - napa ni enn.

E Lasanble pe al dan recess li, Septanm pou vin an tayan pou dir nou pas *Bill* deswit akoz i irzan. *So anyway*, Labank Santral li in anmenn pou li boner e annord in ganny letan fer konsiltasyon.

Mr Speaker, mon lot pwen ki mon ti oule touse se laliberte e lendepandans Labank Santral. Nou annan nou en pep ki pa krwar dan son Gouvernman. Ofet i pa krwar dan en mo ki son Gouvernman i dir. Par kont Lepep Seselwa i port atansyon letan ki Labank Santral e son Gouverner i koze. I port atansyon, i ekoute akoz i annan konfyans dan sa ki Labank Santral i dir.

E sa i enportan. I enportan akoz i ed Lepep Seselwa i gard konfyans dan lekonomi Sesel e i ed bann lenvestiser, bann biznesmenn, bann lantreprenner pou zot osi gard konfyans dan lekonomi pei - *at least* i annan en akter ki zot kapab ekoute.

I annan sa pwen ki Onorab Cosgrow e Onorab Pillay in tous lo la ki konsern sa Tribinal. E determinasyon par lekel ki sa Tribinal pou ganny komanse ki se sa rekomandasyon ki sorti kot Prezidan.

La i vin en konsern e i lev en kestyon pou nou lo sa kote latab. Nou annan nou *genuine concerns* lo sa size. Eski sa i en *attempt* pou annan kontrol lo Labank Santral? Akoz mon pou dir zot mwan, i annan dimoun pou dir ou Labank Santral i silans. I annan en pe letan Labank Santral i silans lo bann keksoz ki pe deroule lo lekonomi Sesel.

I annan dimoun i dir ou lontan Labank Santral ti koz bokou, konmela zot koz mwens. Pei in stabilize alors Onorab Woodcock, *very good*.

E kestyon ki pep i demande, se si i annan *attempts* pou enterfer avek laliberte, lendepandans e lekspresyon Labank Santral?

Be si i annan bann tel kestyon, mwan personnelman mon santi ki okenn sanblans i devret ganny efase. Ni menm sa morso dan sa lezislasyon kot i dir ou Prezidan pou inisyé en Tribinal i pa devret la.

Akoz i anvoy en move mesaz, i anvoy mesaz dan en move direksyon ki annan a fer avek en lenstitisyon ki tou dimoun dan sa pei i respe li.

So si i annan serten keksoz ki nou bezwen rektifye, nou kapab rektifye, silvouple



mon swete ki nou a kapab rektifye li. Mersi Mr Speaker.

**MR SPEAKER**

Mersi Onorab. Mon pe regard ler nou apepre 1 erdtan edmi depi ler nou pe asize e mon krwar nou *deserve* en *break*, so nou a pran en poz la.

Mon ti a kontan ganny non bann Manm ki pou entervenir ankor silvouple lo sa *Bill*, mon annan Onorab Georges ek Onorab Woodcock. Setou? Bon, nou a pran sa 2 apre, e apre nou a kapab pran repons Minis. Mersi nou a pran poz e nou a rebran 4 er.

***(BREAK)***

**MR SPEAKER**

*Salut tout le monde.* Nou'n pare pou rebran. Laparol i pou Onorab Bernard Georges.

**HON BERNARD GEORGES**

Mersi Mr Speaker. Mr Speaker, mon pran laparol apre midi pou dir 2 mo lo sa lamannman. E parey mon fer sak fwa ki nou koz lo Labank Santral, mon bezwen deklar mon lentere aköz mon Biro Avoka i pou le moman e *External Advisor* Legal pou Labank Santral. Me napa naryen pou fer avek sa *Bill* ki i an deor nou domenn travay.

Mr Speaker, mon kontan Lalwa ki amann en lot Lalwa. Aköz sa i montre sa lenstitisyon i pe anmenn sa lamannman i en lenstitisyon ki pe travay e ki pe mazine ki mannyer pou *improve* son performans, *improve* son kad legal e fer ki i vin pli performan.

E sa Lalwa ozordi i pa en leksepsyon a sa lareg, aköz parey tou bann manm ki'n koz avan mwan in dir sa Lalwa sa *Amendment Act*, sa *Amendment Bill* i devan nou ozordi, in tous plizyer landrwa lo Lalwa Labank Santral.

E dan tou sa bann landrwa ki i touse i amelyor sa ki ti la deza aköz an mezir ki nou progrese dan lavi, ou bezwen *keep up to date* avek bann sok, oubyen bann sityasyon entern e ekstern.

E bann amannman ki dan sa Lalwa ozordi, napa enn ki mon vwar ki i an tro oubyen i pa ti devret la.

E mon felisit bann dimoun ki'n travay lo sa Lalwa. depi Gouverner, Minis, bann *Legal Section* Labank Santral e Mademoiselle Jean- Mrs Jean, kot Biro *Attorney Zeneral*, pour ki zot in anmenn en Lalwa devan nou ozordi ki pa'n lev okenn kontrovers mazer e sa toultan i en bon siny.

E mon pa oule apre midi ki sa ki mon pou dir i ganny pran dan en fason *autre* ki pozitiv. Mr Speaker, Labank Santral in sibir en levolisyon pandan son legzistans, e mwan mon'n touzour en dimoun in enterese avek Labank Santral - mon pa konnen aköz, aköz finans pa enteres mwan ditou, lekonomi pa enteres mwan ditou.

Me mon kontan sa nosyon ki i annan en lenstitisyon ki endepandan avek sa Gouvernman ki an plas e ki sirvey byennet ekonomik monneter nou pei.

E mon dir sa aköz Labank Santral li menm li, in sibir en levolisyon ki dimoun nou zenerasyon i rapel, *peu* apre lendepandans, mon konnen ki desizyon ti ganny pran aköz nou ti vin en pei endepandan, pou nou kre nou prop Lotorite Monneter.

E se koumsa ki Labank Santral in komanse avek *The Seychelles Monetary Authority*, ki ti fer rol Labank Santral pou en peryod letan, ziska ler i ti li menm li *evolve* pou vin en Labank Santral aparantye.

E fodre pa nou bliye ki levolisyon i toultan en bon keksoz. E mon ava fer en parantez la pou dir ki revolisyon i zeneralman pa en bon keksoz,

me sa nou ava diskite en lot zour. Me mon kontan, mon kontan ki dan domenn monneter in annan depi milye lannen '70 ziska ozordi, en devlopman ki al dan en menm sans e sa se ki nou bezwen annan en lenstitisyon ki non solman endepandan, me ki osi performan. Enn ki ou annan konfyans ladan.

E parey tou bann Manm ki'n koze apre midi in dir e mon ava partaz zot lopinyon e zot lenpresyon, sa Labank Santral ki nou annan isi, pandan sa bann dernyen lannen in enn ki'n enspir konfyans e ki ou konnen ki pei i dan bon lanmen.

Akoz bann dimoun ki pe vey nou sistenm monneter i konnen ki zot pe fer e zot konnen kan pou reazir.

E sa i vin- i retourn mwan lo mon pwenndepar i ler ou vwar en lamannman pe vini, ou konnen ki sa bann dimoun ki pa pe dormi aswar, ki pe mazin nou lekonomi, zot pe mazine ki mannyer pou ankadre li pli byen ankor e pou fer ki zot travay i ava vin pli alaoter, pli transparan e pli performan.

An 1993 si mon pa tronpe Labank Santral ti selebre son 15zyenm lanniverser, ou kekfwa pa ti son 15zyenm

lanniverser me i ti selebre en lanniverser e mon rekonesans se ki i ti 15zyenm lanniverser me panel i ava koriz mwan.

Me tou manner ti Gouverner Aumeeruddy ki ti Gouverner Labank Santral sa moman, e pou en rezon ki li i konnen, mwan ziska ozordi mon pa konnen in demann mwan vin enn sa bann *speakers* ki ti pou koze, pou selebrasyon sa lanniverser sa Labank Santral.

E depi sa zour mon'n pran Labank Santral konmsi mon annan en par ladan aköz mon pa ti konn naryen. E atraver sa levennman mon'n arive konn bokou lo travay Labank Santral.

Me sa ki ti pli gou, se ki dan premye ranze pou sa selebrasyon, i ti annan Prezidan Larepiblik Mr Rene ek son madanm Mrs Rene. E ler nou ti'n fini koze e ler nou ti'n fini koze nou ti pe diskite, tou lede in vin ver mwan e zot in dir mwan ki manner zot in apresye sa deliberasyon ki mon'n fer lo aköz en Labank Santral i devret endepandan.

Mon ponp mon lekor Mr Speaker aköz si mon pa fer li personn pa pou fer li pou mwan. Lopozisyon i grense mon pa konnen aköz, aköz mon pa

pe dir naryen ki mal, me *anyway* refleksyon *faites* mon mazine zot pe grense aköz sa ki'n arive Dimans in tap zot en pe for.

**(APPLAUSE)**

**MR SPEAKER**

Annou reste lo size Onorab Georges. Ale Onorab.

**HON BERNARD GEORGES**

E mon'n dir sa Mr Speaker, aköz se sa zour ki mon'n realize pou la premye fwa lenportans dan en pei annan en Labank Santral ki endepandan.

E nou koz lo en Labank Santral endepandan, nou pou koz lo en Labank Santral otononm, nou koz lo regilasyon pri, me annan de fwa nou pa- e nou dir ki sa se aköz premye bi Labank Santral se pou anpes lenflasyon dan pei, se bann parol ki nou repete.

Me si nou poz en pti kou e nou mazine kisisa- ki sa savedir tousala nou konpran ki ler ou annan en sistenm kontrol efikas pei i mars byen, e ler ou annan en sistenm kontrol ki pa efikas ler ou napa en sistenm kontrol, ou *end up* parey *Venezuela* e *Zimbabwe* kot a en serten lepok bann *banknote* ti'n

ariv- e mwan mon annan enn dan mon koleksyon \$100 bilyon e ou ti bezwen apepre en 15 zot pou aste en bar dipen a sa moman letan.

Donk, Larzantin parey nou konnen - i enportan Mr Speaker pou Lepep Seselwa konpran ki en Labank Santral endepandan, otononm e performan, i en lenstitisyon ki kardinal dan en pei. E ler ou vwar dimoun vin devan e dir nou annan en striktir ki bon, me nou anvi amelyor li akoz nou pe anmenn en lamannman dan nou Lalwa, nou konnen ki sa ki zot pe fer i bon.

E mwan mon pa kestyonnen Mr Speaker bann keksoz ki mon pa konpran, pei. Mon pa sey fer krwar ki mon konpran bann keksoz ki an deor mon konpetans pei. Mon prefere aksepte ki sa bann ki konpetan e sa bann ki annan lasarz lekonomi nou pei zot, zot konnen ki zot pe fer.

E mon ava dir la ozordi akoz tou lede i la devan nou, nou annan Mr Speaker, ozordi en rezim ekonomik dan nou pei dirize par Gouverner Abel kot Labank Santral e Minis Hassan kot Minister Finans, ki osi bon ki nou kapab gannyen a nenport ki moman nou lavi.

## **(APPLAUSE)**

### **HON BERNARD GEORGES**

E nou'n vwar sa. Sel keksoz ki nou bezwen fer sir regard sa dernyen lannen *COVID*, lager *Ukraine* ki mannyer sa 2 dimoun dan zot *sphere* separe in kapab *manage* lekonomi pour ki- nou'n annan enn de pti sok, me nou pa'n ganny okenn sok mazer pou dir ki nou lekonomi pe *slide*.

En lot keksoz ki mon krwar nou devret rekonnèt, se ki i pa ti toultan leka, pei. Menm apre 1993 sa lensidan ki mon fek koz lo la ki'n fer zot grense, menm apre sa, malgre ki ti annan en lespri lendepandans ki mon ti'n parmi lezot dimoun ti'n koz lo la - pa mwan ki'n envante mwan zis mon'n vin repet en pe parol.

Malgre sa, ti napa striktirelman en diferans ant Labank Santral avek Minister Finans E nou tou nou konn sa tre byen akoz Gouverner Labank Santral ti li menm li *PS* Finans, e Minister Finans ti asiz kot Labank Santral. Sa se depi ki nou'n retourn dan miltiparti. Mon pa pe koz ou parti inik mwan, mon pe koz ou depi ki nou'n retourn dan miltiparti.

Alors Mr Speaker, nou sa ki nou pe koz lo la, la ozordi i

frazil, i frazil. Nou kapab retourn an aryer vitman si nou pa regard byen sa ki nou pe fer. Mon pa anv i koz polemik. Mon pa anv i koz kont okenn dimoun ki'n koze ozordi. Sa se pa mon lentansyon nou tou nou dakor ki sa ki pe arive la ozordi i en bon keksoz.

Me nou bezwen parey Ankour ler ou sermante ou pa sermante zis pou *tell the truth*, me ou sermante *to tell the truth, the whole truth, ok?* Ou bezwen pas atraver tou bann keksoz, sa ki bon, sa ki mwen bon e fer sir ki sak fwa ki nou lev lanmen pou vot pou en Lalwa, nou konnen sa ki nou pe fer e nou konnen ki sa Lalwa i en bon keksoz.

Prezan Mr Speaker, mon a koz lo 2 pwen - mon konnen ki *panel* in ganny demande pou koz lo la, be mon vwar li koman mon devwar pou mwan osi adrese. Premyerman sa *clause* 10 sa Tribinal, ki enkyet bokou nou bann zanmi ki asiz lo lot kote latap, ou plizoumwen sa 3 ki'n koze. E zot pe demann en kestyon ki ou vwar ladan i annan en kritik.

Me aköz nou'n koz byen, aköz *panel* i en *panel* ki pa ki la ozordi pe koz lo en size enportan zot pa'n dir sa ki zot

pe vremen fer resorti, me les mwan dir Mr Speaker.

Kestyon i ganny demande aköz ki se Prezidan ki bezwen apwent en Tribinal ler i annan en Manm *Board* Labank Santral, Gouverner, *Deputy Governor* oubyen en lot Manm *Board*, Direkter, nenport ki, ki i santi pa pe desarz pa pe *meet* son *requirements* son pos? Aköz ki i annan en Tribinal e aköz se Prezidan ki apwent sa Tribinal?

E mon pa konnen si ou'n remarke Mr Speaker, lalimyer in sorti lo ou la, aköz ou nepli *Party Leader* in al lo Prezidan la, in ganny dir dan sa Lasanble la apre midi. Prezidan i *ava-Leader* en parti politik Alor aköz se li ki pe apwent Tribinal? E nou bezwen fer sa sorti in ganny dir e i mon devwar pou reponn.

In osi ganny dir, in osi ganny dir be sa nou konnen, nou konnen sa bann parol ki nou pa pe koz pou sa Prezidan aktyel, nou pe koz pou nenport ki Prezidan, sa se en fason dir Mr Speaker. Kestyon i ganny demande aköz ki se Prezidan ki fer li? Me mwan ava reponn sa dan 2 fason.

Premyerman, sa Tribinal in ganny konpoze dan lafason ki in ganny konpoze e in ganny enspire - mon pa ti dan *Bills*

*Committee* mon pa konn sa in ganny enspire par Tribinal ki CAA i apwente ler i annan en Ziz ki zot trouve i annan en defayans.

CAA pou bann Ziz e menm parol i ganny resorti ki ler CAA i vwar ki i annan en rezon pou regard dan konpetans en Ziz, i pou apwent en Tribinal ki pou fer sa.

Menm zafer isi, ler Prezidan i vwar ki i annan en nesesite i pou apwent en Tribinal. Sa set en Tribinal ki pou *ad hoc*, i pa pou en Tribinal ki permanan li. I ganny apwente zis ler i annan bezwen. CAA i bezwen apwent sa pou bann Ziz akoz se CAA ki *interview* e ki fer rekomandasyon bann Ziz.

Me se pa CAA ki apwent *Board* Labank Santral, se Prezidan ki apwent *Board* Labank Santral, alor i bezwen Prezidan ki bezwen si li i apwente, si li ki bezwen apwent en Tribinal pou gete ler enn sa bann dimoun ki li in apwente pa pe perform. I osi senp ki sa Mr Speaker. Nou pa bezwen al rode akoz ki Prezidan i bezwen fer sa.

Be *in any event* se SPPF ki ti fer sa Konstitisyon ki ti anvi en Prezidan ki annan tou pouvwar Sesel, pa nou. Nou,

nou ti anvi en sistenm Parlmanter.

Mr Speaker, ou apel ou ki ti ou ti la dan sa lalit. Nou, nou ti anvi en sistenm Parlmanter presizeman pour ki sa bann keksoz pa arive. Me zot, zot ti anvi akoz i ti bon pou zot sa lepok. Zot ti anvi en Prezidan avek tou sa bann pouvwar, se sa rezon akoz ki Prezidan ozordi se li ki pou apwent sa Tribinal. Ou vwar?

Dezyenm keksoz mon'n anvi koz lo la e sa mon pou fer li dan en fason tre bref, akoz mon konnen ki panel pou reponn. Se sa keston - e mon ava dir en keksoz Mr Speaker, mon partaz lopinyon Onorab Cosgrow lo sa zafer KYC. Onorab i annan parfetman rezon.

KYC ler ou pou al kot en labank pou ou fer en tranzaksyon oubyen pou ou ouver en kont, i tro konplike La mwan mon ava dir avek Onorab, Onorab lo sa enn, mon pou vot avek ou.

Me sa ki kot mon partaz son lopinyon, se i plito ki mon pa partaz son lopinyon, wi, mon partaz son lopinyon, me mon bezwen dir ki lo sa bann zafer *guarantor* kot labank i tay deryer sa *guarantor* avan ki i tay deryer sa *principal debtor*, sa

nou'n fini rezourd. I dan Lalwa, mon pa pou reponn *panel*, *panel* i ava dir nou.

Me nou menm nou, nou'n pas en Lalwa poudir ki dan ler i annan en *guarantor*, sa labank i bezwen al sey rod son larzan avek sa *principal debtor* avan apre ki i vin tay deryer *guarantor*. Alor sa nou'n rezourd.

Si i pa pe ganny fer ankor en fwa mon partaz lopinyon Onorab, i bezwen ganny fer Labank pa kapab pares e tay deryer *guarantor* ki annan *the means*.

E se pour sa rezon ki labank in aksepte li koman en *guarantor* aköz i annan mwayen e pa tay deryer *the principal debtor*. Sa i al kont prensip Lalwa. Ou bezwen al fer sa enn ki dwa avan tou peye avan ki ou tay deryer sa lot.

Alor Mr Speaker, avek sa detrwa parol, mon ti a kontan rasir Minis aköz se li ki ansarz sa *Bill* me osi Gouverner atraver Minis e atraver ou Mr Speaker, ki zot *Bill* apre midi pou ganny sipor.

Mon espekte malgre sa detrwa pti parol kontrer ki i ava ganny sipor Lopozisyon osi, dan en fason ki koman en Lasanble an antye nou ava kapab dir avek en lenstitisyon

ki'n la avan nou e ki pou al apre nou pandan bokou lannen ki nou mars deryer li e nou sipor sa ki i pe fer. Mon remersye ou Mr Speaker.

**(APPLAUSE)**

**MR SPEAKER**

Mersi Onorab. Laparol pou Onorab Wavel Woodcock.

**HON WAVEL WOODCOCK**

Mersi Mr Speaker. Mr Speaker, i fasil pou bliye ki selman 3 an pase nou pei ti pe far fas avek en kriz lasante e osi en kriz ekonomik, kot nou pei ti'n pri lo en brizan.

E si i pa ti bann bon desizyon ladministrasyon ki la ozordi e lasistans ki Labank Santral ti donn Gouvernman, bann *emergency liquidity assistance* ki'n donn Gouvernman, labank e osi menm bann biznes - sirtou bann gro biznes dan komers, transportasyon e *tourism* ki ou kapab dir pli gro kontribiter dan lekonomi nou pei Mr Speaker, nou pa ti pou kot nou ete ozordi.

Mr Speaker, mon bezwen dir e i annan en manm boner in koz lo la ki *Central Bank* i en *lender of last resort*. Dan letan bann *financial distress*, Labank

Santral i kapab *provide* parey mon'n dir *emergency liquidity*, lasistans finansyel avek bann lenstitisyon finansyel, labank ki pe fer fas avek bann *short term funding shortages*.

E sa fonksyon Mr Speaker, i ede pou anpes bann sa ki nou apel *bank runs* kot bann kliyan i taye pou retir zot larzan labank, i kapab *lead to depression* e bann lezot sityasyon ekonomik pli alarman.

E sa bann tel lasistans i ede stabiliz sistenm finansyel parey mon'n dir pandan bann letan kriz, pandan bann letan parey bann manm in servi sa term boner *force majeure*, parey zisteman nou pei ti fer fas avek pandemik *COVID-19*.

E *Central Bank* li i annan sa rol prensipal pou gard stabilite finansyel, pou apes *shortage* ouswa lenflasyon dan nou pei, pou anpes nou Roupri devalye tro bokou. E Mr Speaker ki nou konnen ler i annan lenflasyon ler nou Roupri i devalye i fer ki kou komodite i monte i vin bokou pli o.

E Labank Santral i osi kapab donn lasistans donn davans Gouvernman. E la Mr Speaker mon pou bezwen de lapar nou Lasanble Nasyonal sirtou bann Manm lo nou kote

latab felisit Gouverner Labank Santral Mrs Caroline Abel e tou bann travayer kot *Central Bank*. *In fact* lannen pase i ti ganny *awarded* avek en *Medal of Honor* pou sa bon travay ki li e son lekip ti fer pou ede stabiliz nou lekonomi..

**(APPLAUSE)**

### **HON WAVEL WOODCOCK**

E garanti Mr Speaker, garanti kontinite sa bon zesyon sistenm finansyel nou pei.

San bliy osi Mr Speaker, parey Onorab Georges in dir, nou sanse Mr Speaker, ki non selman nou annan nou en bon Gouverner Labank Santral, me nou osi annan nou en zenn Minis ki'n osi en dimoun ki'n travay a en pozisyon tre eleve dan Labank Santral, avan ler ki in vin Minis Finan;, ki in osi ganny rekonnet koman enn bann pli meyer Minis Finans lo Kontinan Lafrik Mr Speaker.

**(APPLAUSE)**

### **HON WAVEL WOODCOCK**

Lasistans ki Labank Santral i donn Gouvernman - davans ki i donn Gouvernman *obviously* sa *request* i bezwen sorti kot Gouvernman.



E i annan en konversasyon ant Gouvernman avek Labank Santral bokou. Zis pou donn en legzanp Mr Speaker, an 2021 pou *budget expenditure 2021 Central Bank* ti *approve* en *advance* R500 milyon, R23.6 milyon Mr Speaker pou asiste Gouvernman avek son bann *budget expenditure 2021*.

E parol Mrs Caroline Abel, sa letan i ti dir se ki i rekonnet *challenge* ki Gouvernman pe fer fas avek an term reveni.

Akoz mon rapel Mr Speaker poudir avyon ti'n aret vin Sesel, nou ti dan en kriz ekonomik e nou depan preske angran mazorite lo sa lendistri, bann biznes pa ti pe fonksyonnen tou biznes ti *at a stall* Mr Speaker, komers, *aviation*, *tourism*, transportasyon Mr Speaker.

E Gouvernman ti bezwen lasistans avek *Central Bank* e ler Gouvernman ti tap laport *Central Bank*, *Central Bank* ti ed nou Gouvernman.

E bokou desizyon fiskal in ganny pran non selman par Labank Santral, me par nou Gouvernman pou ede ki nou pei Mr Speaker i re debout lo son lipye. Parey mon'n dir nou konnen ki arive ler i annan lenflasyon dan nou pei, nou

konnen poudir kou komodite i monte, nou konnen poudir tou keksoz i vin pli ser lo marse lokal.

E nou pei in fer fas avek plizyer defi Mr Speaker, lager *Ukraine*, problem ki'n arive ki'n anpes nou kapab kontinyen nou vol ant *Hamas* avek *Israel*, ki'n anpes nou kapab kontinyen fer nou vol *Israel* ki ti'n en marse i ti rantab pou nou Mr Speaker.

Plizyer lezot defi, karbiran *at one point* ti'n monte ti'n ariv vremen o Mr Speaker, tousala i annan en lenpak lo lekonomi nou pei.

Me sa Mr Speaker, i pa anpes nou pei pou re debout lo son lipye, i pa'n anpes nou Gouvernman e Labank Santral pou zwe zot rol pou stabiliz lekonomi Sesel ozordi ki ozordi bokou bann biznes in refer Mr Speaker.

Fodre pa bliye Mr Speaker, poudir an Zanvye 2021 Dolar, \$1 ti R21.62 sou, *Euro* ti R26.40 sou mon demann Lopoziyon pou al gete konbyen Dolar i ete ozordi e konbyen *Euro* i ete ozordi.

Si pa bon desizyon nou Gouvernman Mr Speaker, nou pa ti pou koup sa lenflasyon ki nou ti ladan sa letan aköz nou ti'n- parey mon dir Mr Speaker,

nou ti lo brizan. Nou pei ti lo son zenou.

Gras a bann bon desizyon nou Gouvernman Mr Speaker, nou ti re ouver *Airport*. Zot ti dir,

“non, pa ouver - tro boner, “vaksen pa bon - zot pa pran vaksen.”

Selman zot ti pas par ledò par laport deryer, selman zot ti pas par ledò par laport deryer parey ler zot ti pran “larzan *forgo*” Mr Speaker pou pran zot pikir Mr Speaker.

### **MR SPEAKER**

Onorab, mon...

### **HON WAVEL WOODCOCK**

Mon a retourn lo *Bill* Mr Speaker.

### **MR SPEAKER**

Fotespere ki ou a reste lo size *Bill* silvouple.

### **HON WAVEL WOODCOCK**

Mr Speaker, ti annan en *credit line* ki ti ganny *laid out* par Labank Santral ki ti ganny *laid out* par bann labank Mr Speaker, *from Central Bank* Mr Speaker, kot en kantite bann biznes sirtou bann biznes enportan dan nou pei; parey mon'n dir komers, *tourism*,

bann sirtou bann gro lakonpanyen Mr Speaker ban gro biznes.

E an 2020 si mon pa tronpe ti annan anviron 79 milyon, R79.3 milyon ki ti ganny laprouvasyon pandan letan *COVID* pou asiste bann gro biznes. Parey mon'n dir dan Sekter *Tourism*, dan komers, dan transportasyon Mr Speaker.

Nou rapel *le fame FA4JR* Mr Speaker, ki pa ti soutenab. Ti komans avek bon lentansyon Mr Speaker, me apre ki nou ti war, ti vin en nespes lemorazi, kot ti annan en bann *payroll* ki ti ganny envante; ti annan bann biznes ki ti pe ganny asiste plis ki 1 fwa, kot en endividi pe ganny peye 2, 3 fwa Mr Speaker, ki ti pe *deplete* non selman kof Leta, me osi nou rezerv Mr Speaker.

E *survival* sa bann biznes i enportan pou stabilite finansyel nou pei Mr Speaker, akòz se zot ki anploy lo mazorite travayer dan Gouvernman, pou garanti ki zot ganny en saler e se zot Mr Speaker, *private sector* i vremen enportan e se *private sector* Mr Speaker ki pey *tax* pou ganny sa reveni pou fer marse nou pei Mr Speaker.

Mr Speaker, si ozordi ou war nou pei nou kapab asize

ozordi e vwar sa stabilite ekonomik dan nou pei, kot nou war tou bann lendistri pe fer bokou pli byen ki avan; kot nou war tou sa bann devlopman pe arive dan nou pei Mr Speaker, se gras a sa bon travay e zesyon nou larzan pa non selman *Central Bank*, me par sa Ladministrasyon *LDS* ki la ozordi Mr Speaker.

I annan en kantite keksoz ki mon'n tande Mr Speaker, me sa ki mon sagren Mr Speaker, lo bokou bann *Bill* ki vin devan sa Lasanble, i annan bann politik bon marse ki ganny fer Mr Speaker.

Mon'n tann en Manm pli boner dir mon pa pou mansyonn son non - mon pa oule problem, kot in dir poudir in koz lo *standing instruction fee* Mr Speaker, kot in dir poudir *standing instruction fee* i R50. Mr Speaker, mwan *as far as I know most labank standing instruction fee* i R5 Mr Speaker.

Sertenman mon labank. *Yeah*, mon annan laprev la avek mwan Mr Speaker, mon labank e lezot labank ki mon okouran, *Standing instruction failure fee* Mr Speaker *most labank* i R50 mon tann en Manm dir poudir i R350 ou bezwen peye pou *standing instruction fee* Mr Speaker.

Be si en labank pe sarz ou sa lakantite sanz labank, ou napa en bon labank Mr Speaker. *Sorry* Mr Speaker *standing instruction fee* i R5 me pa R50 Mr Speaker, parey sa Manm ti dir R50, me non i R5 pou *most banks e standing instruction failure fee* Mr Speaker, i R50 pou *most labank*, me pa R350 parey in ganny dir.

Konmsi Mr Speaker, zis i montre ou poudir ennler dan sa Lasanble, i toultan annan bann fo profet ki pe *preach doom and gloom*, kot nou pa rekonnèt travay ki Labank Santral, ki Gouvernman in fer Mr Speaker, pou garanti stabilite lekonomi nou pei.

Travay ki nou Gouvernman in fer pou garanti e donn sipor nou sistenm finansyel dan nou pei Mr Speaker; travay ki'n ganny fer pou *restore economic stability* dan nou pei Mr Speaker.

I sagrinan Mr Speaker, ki Lopozisyon tou kou lo bann *Bill* zot *fail* pou *acknowledge* pou dir i annan bann bon travay ki'n ganny fer par bann profesyonnel konpetan - non selman *Central Bank* Mr Speaker, me osi dan nou Gouvernman, dan nou ladministrasyon.

E nou annan bokou bann profesyonnel kosto, konpetan e kapab ki pe delivre ozordi. E i enportan Mr Speaker, ler sa bann *Bill* i vini pou nou rekonnèt zefor e travay ki sa bann dimoun in fer, in mete pou ozordi fer ki dan lespas 3 an nou pei in nobou re stabilize, re debout lo son pei Mr Speaker.

Sa *Bill* ki devan nou Mr Speaker, pe senpleman parey bann Manm in dir pe anmenn plis latransparans dan sa *Central Bank of Seychelles Act* ki pou kontinyen donn li sa pouwar pou li *maintain price stability* dan nou pei, ki pe *reinforce* lotonomi, lotonomi nou *Central Bank* Mr Speaker, pou parey mon'n dir pou garanti ki zot kapab deservi zot fonksyon *to the fullest*, san bann lenterferans ki pou anpes zot Mr Speaker, fer zot travay parey zot sipoze kapab fer.

Ankor enn fwa Mr Speaker, mon pou dir mon pou remersye tou bann travayer Labank Santral; mon pou remersye tou bann travayer kot Minister Finans pou sa bon travay ki zot in fer Mr Speaker, pou garanti ki ozordi nou pei in redebout lo son lipye e ki nou lekonomi pe fer vremen byen ki lannen prosenn nou kapab

donn ankor plis lasistans nou bann vye dimoun Mr Speaker, nou bann *home carers* Mr Speaker, e osi Lepep Seselwa.

Akoz an mezir ki nou lekonomi in transformen i aranze nou fer pli byen, nou pas sa bon benefis avek nou pep nou bann frer ek ser Seselwa ki la deor. Avek sa 2 mo, mon dir ou mersi Mr Speaker.

**(APPLAUSE)**

**MR SPEAKER**

Mersi Onorab. Bon, nou a terminen lo deba e mon apel Minis pou fer son repons e konklizyon.

**MINISTER NAADIR HASSAN**

Mersi Mr Speaker. Mersi tou bann manm pou zot komanter, zot entervansyon lo sa *Bill*. Mr Speaker, mon a pran bann *issue* spesifik ki'n leve e dan mon dezyenn parti mon repons mon ava adres sa *issue* ki'n leve *regarding* lendepandans Labank Santral.

Mr Speaker, enn bann pwen ki Onorab Hoareau ti'n leve ki i ti oule klarifikasyon, se i annan en *clause* ki'n antre dan lamannman e sa *clause* i dir *“where a provision of an enactment hampers the banks’ ability to achieve its objectives to*

*carry out its related functions this Act shall prevail*”.

So ki sa *clause* pe dir li se ki, si i annan en lot Lalwa ki ganny met an plas e i annan serten *requirement* dan sa Lalwa ki anpes Labank Santral dan son abilite pou li *achieve* son bann lobzektif, se sa *clause* dan *Central Bank Act* ki *supersede* tou lezot.

Akoz sa i la i senpleman pe montre lenportans lobzektif Labank Santral e si ou pas dan Lalwa son 2 lobzektif prensipal se *price stability*; savedir stabilite dan pri me osi stabilite finansye. E sa i montre ou lenportans sa 2 keksoz dan en pei ki napa lezot *clause* dan en lot Lalwa ki kapab *impede* Labank Santral pou *achieve* sa lobzektif, *ok?*

So sa i rezon akoz i enportan ki napa okenn *ambiguity* dan nou sistenm lezislatif, ki demen i kapab al an *context between* diferan Lalwa.

Lot kestyon ki'n eleve, se sa *issue due diligence* e mon toutafe dakor avek tou bann Manm ki'n lev sa *issue*. E i en konversasyon ki mon'n komanse avek Gouverner en pe letan pase e mon konnen Gouverner pe *take sa up*.

Mwan mon pou dir ozordi nou'n sorti lo en ekstrenm

nou'n bouz lo en lot ekstrenm, kot kekfwa dan lepase ti annan en mankman dan *KYC ek CDD* i ganny *conducted* me ozordi ou'n al *pro*, eski nou bezwen reviz Lalwa pou reflekte en sistenm en pe pli fleksib. Sa i en keksoz ki bann regilater pou bezwen regard ladan.

Me mon osi krwar poudir lenterpretasyon e lenplimantasyon ki bann labank i mete, sa i en problem, *because* i annan bokou de fwa ler, *well* pa ki zis mon ganny en konplent - mwan menm mon sirkonstans ki mon war mon pe fer *KYC e customer due diligence*, i zis nepli fer sans, nepli fer sans e i vin en fristrasyon pou tou dimoun.

E mwan toultan mon'n dir, si ou met en *requirement* i bezwen prodwi en valer si ou pa kapab vwar sa valer. Ki i kree savedir sa *requirement* pa devret la.

E definitivman mon'n ganny komitman Gouverner ki asiz lo *National AML Committee* e mwan osi mon'n koz ek SS Payet tou, pou zot reviz *review* Lalwa *AML* pou get sa byen. Me osi en konversasyon ek bann labank pou zot gete osi ki mannyer zot kapab enplimant bann *requirement KYC ek CDD*, dan en fason ki i annan plis

*common sense* ladan si mon kapab met li koumsa.

Lo sa *issue cooling-off* e i an en komanter ki'n pase *regarding the constitutionality of the cooling-off period*. Mwan mon pa war li neserman koman en problem. E mon krwar nou'n eksplike akoz i annan en *cooling-off* se akoz lenformasyon ki ou gannyen as en manm *Board* Labank Santral si ou pe al kot en labank demen, i donn ou en lavantaz lo lezot lenstitisyon akoz ou war lenformasyon tou lenstitisyon.

So i neser pou annan en *cooling-off period*. I en provizyon ki dan bokou pei i annan. Me ki enportan pou note se ki dan sa 6 mwan ki ou pa ganny drwa pran en lot rol lo en antite ki ou ti deza en regilater lo la ou'n deza *regulate* me ou ganny *compensated* pou sa.

So ou pa *worse off*. I annan en konpansasyon pou ou ler in vin sa akoz i pe met en restriksyon lo ou lanplwa so ou bezwen ganny *compensated* pou sa restriksyon. So sa i rezon akoz mon pa krwar i annan en *issue constitutionality*.

*Issue of guarantor* wi, depi ler mon ti ankor Labank Santral sa ti en gro problem e kot nou

ti travay lo provizyon poudir ki ou bezwen *exhaust all recovery efforts on the primary borrower before you go* kot sa garanter, akoz sa garanter i en *backup* li.

E mon toutafe dakor, labank in pares pou fer son louvraz prensipal pou *go after the primary borrower* e dan nouvo *Financial Consumer Protection Act* ki an plas, sa in ganny kouver e Lasanble in aprouve. E mon ava demann Labank Santral pou asire ki labank pe swiv sa bann direktiv.

E si i annan okenn manm piblik ki'n war zot dan en sityasyon ki labank pa pe swiv sa, zot kapab antre an kontak avek Labank Santral pou met zot *case* devan e Labank Santral i ava pran sa *case* pou bouz devan.

Lo *issue of* sa rapor lo *stress testing* ki ganny fer e akoz ki serten son bann eleman *administrative* operasyonnel pa'n ganny *taken into account*. Mwan mon pa pou dir ki i pa'n ganny *taken in to account*.

Akoz sa *review* ki ti ganny fer lo Lalwa Labank Santral *financial sustainability of* Labank Santral - i annan 2 konponan - i annan son konponan legal e i annan son konponan administratif

operasyonnel. E ozordi ki nou pe dil avek se son konponan legal.

Me mon konnen i en *issue* ki Labank Santral ek son *Board* pe diskite pou asire parey sa laspe *managing the cost, the operating cost of the bank*, sa i vin en lobzektif *of the Board* pou asir ki i ganny mannye *properly*. Me sa pa kapab al dan en Lalwa, sa i en keksoz administrativ operasyonnel.

Lo *issue authorized capital*, en kestyon *Leader Lopoziyon* mon mazinen ou ki ti demande, akoz i bezwen *approval* Minis Finans?

E larepons i senp, larepons i senp akoz *authorized capital* se larzan ki Gouvernman pe *inject* dan Labank Santral. E *as* Minis Finans sa i pe servi *tax payers fund* e anba Lalwa anba nou Konstitisyon i kler lekel ki annan lotorizasyon pou servi *tax payers fund* pou nenport ki *purpose*.

So sa i rezon akoz ki i annan en *approval from* Minis Finans dan sa prosedir.

Lo kestyon *distribution of profits*, ankor la in donn Labank Santral plis fleksibilite. Avan sa ti pli rizid lo ki *amount* ki Labank Santral i bezwen distribye pou en Gouvernman

*once* ki i finaliz son kont e ki kantite i servi pou li *build up* son *capital*.

Me la akoz sirtou nou konnen poudir ki i annan en *requirement* pou Labank Santral *build up* son kapital *over* en pe lannen, i fer pli fasil ki si i pe fer profi i servi sa larzan. So sa kantite ki sorti kot Gouvernman, kot *tax payers* i redwir Sa *burden* lo *tax payer* i redwir akoz Labank Santral i kapab *build up* son prop kapital. Ok?

Lo kote, en lot pwen spesifik ki'n leve se sa *clause* ki dir nou pa kapab redwir saler bann dimoun kle dan Labank Santral.

I en *clause* ki mon konnen i osi i egziste pou bann Ziz. E rezon ki i la se pour ankor asir lendepondans sa fonksyon; ki demen Gouvernman pa kapab fer gro lebra *or twist the arm by* sey servi saler koman en *blackmail* pou enfliyans desizyon en Ziz, en Gouverner akoz son rol endepandan.

Me selman toultan mon'n dir mwan, se sa bann dimoun ki annan sa fonksyon i devret annan en *moral duty* pou dir be si in ariv en sirkonstans dan pei, kot mazorite dimoun pe pran en *salary deduction* so nou osi tou nou bezwen solider e

pran. Me sa i sorti lo nou moralite sa dimoun *ok*.

Me mon'n anvi eksplike akoz i annan e sa proteksyon lo saler sa bann dimoun, akoz si napa i kapab ganny servi dan serten fason ki pou enflyans desizyon.

Mr Speaker, prezan mon ti anvi pran sa *issue* lendepondans. E mwan mon'n sirprann ozordi ler mon'n vin ek en Lalwa ki pe fer Labank Santral vin pli endepandan e ler Gouverner i apros mwan i ti apros mwan i dir i annan en *review* ki nou'n fer pou nou ansanm ek *IMF* pou nou *strengthen* lendepondans Labank Santral e nou bezwen ou sipor e *of course* mon'n donn mon sipor.

Me ozordi ler mon'n vin dan Lasanble, konversasyon i se ki nou pe redwir *narrative* sorti kot *partly* lo sa kote latab se nou pe redwir lendepondans Labank Santral. So sa pou mwan i sirprenan, akoz mwan mon'n vini an krwayan poudir ler mon pe get tou bann *clause* e mon ava eksplike apre, nou pe *strengthen* lendepondans Labank Santral.

Annou get sa *clause* ki nou'n koz bokou lo la sa Tribinal, ozordi anba Lalwa ki egziste ozordi, Prezidan i kapab

tir Gouverner Labank Santral baze lo bann kriter ki'n mete dan Lalwa.

*Clause 7 ok*, Prezidan i annan sa pouvwar pou li fer sa lo li menm. Me sa *proposal* ki i pe fer, i pe anmenn li pli devan. Prezidan pa kapab tire. Prezidan i apwent en Tribinal, en Tribinal ki bezwen *investigate ok*, sa Tribinal i bezwen *investigate*. Li son rol *ok*, i *investigate* e i fer son rekomandasyon e desizyon. E menm sa desizyon anba Tribinal sa Gouverner i kapab al devan Lakour pou *challenge*. *Ok?*

So nou pe anmenn plis lespas ant Prezidan ek sa *process*. I pa fer sa desizyon lo li menm, i annan en Tribinal ki fer sa *investigation*.

E osi nou bezwen fer li kler ki ou pa kapab vini zis tir en *Board Member* ouswa en Gouverner, akoz i annan bann kriter spesifik dan Lalwa ki ou'n bezwen *breach as* en Gouverner oubyen *a Board Member* oubyen *as* en *Deputy*, ki fer ou vin en *cause* pou *initiate* sa *process, ok?*

So, e la mon anvi dir en keksoz, mon'n anmenn plizyer Lalwa dan Lasanble dan sa dernyen detrwa lannen e mon'n obzerv en *patern, ok?* Ozordi



parti Lopozişyon, Minis pa devret annan okenn pouvwar; Prezidan pa devret annan okenn pouvwar, kan tou sa letan ti *ok* pou Minis annan pouvwar, Prezidan annan pouvwar.

E i annan en keştyon ki *Leader* Biznes Gouvernman in demande, se aköz la i sanze? Mon annan en larepons pou ou keştyon Onorab Georges, aköz larepons se aköz Lopozişyon i konnen poudir son parti pa ni pou Prezidan, pa ni pou o pouvwar pou ankor plizyer lannen.

**(APPLAUSE)**

**MINISTER NAADIR HASSAN**

E sa rezon aköz zot oule tir tou pouvwar ek Minis ek Prezidan. So...

*(Interruptions)*

**MR SPEAKER**

*Order*, silvouple! *Order!* Minis prosede silvouple.

**MINISTER NAADIR HASSAN**

Mersi Mr Speaker. Mon *apologies* mon'n ofans zot, mon konnen zot ankor sansib apre wikenn. Mersi.

**(APPLAUSE)**

**MINISTER NAADIR HASSAN**

Mr Speaker, avek sa mon krwar mon'n reponn tou keştyon e mon a dir zot tou mersi.

**MR SPEAKER**

Mersi Minis pou ou repons. Bon nou'n ariv le moman pou Manm vot lo *Bill* pou *general merit Second Reading*, Manm ki an faver lev lanmen silvouple? Mersi. Manm ki kont?

Lo *general merit Central Bank of Seychelles (Amendment) Bill 2024*, 19 Manm in vot pour, 0 kont e 10 in *abstain*. Donk, *Bill* in aprouve par Lasanble e Madam Clerk a fer *Second Reading*.

**MADAM CLERK**

Mersi Mr Speaker. *A Bill for an Act to amend the Central Bank of Seychelles Act*. Mersi Mr Speaker.

**MR SPEAKER**

Mersi. Nou'n ariv pros 5 er me selman mon krwar nou pou pran en pti lavans lo travay demen, an ka ki nou *run short* ek letan. Donk, nou a pas dan Staz Komite e nou a komans lo amannman.

Onorab Hoareau, ki pou diriz amannman.

**HON JOHN HOAREAU**

Mersi Mr Speaker. Nou pou komans nou lamannman lo paz 5 anba *clause 2 amendment of section 2* lo definisyon *non-executive director* i pou aprezan lir koumsa;

*“non-executive director” means a member of the Board other than the Governor or Deputy Governor”.*

Nou pou al lo paz 6 subsection (c), *“a state of emergency declared”* nou'n retir sa mo *‘under’* nou'n met *“pursuant to the Constitution; or”* apre i kontinyen.

Nou ava al lo paz 9 tit *pou clause 4B.(1)* i lir koumsa; *“laws relating to the Bank’s objectives”* i tir sa bout *“draft”* devan sa fraz. Nou al lo...

**MR SPEAKER**

En moman. Mon'n war en lanmen anler, Onorab Georges?

**HON BERNARD GEORGES**

Mersi Mr Chair. Mr Chair, mon napa en lamannman pou mwan propoze, me mon ti anvi zis, e mon dakor avek sa propozisyon pou tir *“draft”* la, me mon ti anvi zis pou bann Manm Lasanble aköz mon osi mon pa ti konnen *at the time*.

Me anba *Order 66(2)* i enteresan nou *Standing Orders*

i enteresan aköz i dir *“a Bill shall be presented to the Assembly by a draft thereof being sent to the Clerk”* eksetera, eksetera.

Donk nou konpran kekfwa aköz *drafter* in servi sa mo *“draft”* la i en keksoz ki parey mon'n dir mon pa ti konnen e mon pe zis dir sa pour ki nou koman en Lasanble nou sezi sa pwen. Me *unfortunately* i al en pti pe pli lwen i dir sa *“draft will be in the form of a Bill.”* Alor in ganny fer dan bon fason. Mersi.

**MR SPEAKER**

Mersi. Onorab Hoareau.

**HON JOHN HOAREAU**

Ok, savedir nou pou kit sa *“draft laws relating to the Bank’s objectives”* koman sa tit. Eskiz mwan Mr Speaker, mon pa'n konpran byen largiman se ki nou tire? Aköz...

Nou pou al lo *4B.(1)* *“Any”* apre sa i vin *“draft”* nou pe tir sa mo *“draft”* so *“any law concerning matters relating to the objectives of the Bank shall”* apre nou retir sa (a) ki'n ganny *lettered* obor e i kontinyen, so sa bout *“be subject to”* i kontinyen *after “shall”*.

So *“be subject to”* nou retir *‘of consultation with the Bank*

*before it is laid before the National Assembly*". Prezan...

**MR SPEAKER**

Bon, poz en pti moman, en moman. Wi, Onorab Pillay? Onorab Pillay ou ti annan en pwen?

**MR SPEAKER**

Mersi Onorab. Onorab Pillay, ou annan laparol.

**HON SEBASTIEN PILLAY**

Wi, Mr Chairman. Mersi. Mr Chairman, mon le met a latansyon Minis, Lalwa *Central Bank* i kler. Lobzektif labank se labank ki determinen.

Alors pour ki rezon ki i annan en Lalwa pour ganny fer par en lot antite ki bezwen *subject to consultation with the bank*, kan i annan pour fer avek lobzektif labank?

*The law says* ki nou amande poudir en – konmsi i pe prekonize ki i kapab annan en Lalwa ki ganny fer par en lot dimoun, ki pa labank, ki pour *subject sa Lalwa to consultation with the bank*.

So mon ti a kontan konpran, *why* nou pe met li dan sa fason? *Since* Lalwa i sipoze ranforsi lendepandans labank?

**MR SPEAKER**

Mersi. Minis?

**HON SEBASTIEN PILLAY**

*This is about the objectives of the bank. Not anything else.*

**MR SPEAKER**

Wi nou'n konpran. Nou'n konpran. Minis, ou kapab adrese.

**GOVERNOR OF CENTRAL BANK CAROLINE ABEL**

Mersi Mr Chair. Onorab, sa *clause* in ganny mete la, pour si arive kot en antite i kapab vin avek en Lalwa, ki kapab annan konsekans pour Labank Santral.

Akoz aktyelman ozordi i annan en kantite antite ler zot pe diskit en keksoz, zot angaze ek nou pour fer sir poudir i pa afekte Labank Santral, ler i pe fer son travay.

So pour fer li vin pli kler - akoz en lot antite petet pa konnen poudir i bezwen angaz avek Labank Santral. Nou'n met li dan Lalwa pour li vin pli piblik.

**MR SPEAKER**

Permet mwan zis fer enn pti remark Onorab Pillay. Wi, ou'n dir ki, *the objective of the bank is a business of the bank to decide*. Me selman sa *clause* la i

dir, *“matters relating to the objectives”*.

So ou kapab mazine ki en lot antite i kapab annan size ki konsern li. Me i kapab tous *the objectives*. So sa i mon – mon komanter ki petet i pa osi grav ki ou pe dir.

Nou a terminen Onorab Pillay?

### **HON SEBASTIEN PILLAY**

Mersi Mr Chairman. Mr Chairman, mon ti a konpran si nou ti pe dir, *any matters that may affect the objectives of the bank*. I pa relate – *when you talk about matters that relate. The only group of people that can do anything relating to the objective of the bank, is the bank itself*.

So i pour annan lezot Lalwa ki kapab afekte lobzektif labank, ki kapab pas o bor lobzektif labank. E alor zot bezwen fer li kler. *That is why* ki sa term *“draft law”*, *was used initially* dan sa lamannman.

Pour fer sa referans vin pli kler. Ou konpran? Me in *this case* ler nou tir sa, *‘draft law’*, i pe donn li si oule enn pti pe – en lot konotasyon ki dan mon lopinyon - *I may be wrong*.

Mon santi poudir sa i kree en kondisyon prezan pour ou kapab dir poudir be - eski i

annan posibilite ki i annan en lot antite i kapab fer en Lalwa ki konsern Labank Santral?

I dan lespri lendepandans Labank Santral parey nou'n diskite lo komansman. *That is why the term, “draft” was being used* Mr Speaker.

Mon pe kestyon propozisyon pour retir sa mo *“draft”*, a sa moman la. Sa i mon pwen. Mersi.

### **MR SPEAKER**

*Well*, sa amannman i la. Sel keksoz, ki ou kapab fer se kestyonn sa amannman. Onorab Georges?

### **HON BERNARD GEORGES**

Yes. Mersi Mr Chair. Mr Chair, mon krwar ki ler nou regard *4B(1)* avek (2) ansanm nou konpran. *4B(1)* i dir ki okenn Lalwa ki riske enterfer avek lobzektif labank, i bezwen ganny fer an konsiltasyon avek labank.

*Well, whatever*. Mon pe servi mon Kreol pour mwan eksplik en mo Angle. *“Concerning matters relating to the objectives”*. *Ok*. So, okenn keksoz ki pour tous en lobzektif labank. E okenn Lalwa ki pour tous en lobzektif labank, i bezwen ganny fer an konsiltasyon avek labank.

Me si kantmenm sa, i ganny fer e i al kont enn bann lobzektif labank anba 4B sa Lalwa pour vin *subservient to the Central Bank Act*. Ou vwar alor *still* i pa pour annan okenn ledan pour morde. Mersi.

**MR SPEAKER**

Mersi. Wi. Minis?

**MINISTER NAADIR HASSAN**

Mersi Mr Chairman. Mr Chairman ,mon agree avek lenterpretasyon ki *LGB* pe fer. Mon vwar ler ou lir, 4B ansanm (1) ek (2), i tir okenn *ambiguity* lo ki manner sa pour marse. Mersi.

**MR SPEAKER**

Mersi. Onorab Pillay?

**HON SEBASTIEN PILLAY**

I annan en keksoz ki'n prekrone dan Lalwa *Central Bank*, se ki *Central Bank* i endepandan. *Right?* Nou agree la. E sa i ganny prezerve anba Lalwa.

So si *Central Bank* i endepandan, okenn Lalwa ki ganny fer ki afekte sa lendepandans dan okenn fason i ilegal. *Because* sa Lalwa in deza fer provizyon ki *it prevails in any case* kan en Lalwa i ganny fer.

*Now*, mon ki mon pa konpran se ki manner nou pour ariv a lenstans, kot en Lalwa pour ganny fer, ki pour afekte en fonksyon Labank Santral? *This is the point* ki mon pe fer.

*So the question which begs itself* i se ki *what is the intention of the government?* *That is why* ki mon pe konpran poudir a *draft law*, in ganny dir *the word "draft" was used to make the clause legible from a legislative standpoint.*

Mon pe lir baze lo sa ki nou'n dir lo nou *Standing Order*. *But if* Gouvernman *wants to insist*, pour li al dan sa direksyon, mon napa problem mwan.

*But it would be subject to test eventually* pour vwar si bann Lezislasyon *Central Bank* i *actually ensure* son lendepandans. *Which is not the case*, ler ou pe al dan sa direksyon. Sa i nou pwennvi. Mon pa le al dan en deba Mr Chairman.

**MR SPEAKER**

Ok.

**HON SEBASTIEN PILLAY**

Mon a les sa la. Akoz *it's seems* ki, *I'm the only person* ki annan en problem ek sa.

**MR SPEAKER**

Nou a les Gouverner met dernyen mo.

**GOVERNOR OF CENTRAL BANK CAROLINE ABEL**

Mersi Mr Chairman. Mon krwar sa diskisyon ti ariv ler nou ti annan diskisyon avek *Bills Committee*. Ki ti gid nou poudir nou bezwen sanz langaz dan Lalwa.

E la kot Madanm Thyroomoody ti propoz sa langaz anba nimerò (2). So i baze lo gidans ki *Bills Committee* ti donneren.

**MR SPEAKER**

*Thank you.* Onorab Georges?

**HON BERNARD GEORGES**

Mersi Mr Chair. Mr Chairman anefe si nou pour gard sa mo “draft”, nou pour bezwen revwar 4B(1). E si nou ti poudir par egzanp.

*“Any draft law concerning matters relating to the objectives of the Bank shall — be the subject of consultation with the Bank”.* nou ti pour bezwen aret li la.

So, *any draft* ou bezwen konsilte labank. Me akòz i annan, *“before it is laid before the National Assembly”* it

*cannot be a draft despite Order 66. I bezwen en Bill akòz it’s Bill that are lodged - that are laid before the National Assembly.*

Alors se pour sa rezon ki dan *Bills Committee*, apre bokou letour - in desizyon in ganny pran pour gard li koumsa.

**MR SPEAKER**

Byen. Non, nou bezwen *move on*. Sel prosedir ki nou kapab pran se ki nou bezwen vot lo sa Lalwa - lo sa *amendment* - (*sorry*).

Nou kapab vote, me solman Onorab Pillay in dir i pa pe konteste sa soz. Alor mon mazinèn nou kapab *move on*. Onorab Pillay nou bezwen *move on*.

**HON SEBASTIEN PILLAY**

*...move on* mon pa le pran letan Lasanble lo la mwan.

**MR SPEAKER**

Ale.

*(comments off-mic)*

**HON SEBASTIEN PILLAY**

(Be wi 5 er in sonnen, ou bezwen travay Onorab). Mr Chairman, mwan ki mon le dir sa, si nou annan en provizyon Lalwa ki pa an konformite avek

Lalwa *Central Bank*, i fer ki i pa pe kapab pe ganny *laid* koman en *Bill* devan Lasanble, *in the first place*. Akoz i kler dan Lalwa *Central Bank*, ki okenn provizyon legal pa kapab antitez avek sa ki li i pe dir.

*That's the point I'm trying to make to the Leader of Government Business* ki i pa pe vwar.

### **MR SPEAKER**

Bon. Mersi. Onorab Hoareau?

### **HON JOHN HOAREAU**

Mersi Mr Chair. Non ava kontinyen aprezan. *After the word, "National Assembly"* i annan en *full stop* e nou pe retir sa "*and*". Prezan par konsekans nou pe retir "*(b)*" ki ti la avan, antye.

E nou *move on to subsection (2)*. Ki lir koumsa, "*Where a provision of an enactment hampers the Bank's ability to achieve its objectives or carry out its related functions, this Act shall prevail.*"

Apre nou retir tou sa bann bout ki par deryer, "*The Bank shall not be subject to any legal provision that would hamper the attainment of the Bank's objectives or the carrying out of its related functions*". Sa i ganny *deleted*.

Nou *move on to sub (3)*, i lir koumsa. "*A provision of this Act shall not be*", nou retir sa mo "*repealed*" nou *insert "amended or repealed"*, nou *delete "amended unless"* nou kontinyen avek "*without prior consultation with the Bank*". E apre sa i vin en *full stop*.

### **MR SPEAKER**

Wi. Onorab Pillay.

### **HON SEBASTIEN PILLAY**

Mersi Mr Chairman. Mr Chairman, mon le relev mon pwen orizinal. *Who* – lekel ki annan drwa fer en lamannman dan Lalwa *Central Bank*?

Eski i Minis Finans i annan drwa? Petet Minis Finans i kapab klarifye pour nou, eski Minis Finans i annan drwa fer lamannman dan Lalwa *Central Bank*?

Akoz sa pe prekonize poudir *an entity other than the Central Bank* i bezwen konsilte ek *Central Bank* pour amann son Lalwa. Or eski se *Central Bank* ki annan drwa, propoz en lamannman dan son Lalwa?

Nou ti a kontan konpran, dan lespri sa lendependans ki nou pe dir, nou le *enshrine Central Bank* ladan. Mersi.

### **MR SPEAKER**

Minis?

**MINISTER NAADIR HASSAN**

Mersi Mr Chair. Onorab, zis pour klarifye, *ok*, *Central Bank* i propoz son lamannman. Me parey ou konnen, se en Minis *through approval Cabinet* ki vin kot Lasanble, pour *propose* en Lalwa, *ok*.

So by *default*, Minis i kapab vini propoz en lamannman Lalwa *Central Bank*. Me selman ki pe dir ou, “*A provision of this Act shall not be amended or repealed without consultation with the Bank.*” *This is what is saying.*

**MR SPEAKER**

Wi. Onorab Pillay.

**HON SEBASTIEN PILLAY**

Mersi Mr Chairman, nou pa pe al fer deba lo la. *Because I don't seem* ki nou, nou pour kapab swe Minis lo sa pozisyon ki li in pran, *ok*? Minis pe dir ek nou koumsa *by default*, li i pour anmenn lamannman Lalwa *Central Bank*.

*Ok*, mon ti a konpran si nou dir poudir, “*any amendment to this Act shall be proposed by the Central Bank in consultation with the Minister.*”

Savedir *the initiator of the amendment is the Central Bank.*

*As the case, as the law is defined* la, i pa dir *ou the initiator is the Central Bank*. I dir ou, “*the law to amend this Act.*” Mon pa pe koz lo en lot Lalwa, nou pe koz lo Lalwa *Central Bank*, i kapab ganny amande, me an konsiltasyon ek *Central Bank*.

So mwan mon le fer... Mon ti ava krwar si nou pe dir nou pe *enshrine* son lendependans, nou fer kler poudir inisyasyon en lamannman Lalwa *Central Bank*, i ganny fer par *Central Bank*. pa son *Board*, pa son striktir ki annan an plas. Sa i mon pwen.

**MR SPEAKER**

Wi. Be Minis in eksplike poudir li ki bezwen anmenn lamannman.

**HON SEBASTIEN PILLAY**

Wi, Mr Speaker, napa problem. Be pa sa ki Lalwa pe dir...

**MR SPEAKER**

*Ok*. Minis, ou azoute?

**MINISTER NAADIR HASSAN**

Mersi Mr Chair. Mr Chair, mon'n antann largiman *Leader* Lopoziyon. Mon pa dakor avek son largiman ki i pe fer. E mon pozisyon i koumsa. Mersi.



**MR SPEAKER**

Well. Manm pa pe – Onorab Georges, wi?

**HON BERNARD GEORGES**

*Super minor amendment* Mr Speaker. Dan *clause* 4B(3) dan dezyenm laliny apre sa mo, “or,” napa – pa devret annan en *comma*. Mersi.

**MR SPEAKER**

Ok, zot i a note. Onorab Hoareau, nou a kontinyen.

**HON JOHN HOAREAU**

Wi. Mon pa ti ankor vremen fini avek sa *sub(3)*, *sub(3)* sa bout deryer kot i met, “*is consulted of any such change beforehand.*” Sa osi i ganny *deleted*.

Mon al aprezan lo paz 11. Mr Speaker, *sub (4)*. Sa “6” dan trwazyenm laliny, “*the Board shall be 6 years*” in sanze pour fer li ekrir “*six years*”, *in words, rather than in figures*.

Apre osi sa mo, “six” i sipoze annan en *space in between “years”* avek “six”. Nou al lo (5); “*Notwithstanding subsection (4), the members of the Board who are appointed for the first time upon the commencement date of.*”

Apre sa nou retir “*this amendment Act*”, nou met “*the*

*Central Bank of Seychelles (Amendment) Act, 2024*”. Apre i vin *comma*, apre i kontinyen.

Lot laliny swivan, ankor nou pe retir sa mo “6”, *in figures* - “*for a period of 6 years*”, “*six*” i ganny ekrir *in words*. E i dekolé, wi.

*Nou move on to page 12. Amendment of section 6 clause 8. Anba 6(1)(b) i lir koumsa, “have at least” ankor “8 years” i ganny – “8” figures i ganny tire e met “eight” in words, “eight years”.*

Apre sa mo “*years*” i vin “*of professional experience and have held a senior position for at least 5 five years.*” “5”, osi i retir *in figures* i met *in words*.

Nou al lo (2) aprezan. *Subsection (2). Notwithstanding subsection (1)(a), non-executive members may alternatively hold an advanced degree in auditing, compliance, administration, human resources, risk management”* apre sa i vin *Information Technology - information technology, avek en small, “i” information technology, (comma), accounting or law, nou retir sa mo, “and”.*

**MR SPEAKER**

Thank you. Wi, Onorab Pillay?

**HON SEBASTIEN PILLAY**

Mr Chairman. Mr Chairman, zis pour demann en klarifikasyon *short*. Lo anba 6(b) nou dir sa dimoun i sipoze annan 8 an *professional experience*.

*E held en senior position for at least five years. Senior position where? In the bank or outside the bank?*

Mon war i pa mete la mon pa konnen si i pour met li en lot landrwa...Mr Chairman.

**MR SPEAKER**

*Thank you. Gouverner?*

**GOVERNOR OF CENTRAL BANK CAROLINE ABEL**

I kapab form tou lede, dan labank oubyen an deor.

**MR SPEAKER**

Dan labank oubyen pa dan labank?

**GOVERNOR OF CENTRAL BANK CAROLINE ABEL**

Wi.

**MR SPEAKER**

*Thank you.*

**HON SEBASTIEN PILLAY**

Mr Chairman, eski nou'n defini *what a senior position is?* Dan Lalwa. Vi ki nou pe dir sa dimoun i bezwen annan en *senior position*, eski fodre i lo

nivo *PS*, Direkter Zeneral, Direkter? Si i dan Labank Santral i fasil. Ou konnen ki son nivo, ki'n arive. Be si i an deor Labank Santral, *who qualifies* avek en *senior position* Mr Chairman?

Mon ti a kontan klarifye dan benefis bann dimoun ki pe ekout nou ki demen ti a kontan *join* nou Gouvernman 2025, ler nou form Gouvernman pour ....

*(laughter)*

**MR SPEAKER**

*Well.* Minis oubyen Gouverner, mon pa konnen. Minis, ou a diriz Gouverner?

**GOVERNOR OF CENTRAL BANK CAROLINE ABEL**

Anvi ki nou konn bann abilite, ki sa dimoun i devret posede, ler ou pe regard pozisyon parey Gouverner, oubyen Depite Gouverner, definitivman i bezwen en dimoun ki'n deza annan responsabilite ase o dan en lorganizasyon.

So sa i enportan. So ou pe koz mete ou pour pran Gouvernman, ou pe koz Direkter Zeneral, Direkter, *PS*, sa bann nivo.

Akoz definitivman nou ler nou pe get dan lekonomi, nou bezwen annan son lekivalans

dan larestan – enkli sekter prive.

**MR SPEAKER**

Bon. *Ok*, mon krwar Gouverner eksplike, ki i ava annan en enterpretasyon rezonnab ki savedir en *senior position*, i an kad.

Bon, ser zanmi nou'n ariv lo paz 12. Ki pa tro mal aköz sa *Bill* i annan 38 paz. So mon krwar la i lemoman ki nou kapab arete pour ozordi. E nou a kapab rebran avek la kot nou'n arive demen.

Donk, pour nou *adjourn*, nou a repas dan Staz Lasanble. Lasanble ava *adjourn* ziska demen bomaten 9 er pour kontinyasyon lo *Bill*. Mersi.

**(ADJOURNMENT)**









